

## Inatsisissatut siunnersuummut nassuiaatit

Nassuiaatit nalinginnaasut

### 1. Aallaqqaasiut

Qimmit qimuttut pillugit Inatsisartut inatsisissaattut siunnersuut una uumasunik illersuineq aamma illersorneqarsinnaasumik uumasuuteqarnermi malittarisassanut nalinginnaasunut Uumasunik illersuineq pillugu Inatsisartut inatsisaanniittunut ilassutaassaaq.

Siunnersuummi kalaallit qimmii qimuttut qimminik allanit nalinginnaasunit qitsunnillu aalajangersaernerit immikkoortinnissaat tunngavigineqarpoq, taamaammat qimmeqarneq qitsuuteqarnerlu pillugu Inatsisartut inatsisissaattut siunnersuutikkut ugguuna kalaallit qimmiinik qimuttunik qimmeqarneq pillugu inatsimmit immikkoortinneqarput, tamannalu ilutigalugu kalaallit qimmii qimuttut pillugit qimmeqarneq illersuinerlu pillugit Inatsisartut inatsisaannut siunnersuuteqartoqarluni Inatsisartunut suliaassanngorlugu ilanngullugu saqqummiunneqartussamik.

Kalaallit qimmiinik qimuttunik qimmeqarneq illersuinerlu pillugit Inatsisartut inatsisaanni qimminik qimuttunik isumassuisumik isumagineqarnerulernissaannik qitiutitsinerulissaaq aammalu qimuttunik qimmeqarniaraanni piunasaqaatit arlallit ingerlateqqinneqarlutillu sukaterneqarput, tassunga ilanngullugu ilisarnaasersuinissanut nalunaarsuinissanullu akiuussutissamillu kapuinerit pillugit piunasaqaatit aamma kommunimi, imaluunniit kommunimit allamit kommunimut allamut, qimminik qimuttunik nuussinerit nalunaarutigineqartarnissaannik piunasaqaatit atuuttussanngortinneqarpoq.

Siunnersuummi siullertut siunertarineqartoq tassaavoq qimmit qimuttut qanoq uumasuutiginnissaat pissusilersorfiginnissaallu pillugit assigiissumik illersorneqarsinnaasumillu inatsisitigut tunngavissiiinissaaq. Malittarisassat aamma siunertaraat kalaallit qimmii qimuttut ukiuni kingullerni ilaatigut nappaalanerit kiisalu inooriaatsit silallu pissusaata allanngorneri qamuterallannik atuinerulernermik qimusserneq akigalugu kiisalu sikuusarnerata annikilliarturnera pissutigalugit ikiliartuinnarsimasut illersornissaat.

Tamanna takuneqarsinnaavoq ilaatigut akiuussutissiisarnermik maanna atuuttumik ingerlatitseqqinnikkut ilaneqarneratigullu. Aamma malittarisassani inatsimmi susasaqartut akornanni akisussaaffiup ersarissumik agguarnissaa qulakkeerniarneqassaaq kiisalu oqartussat pisariaqartunik pisinnaatitaanerannik qulakkeerinnissalluni. Oqartussat nakkutilliinerat sukaterneqarpoq kiisalu kalaallit qimmiat qimuttoq pillugu Inatsisartut inatsisaanni suleriaaseq malinneqarluni, taamaalilluni Naalakkersuisut nakkutigilerpaat inatsit malinneqarnersoq, Uumasunut Nakorsaaneqarfik nakkutilliisuvoq kommunalbestyrelsillu najukkami ulluinnarnilu aqutsineq nakkutilliinerlu ingerlallugit, Uumasunut Nakorsaaneqarfik inatsimmi malittarisassat

pisariaqartitsinerlu naapertorlugit isumasiortarlugu. Kommunalbestyrelsip aalajangigaanut Uumasunut Nakorsaaneqarfik naammagittaalliorfigineqarsinnaavoq.

Aalisarnermut Piniarnermullu Naalackersuisoqarfiup (APN) Naalackersuisut Inatsisartullu ataatsimut isigalugit naalackersuinikkut anguniagaat aalajangersimasunullu tunngatillugu aalangiineri tunngavigalugit aalisarnermik, piniarnermik nunalerinermillu kiisalu uumasunut nakorsaqaartitsinermik suliaasaqarfinni suliniutit aalajangersimasut arlallit tunngavigalugit pilersaarusioneq, ineriartortitsineq naammassinninnerillu aalajangersimasut pingaarnerit suliarisarpai.

Kalaallit Nunaanni Uumasunut Nakorsaqaarnermut Inuussutissalerinermilu Oqartussaqaarfik, matuma kingorna Uumasunut Nakorsaaneqarfimmik taaneqaartartussa, APNN-imut atavoq ingerlatsinermut kiisalu Naalackersuisoqarfiup uumasulerinermut inuussutissanullu tunngasunik suliaasai isumagisaralugit. Tassunga ilaapput inuussutissat, uumasut nappaataat inunnt tunillaassorsinnaasut, uumasunik illersuineq, qimmeqarneq qitsuuteqarnerlu kiisalu qimminut qimuttunut nunalerisullu uumasuutaannut tunngasut pillugit siunnersuineramik ikiorsiisarneq pillugit Namminersorlutik Oqartussat inatsisitigut maleruagassiaannik ingerlatsineq aqutsinerlu. Oqartussaasuttaaq Avatangiisinut Inuussutissalerinermullu Ministeriaqarfik aqutsisoqarfiillu tassunga attuumassutillit suleqatigalugit Kalaallit Nunaata Danmarkillu akornanni uumasutigut killissarititaasut ataqatigiissartarpaat. Tamatuma saniatigut Uumasunut Nakorsaaneqarfik nuna tamakkerlugu qimminik akiuussusersuisarnissamut pilersaarut 2017-imiit atuutsilerneqartoq nakkutigaa.

## **2. Siunnersuummi immikkoortut pingaarnerit**

### *2.1. Isumassuilluni isumaginninnissamut piunasaqaatit sakkortusisat*

Siunnersuutip qimmit qimuttut pillugit Inatsisartut inatsisaat maannamut atuuttoq kiisalu qimmit qitsuillu pillugit inatsit 1998-imeersoq taarserpai taamaalillunilu 1998-imi qimmit qitsuillu illersorneqarsinnaasumik pineqarnissaannut piunasaqaatinut sakkortusisanut naapertuutsilerlugu ilaatigullu uumasunik illersuinissamik inatsimmi atuutsilerneqartumi anguniarneqartut takutinneqarlutik. Uumasunut isiginninniarneq inatsisissatut siunnersuummi aalajangersakkanut ilanngunneqarput uumasullu illersorneqarnissaat pillugu inatsimmik ilaneqarlutik.

### *2.1. Qimminik qimuttunik nuussisarneq assartuisarnerlu*

Qimminik qimuttunik nuussisarnerit assartuisarnerillu pillugit malittarisassat itisilerneqarput sakkortusineqarlutillu, taamaalilluni qimmit qimuttut illoqarfimmit nunaqarfimmillu suminngaanneernersut ersarissarneqarluni, tassami qimminik qimuttunik piginnittut qimmitik nassarlugit nuukkaangamik kommuninut nalunaarutigisussaammagit. Inatsisitigut kalaallit qimmii qimuttut kisimik illoqarfinni qimmeqarfiusuniiginnarnissaat qulakkearniarneqarpoq. Taamaammat qimminik piginnittup uppersartussaavaa qimmini qimuttut kalaallit qimmerigaat qimuttoq kommuninilu qimminut qimuttunut nalunaarsortinnissaa akisussaaffigalugu. Maanna kalaallit

qimmiinik qimuttunik DNA-mik misiligutissanut atorneqartussanik akikitsunik nioqquteqanngilaq, taamaammat inuinnaat qimmiminnik misiliiffiginissaat pisinnaanani. Akikinnermik misiligutinik peqalerpat DNA-mik misiligutininut tunngasunik malittarisassanik peqarnissaa inatsisikkut qulakkeerneqarpoq.

Ukiuni kingullerni qimmit qimuttut akornanni nappaalanerpassuit pissutigalugit qimmit qimuttut angallanneranni pitsaanermik nakkutigineqarnissaat pisariaqartilersimavaat, tassa oqartussat tuniluunnermit sumit aallaaveqarnerannik paasiniaasernerannit takutinneqarmat nappaalanerit amerlanerit qimuttunik qimmeqarfiup iluani qimminik nuussinerni piussuteqartartut. Nappaalasoqalinnginnissaa nappaalasoqarneranillu tuniluuttoqalinnginnissaa anguniarlugit illoqarfinit kommunillu killeqarfiinit allanut nuunnermi qimminik qimuttunik nuussinerit angallassinerillu qimminik qimuttunik piginnittut nalunaarutigisartussaavaat. Aamma oqartussat sumiiffinni aalajangersimasuni nappaalanernik tuniluuttoqarnissaa aarlerinaatoqarpat qimminik qimuttunik nuussisoqarnissaanik inerteqquteqarsinnaalerput.

## *2.2 Qimussimik sukkaniunneq*

Siunnersuut qimussimik sukkaniunnermut tunngasunik suliniutinik nutaanik arlalinnik ilaqarpoq. Qimussimik sukkaniunneq kalaallit kulturiannut ilaalluinnarpoq, siunnersuullu tamatumangga aallaaveqarluni. Peqatigitillugu qulakkeerneqartariaqarpoq sukkaniunnernik tamakkunangga ingerlatsinernut pissutsit qimmit qimuttut iluaalliunnginnissaat isiginiarlugit ingerlanneqartariaqartut, kiisalu sukkaniunnermi peqataasunut naapertuuttunik assigiimmillu piumasqaateqartunik atungassaqtinnissaat qulakkeerneqartariaqarluni. Sukkaniunnerup nalaani qimmit qimuttut nukkassaatinik atuitinneqarnissaat inerteqqutaavoq. Arnavissat ilummit milutsitsisullu sukkaniunnermi peqataatinneqassanngillat. Unammisitsinernut akisussaasuusut maleruagassiornissaannik piumasqaateqarpoq, tamannalu aqqutigalugu qimussinik sukkaniunnerit qimminut qimuttunut inunnullu iluaqutaasumik ingerlattarnissaat qulakkeerlugu.

## *2.3 Qeqertat qimmiliviit*

Qeqertat qimminik qimatsiviit atorneqartarnerannut malittarisassanik nutaanik killilersuiffiusunik siunnersuummi eqqussisoqarpoq. Qimmit qimuttut arlalitsigut atugarissaarnerulernissaat, kisiannili aamma ileqquusut atuinnaarissaat siunnersuummi siunertarineqarput. Taamaammat qeqertat qimminik qimatsiviit atorneqartarnerannut akisussaaffeqarneq siunnersuut aqqutigalugu ersarinnerulissaaq. Maannalu qimminik piginnittup qimminik qimuttunik ullut tamaasa nakkutiginnittarnissaa inatsisitigut pisussaaffinngorpoq, tamannalu aqqutigalugu nerisassaqtarinniarnerat imeqarniarnerallu qulakkeerlugit. Peqatigitillugu qeqertami qimmiliviusumi allagartamik qimmimik piginnittup attavigisinnaaneranut paasissutissiiffiusumik takussaasoqassaaq, taamaaliornikkut qimmit qimuttut ajornartorsiorfiulissagaluarpata piginnittoq piaarnerpaamik saaffigineqarsinnaaniassammat.

## *2.4 Akiuussutissiisarneq*

Kapuutininik akiuussutissanik atuinissamat pilersaarutit ullumikkut ima iluseqarput:

Akiuussutissamik kapitinneq nr.	Qimmip utoqqaassusia	Qimmit nappaalalernerat/ parvovirus	Perlerorneq.	Akiuussutissiinerit akornanni piffissaq
1	3-nik qaammatilik	X		-
2	Qaammatit sisamat missaannik utoqqaassusilik	X	X	Sap. ak. 3-5
3	Ukioq 1 miss.	X		Qaammatit 6-12
4+	Ukiut sisamat missaannik utoqqaassusilik	X	X	Ukiut pingasut

Inatsisartut inatsisaatigut ugguuna akiuussutissanik kapuineq ima ilusilersorneqassaaq:

Akiuussutissamik kapitinneq nr.	Qimmip utoqqaassusia	Qimmit nappaalalernerat/ parvovirus	Perlerorneq.	Akiuussutissiinerit akornanni piffissaq
1	3-nik qaammatilik	X		-
2	Qaammatit sisamat missaannik utoqqaassusilik	X	X	Sap. ak. 3-5
3	Ukioq 1 miss.	X	<u>X</u>	Qaammatit 6-12
4+	Ukiut sisamat missaannik utoqqaassusilik	X	X	Ukiut pingasut

Inatsisini atuuttuni ("Nappaammik perlerornermik (rabies) akiuiniarneq pillugu Namminersornerullutik Oqartussat nalunaarutaat nr. 22, 17. september 1997-imeersoq)" aamma "Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata nr. 24, u. 28. november 2016-imeersup allanngortinneqarneranik Inatsisartut inatsisaat. (Inatsisitigut piumasagaataasumik akiuussutissaliineq, nalunaaqutsersuineq nalunaarsuinerlu pillugit allannguutit)" qimmeq qimuttoq ataatsimik ukioqaleraangat perlerornermut akiuussutissamik kapitittarnera ilanngunneqarsimavoq.

Tassunga tungavioq tassavoq akiuussutissanik kapuutininik maanna pilersuisoq (Boehringer Ingelheim Animal Health Nordics A/S) aamma nunat tamalaat akornanni akiuussutissamik kapuuisarnermi malittarisassat akuerisaasut World Small Animal Veterinary Association-imi (WSAVA, <https://onlinelibrary.wiley.com>, søg "WSAVA vaccination guidelines for the dog and the cat") nassuiarneqartumi inassutigineqarmat uumasut qaammatinik sisamanik utoqqaassuseqarlutik perlerornermut akiuussutissamik kapitinnermi kingorna uumasunit perlerortunit kiitinnermut illersuuteqarnissaat qulakkeerniarlugu ukioq ataaseq qaangiuppat akiuussutissamik

kapiteqqinnissaat. Taamaaliornikkut akiuussutissanik kapoorineq ullutsinnut naleqqunnerulerpoq, taamaalilluni qimmit inuillu perlerornermut pitsaanerpaamik illersorneqarnerat qulakkeerneqarluni.

### *2.5 Uumasut napparsimmaviisa pequtsersornerat il.il.*

Uumasut napparsimmaviinik pilersitsinermut, pequtsersorneranut ingerlannerannullu malittarisassat sukaterneqarput. Tamanna aamma atuuppoq qimmit qimuttut pillugit ilisimatusarnermut paasissutissanillu katersinermut tunngasut. Piffissami qaangiuttumi takuneqartarput kattuffiit ilisimatusartullu nunamit allameersut nunatsinnukarlutik kalaallit qimmiinik qimuttunik nakkutigisaanngitsunik assigiinngitsunik misileraallutillu passuneqartarlutik Nunatsinni oqartussat nalusaannik taakkulu nakkutigingisaannik.

Taamaammat tamatumani malittarisassat sukaterneqassapput, taamaalillunilu ilaatigut misileraasoqassappat passussisoqassappallu kiisalu siunnersuisoqassappat ilisimatusartoqassappallu nakkutigisaasunik akuerisaasunillu ingerlatsisoqarnissaa qulakkeerniarlugu Uumasunut Nakorsaaneqarfimmi akuersissummit peqqaartoqartalissaaq kiisalu tamakkunannga ilisimalikkat Uumasunut Nakorsaaneqarfiup iluaqutigiumaarai kiisalu kalaallit kulturikkut qimminik qimuttoqarneq pillugu ileqqi ataqineqarlutik tamakku pisassallutik. Tamakkua nakkutigineqarnissaasa saniatigut sukaterinikkut ugguuna kalaallit qimmiata qimuttup akuerisaanngitsunik, pisariaqanngitsunik ileqqorissaanngitsunillu uumasunik misilerarneqarnissaannut illersorneqarnissaa aqutissiuunneqassaaq.

### *2.6 Pineqaatissiinissamut periarfissat amerlinerat*

Inatsisini siusinnerusuni akiliisitsinerinnarmik pineqaatissiisoqartarpoq. Maanna unnerluussisussaataasut eqqartuussiviullu pisaqarneratut isigisaannik annertutigisunik pineqaatissiinernik allanik eqqartuussisoqarsinnaalerpoq. Taakku tassaasinnaapput arsaarinninnerit imaluunniit Pineqaatissinneqarsimasut Inissiisarfirmut inissiinerit. Qimuttunik qimmeqarsinnaaneq uumasuteqarsinnaanerlu pillugit malittarisassat unioqqutinneqartarnerannut assersuutissat sakkortuut nalinginnaalersut ilaatigut takussaalerput, matumani akiliisitsisarneq kisiat pineqaatissiissutigalugu unioqqutitsinermut naapertuunnatik. Taamaammat pineqaatissiisinnaanerit amerlinissaat pisariaqarpoq, suliassaqarfimmi tassani inatsisaaqqaartumi 1998-imi atulersumit ineriartornermut malittarisassanik naleqqussaalluni atorineqarsinnaasunik.

## **3. Pisortanut aningaasaqarnikkut allaffissornikkullu kingunissai**

Inatsisissatut siunnersuutip inatsisitigut pisussaaffigalugu ilisarnaasersuinerit nalunaarsuinerillu Qimmeqarneq qitsuuteqarnerlu pillugit Inatsisartut inatsisaannik 1. januar 2017-imi allangortinneqartoq ingerlateqqippaa annertusarlugulu (Qimminik akiuussusersuinerit, nalunaaqutsersuinerit nalunaarsuinerillu), tamatumani qitsunnik qimminillu annertunerusumik akiuussusersuinerit nalunaarsuinerillu atuisartunit akilerneqartartut aamma qimminik qimuttunik savallu qimmiinik Nunatta Karsianit akilerneqartut atuuttussanngortinneqarput. Aaqqissuussaaneq tamanna ingerlateqqinneqarsinnaavoq annertusarneqarlunilu taamaattumillu tamanna kommunini ilisimaneqassasoq aallartinneqarsimassasorlu ilimagineqarpoq.

Akiuussutissamik qimminut immikkut kapooreqqinnerit Nunatta karsianut 100.000 kr.-nik ukiumi siullermi inatsisip atuutilernerata kingorna aningaasartuutaqqissapput kiisalu ukiuni tulluittuni 200.000 kr.-nik. Taakku saniatigut Uumasunut Nakorsaaneqarfimmi suleriaatsip allaffissornerullu iluani minnerusumik allannguisoqassaaq.

Aallarnisaanermi kommunit kapuuinissanut inatsisitigut pituttuisunik malittarisassat naapertorlugit akiuussutissanik kapuuingippata taamaattumillu aallaqqaataaniit akiuussutissanik kapuuisariaqalerlutik akiuussutissanut immikkut aningaasartuuteqartoqarnissaa naatsorsuutigineqartariaqarpoq. Akiligassaq taanna kommunimit akilerneqassaaq. Aningaasat qassiorpiassanersut naatsorsorneqarsinnaanngillat, tassami pissutsit assigiinngitsorpasuit apeqqutaasussaammata. Perlerornermut akiuussutissamut kapitinneq kapuutitalerlugu ataaseq 31 kr.-qarpoq qimmillu nappaataannut/parvovirusimut 36,50 kr.-neqarluni (2020-mi qaammatit pingasukkaartut naggataanni akit, Kalaallit Nunaannut pilersuisumit assartuineq ilanngullugu). Taakku saniatigut Nunatsinni Uumasut nakorsaaneqarfianit kommunimut nassiussinernut aningaasartuutit kommunillu allaffissornermut aningaasartuutaat ilanngunneqassapput. Qeqertat qimmiliviit aamma qimminut inissiiviit aallartinneranni kommuninut suliat amerliallannerannik pilersaarusiornerannilu kiisalu nakkutigineranni aningaasartuutaanerannillu kinguneqassaaq. Atuutsitsilernerup malitsigisaanik qeqertat qimmiliviit ikilinissaat naatsorsuutigineqarpoq.

#### **4. Inuussutissarsiortunut aningaasarsiornikkut allaffissornikkullu kingunissai**

Inuussutissarsiutilinnut aningaasatigut allaffissornikkullu sunniuteqassanngilaq.

#### **5. Avatangiisinut, pinngortitamut inuillu peqqissusaannut kingunissai**

Siunnersuut avatangiisinut, pinngortitamut kinguneqartussatut naatsorsuutigineqanngilaq.

Perlerornermut akiuussusersueqqinneq nunat tamalaat inassutaat naapertorlugu atuutsinneqalerpoq innuttaasullu perlerornermut illersuutaat taamaalilluni patajaallisarneqarluni.

#### **6. Innuttaasunut kingunerisassat**

Inatsimmi qimmillit akisussaaffii erseqqissarneqarput, taamaaliornikkut qimmimi qimuttut eqqortumik akiuussuserneqarsimanissaat qulakkeerniarneqarluni. Taamaammat qimmillit tassunga tunngatillugu kommunimut isumaqatigiissuteqarnermut tunngatillugu namminneq annerusumik iliuuseqartariaqarput. Aamma erseqqissarneqarput qimmit qimuttut qanoq pitunneqartarnissaat qanorlu pineqartarnissaannut tunngasut. Qimmilinnut ataasiakkaanut annikitsuinnarmik aningaasartuutaanissaa naatsorsuutigineqarpoq.

#### **7. Siunnersuutip kingunerisinnaasai pingaarnerit allat**

Inatsimmi qimmit qimuttut peqqinnerulernissaasa sivilunermillu uumasarnissaasa qulakkeernissaat siunertarineqarpoq. Tamanna siunissami qimminik qimuttunik nukittunerusunik sivilunerusumillu uumasinnaasunik tamatumalu malitsigisaanik qimmit qimuttut ataasiakkaat naleqarnerulernerannik sunniuteqassasoq naatsorsuutigineqarpoq.

## Siunnersuummi aalajangersakkanut ataasiakkaanut oqaaseqaatit

### § 1

Aalajangersakkakut matumuuna Inatsisartut inatsisaata atuuffissaa aalajangersarneqarpoq. Taamaalilluni Inatsisartut inatsisaanni ilaatinneqartut tassaapput qimmit qimuttoqatigiiaat qimminik qimuttoqarfimmiittut tamarmik. Oqaatsip 'tamarmik' atornerani isiginiarneqassapput qimmit qimuttoqatigiit ikattu kiisalu qimmit qimuttoqatigiit ikinnerit, assersuutigalugu qimmeq ataasiinnaq imaluunniit qimmit marluinnaat. Qimminik qimuttoqarfimmi najugallit qimminik qimuttunik uumasuuteqartarnerat kiisalu qimuttussaminnik qimmeqartarnerat nalinginnaaleraluttuinnarpoq. Taamaammat una Inatsisartut inatsisaat qimminut qimuttunut inuussutissarsiutigalugu qimminut qimuttunut kiisalu inuussutissarsiutigalugu qimminut qimuttoqatigiinnut tunngatinneqarpoq. Aalajangersakkami aamma qimmit qimuttut qimuttoqarfimmit qimuttoqarfiunngitsumut inatsisit malillugit aqqusaartut isiginiarneqarput. Inatsisartut inatsisaatigut Uumasunut Nakorsaaneqarfik qimuttoqarfimmit qimminik qimuttuunngitsunik eqquassinissamut akuersinissaanik piginnaatinneqarpoq, qimmit taakku sullissinermut atatillugu oqartussallu qimmerippagit, taakkulu inatsisit malillugit akiuussuserneqarnissamut malittarisassat malissavaat.

### § 2

Aalajangersakkami oqaatsit Inatsisartut inatsisaanni atorneqartut nassuiaasersorneqarput.

#### Nr. 1-imut

'Qimuttunik qimmeqarfik' pillugu nassuiaat. Sumiiffik aalajangersakkami nunap immikkoortuatut nassuiarneqarpoq inatsimmullu nunap assinganik ilanngutami takutinneqarluni. Akerlianik qimuttunik qimmeqarfimmit nunap immikkoortortaa ilaanngitsoq inatsimmillu atortitsiviunngitsoq ima nassuiarneqarsinnaavoq: Sumiiffik nunatta Kitaani allorniusat sanimukartut 66-issaata kujataani Tunumilu Nunap Isuata kimmut allorniusat ammukartut 44-ssaata kitaani.

#### Nr. 2-mut

Oqaatsip "qimmip qimuttup" nassuiarnera. Inatsisartut inatsisaanni uani oqaaseq tassaatinneqarpoq kalaallit qimmiat qimuttoq. Qimminut qimuttunut assersuunneqartartut, imaluunniit "qimmit sulinermut atatillugu qimmerineqartut", soorlu qimmit Siberian Husky aamma Alaskan Malamut taamaalillutik nassuiaammi uani pineqanngillat. Qimmit qimuttut allat nunatsinneersuunngitsut, soorlu Islandimeersut, Norgemeersut Canadameersulluunniit aamma ilaatinneqanngillat. Kalaallit qimmiat qimuttoq pillugu nuna tamakkerlugu sorphiaanera ersarinnerusumik maanna nassuiaateqartinneqanngilaq, tassa qimmip isikkuatigut sorliunera ingerlaannaq takuneqarsinnaanngilaq, soorlu isikkuinnaatigut takuneqarsinnaanani kalaallit qimmerineraat imaluunniit kalaallit qimmerinnginneraat aalajangiussisinnaasumik. Piffissap ingerlanerani kalaallit



qimmiata qimuttup DNA-va paasiniarneqarsimavoq sannaalu nassuiarneqarsimalluni qimminillu allanit ersarissumik allaanerulluni, maannakkulli qimmit piginnittui akikitsunik DNA-mut misiligutissanik pisinnaangillat. Taamaammat Uumasunut Nakorsaaneqarfik kalaallit qimmiat qimuttoq pillugu aalajangiiniarnermi allaffissornikkut suleriaaseqalerpoq, qimmerlu qimuttoq kalaallit qimmerineraat isigineqarsinnaalluni kommunalbestyrelsimi akisussaasut, tassa imaappoq qimminik nakkutilliisut qimminilluunniit akiuussusersuisut qimmeq akiuussuserpassuk, ilisarnaaserlugu nalunaaqutserlugu nunatsinnilu qimminut nalunaarsuivimmut nalunaarsorpasuk. Taamatut suleriaaseqarneq inerisarneqarsimavoq qimmeqarneq najukkani oqartussanit akisussaaffigineqarmat, taakkualu qimuttunik qimmeqarnermut tunngasunik najukkaminni ilisimasariakkat pikkoriffigaat.

### § 3

#### Imm. 1-imut

Aalajangersagaq § 2-mi nr.2-mi 'qimuttunik qimmeqarfik'-mik nassuiaammut atatinneqassaaq, tassanilu aalajangerneqarpoq kalaallit qimmiat kisimi qimminik qimuttoqarfimmiissasoq qimuttoqarfiullu avataani qimmit qimuttut qimmerineqassanngitsut. Tamatuma malitsigisaanik qimmit qimuttut qimmeqarfinit unioqqutitsilluni Kalaallit Nunaanut sumiiffinnut allanut anninneqarsimasut toqutaasarnissaat. Aalajangersakkakkulli kalaallit qimmiinik qimuttunik nunanut allanut annissisinnaaneq mattussisoqanngilaq.

#### Imm. 2-mut

Qimminik qimuttoqarfinnut qimminik sunilluunniit eqqussinissaq inerteqqutaasoq aalajangersakkami aalajangersarneqarpoq. Uani "qimmit allat" oqaaseq atorneqartoq qimminut kalaallit qimmerinngisaannut qimuttuunngitsunut tamanut ataatsimut atorneqarpoq. Eqqussuinerit tamarmik inerteqqutaapput, sivisuumik sivikitsumilluunniit uninngassanersoq apeqqutaatinnagit, taamaattorli imm. 3 takuuk. Qimmit qimmeqarfiusumi nunamiileraangamik imaluunniit sissamiit meterinik qulinik qaninnerusumiikkaangamik, tassunga ilanngullugu kangerluup paavaniittut, qimmeqarfimmut eqqunneqarsimasutut isigineqartarput.

#### Imm. 3-mut

Aalajangersakkat imm. 2-mut immikkut avaqqutaarinissamut periarfissiivoq, tassanilu aalajangersarneqarluni Uumasunut Nakorsaaneqarfik akuersissutigisinnaagaa sulinermi qimmit, assersuutigalugu Akileraartarnermi Aqutsisoqarfimmi politiilluunniit imaluunniit qimmit ikiortit inuinnarnut uppersakkamik timikkut innarluutilinnut ikiortissatut qimmit immikkut sungiusakkat qimuttunik qimmeqarfimmut eqqunneqarlutillu qimmerineqarsinnaaneri. Taamaallaat qinnuteqarnikkut akuersissuteqartoqarsinnaavoq, qinnuteqaat Uumasunut Nakorsaaneqarfimmut nassiunneqartussaalluni. Qimminut sullissinermi qimmerineqartunut akuersissutit taamaallaat inunnut timikkut innarluuteqarnermik uppersaateqartunut tunniunneqarsinnaapput. Uani ilaatigut eqqarsaatigineqarput soorlu tappingernerit imaluunniit killilimmik aalasinnaaneri. Uani taamaallaat

eqqarsaatigineqarput oqartussat qimmii, sulinermut atatillugu qimmit immikkut aalajangersakkamullu ilaasut sungiusarneqarsimasut. Qimmit ikiortigineqartartut taamaammat immikkut akuersissuteqarnissami ilaatinneqanngillat, aalajangersakkami taamaallaat timikkut innarluutit pineqarmata, tarnikkut innarluutit pineqaratik. Aalajangersakkami oqaaseqaatit aappaat atorlugu Uumasunut Nakorsaaneqarfik periarfissinneqarpoq qinnuteqarnikkut pisortat oqartussaasa sulinermut atatillugu qimmeqarnissaannut akuerineqarsinnaanissaat, ass. akileraaruserisut, politiit imaluunniit upalungaarsimasut. Sungiusarnej pineqarpat qinnuteqaat Uumasunut Nakorsaaneqarfimmut piffissaalluuartillugu nassiunneqassaaq, taamaalilluni taanna sapaatip akunneranik uullullu 14-it tikillugit isummernissamut piffissaqassalluni.

#### Imm. 4-mut

Tusagassiorfinnut tapiissutinik qinnuteqarnissamut arlalinnik piumasaaqaateqarpoq. Allattukkat tamakkiisuunngillat. Aammattaaq piumasaaqaatigineqarsinnaavoq qimmit eqqussat sumi sunillu piumasaaqaateqarluni angalasinnaaneri kiisalu piumasaaqaatigineqarluni qimmit eqqussat sulinermut atatillugu imaluunniit innarluutilinnut ikiortissatut eqqunneqarsimanersut ersarissumik nalunaaqutserlugit, assersuutigalugu uliisigut anuisigulluunniit oqartussat ilisarnaataannik ersarissumik pilerlugit imaluunniit qimmimik piginnittoq ilisarnaatitalinnik atisaqartinneratigut. Qimmip sumut atorneqarnera apeqqutaalluni pisulluunniit ataasiakkaat apeqqutaatillugit piumasaaqaatit allanngorarsinnaapput.

Kalaallit qimmiata qimuttup nappaatinut assigiinngitsunut illersorneqarneranut atatillugu pisortani sulinermi qimmit qimmillu ikiortit qimminut qimuttunut akiuussusersuinermit pilersaarummut atuuttumut qaqugukkulluunniit malinnittussaapput.

#### Imm. 5-imut

Aalajangersakkami aalajangiunneqarpoq qimmeq qimuttoq qimminik qimuttoqarfinit ataasiarluni anninneqarsimappat eqquteqqeqqusaanngimmat. Tassani pineqarput qimmit qimuttut anninneri tamarmik, annissineq qanorluunniit sivikitsigisimagaluarpat, taamaattoq § 7, imm. 5 takuuk, taassumalu kingorna Uumasunut Nakorsaaneqarfiup akuersissutigisinnaavaa qimminik qimuttunik qimuttoqarfiit akornanni nuussinermi qimuttoqarfiunngitsukkut aqqusaarnermut piumasaaqaatinik ilaqarpata.

#### Imm. 6-imut

Aalajangersagaq imm. 1-imi eqqussinissamut annissinissamullu inerteqqummik malittaavoq, taannalu ikkunneqarluni kalaallit qimmiat qimuttoq nappaatinut illersorniarlugu ikiliartunnginnissaalu anguniarlugu.

Illersuiniarnermi isiginiarneqarput pissutsit makku, tassa qimmit qimuttut unioqqutitsinikkut anninneqarsimasut kingornalu uterterteqqinneqarsimasut qimuttunik allanik tunillaassuisinnaanerat, soorluttaaq qimminik qimuttunik utertitsinermi qimmit immikkuullarissusertik annaajartulersinnaammassuk qimminik qimuttoqarfiunngitsuni nuliusimappata piaqqisimappatalu,

kalaallit qimmiinut qimuttunut assingusut taamaammallu sianigineqanngippata qimuttoqarfinnut unioqutitsinikkut eqqunneqarlutik nuliunikkut kalaallit qimmiannik qimuttumik akuuilerlutik. Aalajangersakkami oqaaseqatigiit kingulliit aqcutigalugit sumiiffimmi kalaallit qimmiannik qimuttumik tunngavissaqartumik pasitsaassinermi nalunaartussaataaneq atulersinneqarpoq, taamaalillunilu najukkami innuttaasut ikioqatigiillutik kalaallit qimmiannik qimuttumik illersuisoqarnissaa anguniarneqarluni.

#### § 4

##### Imm. 1-imut

Aalajangersakkami ilaatinneqarput pisut qimuttunik qimmillip qimmini qimuttut nuukkusuppagit, nuunnerlu taanna atajuartussaappat utaqqiisaagallarpalluunniit apeqqutaatinnagu, taamaattoq sivikitsuinnarmik aqqusaarnerit ilaanngillat, soorlu piniariarnermi takornarianilluunniit angallassinerni, imaluunniit nuunnermut atatillugu ulluni ikittuinnarni nammineq qimmilivimmiunngitsoq unikkallarnernut atatillugu. Illoqarfimmiit allamut ungasissorujussuarmut qimussertoqassappat tamanna nuunnertut nalunaarutigineqassaaq. Tassani nuunnerit sulluunniit pineqarput, illoqarfimmi/ nunaqarfimmi qimmilivimmut nutaamut nuussinerit qimuttunillu qimmeqarfiup iluani illoqarfimmut/ nunaqarfimmut nutaamut nuussinerit ilanngullugit. Ilaatigut tamanna takuneqartarpoq piginnittoq assersuutigalugu najukkaminut nuuinniaruni, ilaqtaminut tikeraarniaruni imaluunniit qimussimik sukkaniuuttunut peqataaniaruni, piniariarfimmi aalisariarfimmilu ukiiniaruni il.il.

Qimuttunik qimmilik qimmimi qimuttut illoqarfimmut nunaqarfimmulluunniit allamut nuukkusuppagit qimmilik kommunimut najukkamut tamatuminnga nalunaarutiginnissaaq. Siunertarineqarpoq kommunip qimmip qimuttup sumiinnerata ilisimanissaa nakkutiginnissaatalu qulakkeernissaa, taamaaliornikkut nappaatit tuniluussinnaanerat pillugu aarlerinaatip millisarnissaat, qimmit qimuttut peqqissusiisa nakkutiginnissaat kiisalu qimmiliviup qanoq isikkoqarnerata inatsimmi aalajangersakkat malinneraat nakkutiginiarlugu. Kommunip aamma ilisimassavaa qimmit qassiunersut, taamaaliornikkut inatsisitigut piumasqaataasumik akiuussusersuinissamut pilersaarut malissinnaajumallugu. Aalajangersakkami qimminik qimuttunik nuussineq kommunimiit allamut kommunimut pippat piginnittup kommunit marluk taakku nuussineq pillugu nalunaarfigissagai aalajangersarneqarpoq.

##### Imm. 2-mut

Aalajangersakkami aalajangersarneqarpoq nuussinermi nalunaaruteqarnermi qimmit qimuttut qassit nuunneqarusunnersut, akiuussuserneqarsimani aamma ID-normui, kiisalu qimmit qimuttut sumiitinniarneqarneri pillugit paasisutissanik minnerpaamik ilaqtinneqassallutik. Paasisutissat taakku nuna tamakkerlugu uumasunut nalunaarsuiffimmut ilanngunneqassapput kommunillu nuuffigisap Uumasunut Nakorsaaneqarfiup takusinnaassavai.

#### Imm. 3-mut

Aalajangersakkakut kommunalbestyrelsi piginnaatinneqarpoq nuussineq inerteqqutigissallugu, qimmit qimuttut ID-mik nalunaaqutserneqarsimangippata akiuussuserneqarsimangippataluunniit, imaluunniit nappaammik siaruartoqalernissaa nappaalasoqalernissaaluunniit aarlerinaateqarpat. Kommunalbestyrelsip aarlerinaat pillugu Uumasunut Nakorsaaneqarfiup nalilersuina piniarsinnaavaa.

#### Imm. 4-mut

Aalajangersagaq imm. 3-mik nangitseqqinneruvoq, tamatumani nappaatinik siamarterisoqariataarsinnaanera eqqarsaatigineqarpoq aammalu sumiiffinnut nappaalaffioreersunut nappaatilluunniit tuniluuffigisaannut qimminik qimuttunik nuussinissaq inerteqqutaavoq.

#### Imm. 5-imut

Aalajangersakkakut aalajangerneqarpoq kommunalbestyrelsip qimmit qimuttut illoqarfimmit nunaqarfimmilluunniit anisissinnaagaat imm. 1 aamma 2 naapertorlugit nuussineq kommunimut nalunaarutigeqqaarnagu pisimappat.

Qimmilli qimuttut kommunimit /illoqarfimmit/nunaqarfimmit nuuffiannut taamaallaat uterteqqinneqarsinnaapput tamanna uumasunik illersuiniarneq eqqarsaatigalugu illersorneqarsinnaasumik pisinnaappat. Taamatut isiginninniarnaq qimmit qimuttut angallanneqarnissaannut naleqqunnersuit pillugit, anngallannerat kiisalu apuuffissaanni tiguisussaqaarnersoq pillugit nalilersuiniarnermi.

Kommunalbestyrelsi aamma periarfissaqarpoq qimmeqatigiinnut tikeqqammertunut qimmiliviugallartumik pilersitsinissaminik. Qimmilivik taanna najukkami qimmilivinnit allanit illernernillu ungasianiissaaq immikkoorluni. Qimmiliviugallartoq qimmeqatigiinnik inissiiviugallartut isigineqassaaq qimmit inuttaata nuunnermut nalunaarut pillugu piumasaqaatit naammassinissaata tungaannut.

#### Imm. 6-imut

Kommunalbestyrelsip qimmit qimuttut akiuussutissamik kapoorneqarnerisa kapuuinissamik pilersaarutitut inatsisitigut pituttuisunut naapertuuttuunissaa qulakkeerinninnissaa pillugu aalajangersagaq, kommunalbestyrelsip kapuuinissamik pilersaarummik nakkutilliissasoq, tak. § 46, imm. 1, aamma § 23.

#### Imm. 7-imut

Aalajangersakkakut uumasunut nakorsaarfik piginnaatinneqarpoq qimuttunik qimmeqarfiit iluini qimminik qimuttunik nuussinermi qimuttunik qimmeqarfiunngitsukkut aqqusaaqqaarnissamik piumasaqaatitalimmi immikkut akuersissuteqartarsinnaanissaanik. Tunumiit kitaanut nuunneq Nuuk aqqusaaqqaarlugu tamanna pisariaqarsinnaavoq. Immikkut akuersissuteqarnissamut ilaatigut nuunnermut immikkut peqqutaasut, assartuinermi aqqutaasut, aqqusaarluni unikkallarnermi

immikkut inissiisinnaaneq qimmillu qimuttut assartorneranni aqqusaarlunilu unikkallarfianni passunnissaannut kiisalu assartuinermi angalanermi uumasunik illersuineq eqqarsaatigalugu illersorneqarsinnaanersoq apeqquataatinneqassapput.

## § 5

### Imm. 1-imut

Qimmip sumit pinngornera nalornissutigineqalerpat qimmeq kalaallit qimmerineraat qimuttoq qimuttuunngitsorluunniit piginnittup uppersartussaagaa aalajangersakkami aalajangerneqarpoq. Tamanna ilaatigut suliarineqarsinnaavoq uppersaatinik qimmit ID-mik nalunaaqutserneqarsimanerannik nunalu tamakkerlugu qimminut paasissutissanut nalunaarutiginnissimanermik tunngasunik takutitsinikkut pisinnaavoq, tak. § 2-mut imm. 2-mut nassuiaatini allaffissornermut periaatsimut suleriusissaq.

Kommunit nunaminertanik tunniussinermit qimmeqarnermullu allaffissorinikkut aqutsinermit akisussaasuummata piginnittup siullertut kommunimut najukkaminut uppersartussaavaa qimmeq kalaallit qimmerineraat qimuttoq. Piginnittup § 4, imm. 1, naapertorlugu nuunneq nalunaarutigisimappagu tamanna qimmillu pillugit nunatsinni paasissutissaasivik uppersaatitut atorsinnaapput. Qimmip suminngaanneerana nalornissutigineqarpat kommunip piginnittulluunniit Uumasunut Nakorsaaneqarfik qullersatut aalajangiisinnaasutut inissisimasoq suliamut ilanngutissavaat taamaalillunilu inaarutaasumik naliliisinnaallunilu aalajangiisinnaasoq, tak. imm. 4 ataaniittoq.

### Imm. 2-mut

Aalajangersakkami qularnaarneqarpoq qimmeq kalaallit qimmerineraat qimuttoq pillugu aalajangiinerneq sivisussappat qimminit allanit qimuttunit immikkoortinneqarnissaa suliap nalilersorneqarnerata nalaani. Taamatut qimminit allanit immikkoortitsineq allanut qimagutsillugit imaluunniit akuutissat atorlugit pisinnaavoq. Mattusimatitsinermit kissaatigineqanngitsumik nuliutitsinissap nappaatinillu siammarterinissap pitsaaliorneqarnissaanik siunertaqarpoq.

### Imm. 3-mut

Uppersaasersuinermit atatillugu uppersaatit pillugit aalajangersakkakut Naalackersuisut malittarisassiorsinnaalissapput. Ilaatigut tassaasinnaapput qimminik qimuttunik misiligutinik qularnaannerusunik ineriartortitsinikkut, assersuutigalugu DNA-mik misiligutit. Misiligutinik taakkuninnga atuineq piginnittumut pisortanulluunniit akisusinnaavoq, taamaammat taama ittunik uppersaatinik atuinissamut malittarisassiortoqartariaqarpoq.

### Imm. 4-mut

Aalajangersakkakut Uumasunut Nakorsaaneqarfik pisinnaatinneqarpoq qimmip kalaallit qimmerineraat qimuttoq qimmerinnginneraluunniit nalornissutigineqarpat inaarutaasumik

aalajangiinissamut. Aalajangersakkami pingaartinneqarlunilu pisariaqartinneqarpoq aalajangiinerit kommuni pineqartoq kalaallilu qimmiinik qimuttunik immikkut ilisimasallit oqartussat isumasioqatigalugit inaarutaasumik aalajangiisoqartarnissaa. Uumasunut nakorsaaneqarfiup aalajangerpagu qimmeq kalaallit qimmerinngikkaat qimuttoq toqunneqassaaq piaartumik illersorneqarsinnaasumik anninneqarsinnaanngippat, tassa peqqissuulluni illersorneqarsinnaasumik atugaqartinneqarluni assartorneqarpat tikippallu inuttassaqarpat tiguisinnaasumik.

Imm. 5-imut

Aalajangersakkakkut qimmit immikkoortinnerinut akuutissallu atorlugit piaqqiorsinnaajunnaarsinneqarnerannut allatulluunniit iliuuseqarnernut tunngasunik aningaasartuutit kia akilissanerai pillugit Naalakkersuisut ersarinnerusunik malittarisassiorsinnaatinneqarput.

## § 6

Imm. 1-imut

Aalajangersakkakkut Uumasunut Nakorsaaneqarfik pisinnaatinneqarpoq qimminik qimuttoqarfimmut unioqqutitsilluni eqqutanut annissanilluunniit piaartumik toqutsinissaq isumagissallugu imaluunniit qimuttoqarfimmit annissinnaassallugit. Uumasunut Nakorsaaneqarfiup oqartussat allat, matumani kommunalbestyrelsip qimminik tigusiartartui qimminillu nakkutilliisui suliaassartaviinik suliarinninnissamut pisinnaatissinnaavai tamanna qimmip annianninnissaa tunillaassuinnnginnissaaluunniit isiginiarneqarpat imaluunniit pisariaqanngitsunik aningaasartuuteqarnissaq isiginiarneqarpat.

Aalajangersakkami naggammi kingullermi toqutsinermi utertitsinermiluunniit aningaasartuutit piginnittup nammineq akilissagai peqquneqarpoq. Aningaasartuutit tamatumunnga attuumassuteqartut tassaasinnaapput toqutsineq tamatumalu kingorna assersuutigalugu nappaatinik siaruarternissaq pitsaaliorniarlugu qimmip timaanik imminut illersorsinnaasumik suujunnaarsitsineq. Anisitsinermut atatillugu inissiigallarnej, nerukkaatissat, assartuineq il.il. aningaasartuutinut ilaatinneqarsinnaapput.

## § 7

Qimuttunik qimmeqarsinnaanermi ikinnerpaanik qassinik ukioqartoqarnissaa aalajangersakkakkut aalajangerneqarpoq. Qimuttunik qimmeqarniaraanni aalajangersimasumik ukioqartariaqarpoq misilittagaqartariaqarlunilu, taamaammat 18-inik ukioqarnissaq killiliunneqarpoq. Taamaammat nuna tamakkerlugu uumasunut nalunaarsuiffimmut piginnittutut nalunaarutigineqarsinnaavoq aatsaat 18-iliisimagaanni, aamma piginnittutut nalunaarsukkat akisussaallutillu pineqaatissinneqarsinnaapput, tassa angajoqqaat oqartussaannngitsumulluunniit angajoqqaatut nakkutilliisoq qimuttunik qimmilimmut.

## § 8

### Imm. 1-imut

Kinaluunniit qimuttunik qimmilik qimmiminik isumaginnilluartussaataavoq nerukkartarlugit immittarlugillu pissusaat peqqissusaallu isiginiarlugit pisariaqartitaat passunneqartarneranni ilisimatuussutsikkullu misilittakkat naapertorlugit Uumasut illersornissaat pillugu Inatsisartut inatsisaat naapertorlugu paarisussaagaat aalajangersakkami aalajangerneqarpoq.

Qimmit qimuttut ukiuni 100-ni qimuttunik qimmeqarnermik Kalaallit Nunaanni misilittakkat aallaavigiinnarnagit aammali ilisimatuussutsikkut misilittakkat uppersarnerqartut nutaallu naapertorlugit aamma qimuttunik qimminik paarsinissaq matumuuna anguniarneqarpoq.

Nalilersuinermi taamaammat kalaallit ileqqutoqaat ilanngunneqassapput, aammali piffissami nutaanerusumi uumasut uumalluarnissaannik isiginninniarluni ilisimatusarnermut tunngasut isiginiarneqartariaqarput.

### Imm. 2-mut

Imm. 1-imi tunngaviusumik pisussaaffiup saniatigut qimmeq qimuttoq aalajangersakkami pisassai allaqqasut pisassavai, tassami oqaatigineqassaaq aput imermut sanilliunneqarsinnaammat taamaattumillu akuerisaalluni.

### Nr. 1-imut

Qimmit qimuttut panertumik nallavissaqartinneqassapput kiisalu anorimut, silamut seqinermullu assiaquserneqassallutik, "Panertumik nallavissaqartinneqassapput"-mik oqarnermi qimmit qimuttut ukiukkut assersuutigalugu sikumiitinneqarsinnaanissaannik periarfissaq mattunneqanngilaq. Panertumik nallavissaq tassaassaaq nallavik aalaakkaasoq imertaqarani isugutannaniluunniit, isugutak tassaasinnaammat pisuni qimmeq qimuttoq sikumiilluni upernaakkut siku aalluni aagussaasinnaammat. Qimmeq qimuttoq aamma silamut, anorimut seqinermullu alanngissinnaassaaq, assersuutigalugu qimmeq nammineq assaalluni, ujaqqap tunuanut, ungaluukkanut assigisaanilluunniit imaluunniit qilaajusamiissinnaalluni qimmilluunniit inaaniiissinnaalluni. Taamaaliorsinnaanera ukioq naallugu ullut tamaasa pisinnaanissaa qulakkeerneqassaaq.

### Nr. 2-mut

Qimmit qimuttut ukioq kaajallallugu ikinnerpaamik ullormut ataasiarluni takusarneqartassapput. Taamaaliornikkut qimmit qimuttut eqqortumik paarineqarnissaat qulakkeerniarneqarpoq, qimmilivimmi pissutsit ajunngitsuunissaannik, akornutissaqanngitsumik imeqartinneqarnissaannik, kalunnerit ilannginnissaannik qimmillu pituussaanninnissaannik, ajoqusinnginnissaannik napparsimalinnginnissaannillu qulakkeerinnaalluni.

### Nr. 3-mut

Qimmit qimuttut ukioq kaajallallugu ikinnerpaamik ullormut ataasiarlutik nerukkarneqartassapput.

Aalajangersakkami oqaasertarineqartut atorneqarput qimmit qimuttut ulloq ataaseq nerinngikkallartarsinnaanerit pillugu ileqqoq ataqqiniarlugu. Nerukkaaneq imm. 1-imi aalajangersakkamut ataneqartillugu isigineqassaaq qimmillu qimuttup timaatigut peqqissusaatigullu pisariaqartitaanut naapertuutissalluni.

Nr. 4-mut

Qimmit qimuttut ukioq kaajallallugu ipiitsumik imeqarnissaat aputeqarnissaalluunniit isumagineqartassaaq. Ukiup ilaani issitsinnagu qimmit qimuttut ulloq naallugu imermik imminneqassapput, soorlu imerfilerlugit assigisaanilluunniit. Imeq ipiitsuusaaq, tassa imernejarsinnaassaaq. Taamaaliornikkut qimmit qimuttut aasaanerani qaammatini panernerni panertooriartunnginnissaat anguniarneqarpoq.

Ukiukkut aamma qimmit qimuttut immittarnissaat qulakkeerneqassaaq. Qimmiliviup eqqaani naammattumik apisimangippat imaluunniit eqqiluitsumik aputeqanngippat qimmeq qimuttoq nerukkarneqarnermini imminneqassaaq. Naak qimmeq qimuttoq sulinngikkaluartoq sumiiffiit ilaanni qimmip qimuttup imermik pisariaqartitai nerisassaasigut kininneqarsimasukkut, puisip neqaatigut aalisakkalluunniit nerpiatigut pissarsiaritinneqartarnera ileqquugaluartoq qimmit qimuttut timaat, pissusilersuutaat peqqissusiillu eqqarsaatigalugit piginnittup nerisillugillu imertittarnissaat qulakkeertussaavai, tak. § 8, imm. 1.

Nr. 5-imut

Qimmit qimuttut ataatsimoortinneqassapput qimmit qimuttut minnerpaamik marluugaangata. Qimmit qimuttut inuussutissarsiornermi imaluunniit uumasuutaannartut allatulluunniit atorneqaraluarpata tamanna atuuppoq. Qimmit qimuttut ataatsimoortuupput, aalajangersagarlu imm. 1-imut ataneqartinneqassaaq, taassumalu kingorna qimmit qimuttut pissusaat naapertorlugit paarineqassallutik.

Oqaatsini "sapinngisamik" malitsigaa pissutsit ilaanni qimmit marluutillugit amerlanerutillugilluunniit ataatsimoortissinnaannginnerinut. Tamanna tassaasinnaavoq piniartoq utoqqaq soraarninngorpat qimminilu qimuttoq nuannarisani qimmeriinnarusullugu, utoqqaaninili peqqutigalugu ataasiinnarmik qimmimik qimuttumik isumaginissinnaalluni.

Aalajangersaakkami qimmeq qimuttoq ilaqutariit qimmiattut qimmerineqarsinnaalerpoq, ilaqutariinni illup iluaniissinnaalluni imaluunniit ilaqutariit najugaata eqqaanissinnaalluni ilaqutariinnut ilaalluni peqataalersinnaalluni.

Imm. 3-mut

Aalajangersakkami qimmit ilummisut milutsitsisullu qimmit inaannik peqartinneqassasut arnaviaq piaqqallu tassani inissaqartinneqassallutik. Aalajangersagaq imm. 1-imut ataneqartinneqassaaq, taamaalilluni qimmit qimuttut sananeqaatimikkut pissusimikkullu pisariaqartitaat naapertorlugit



paarineqassallutik kiisalu ilisimatusarnermik suliaqarnermi suleriaatsit akuerisaasut naapertorlugit. Arnavissat ilummisut milutsitsisullu kiisalu qimmiaqqat avataanit sunnertiasuupput eqqissiviilliornermik eqqugaasarlutik, matumanilu ilaatigut qimminit qimuttunit allanit avatangiisinillu sunnertittarlutik. Taamaalillutik pisariaqaleraangat tunuarternissaminnut ungavarternissaminnillu pisariaqartitsisarput. Taakku saniatigut qimmiaqqat inersimasunut sanilliullugit nappaatinik eqqugaagajunnerusarput qimminit qimuttunit inersimasunit sannginnerullutik taamaammallu qimmit inaat illersuinerusarluni.

Qimmit inaat ima angitigissapput iluseqarlutillu qimmeq sarliaq qimmit inaata iluani akornuteqanngitsumik illuanut saassinnaassalluni qimmiaqqanullu inissaqassalluni. Qimmit inaat aamma ima aaqqinneqarsimassapput anorimut, sialummut apummullu illersuutaasinnaassallutik.

Imm. 4-mut

Qimmit qimuttut piaraat sivikinnerpaamik sapaatit akunneri arfineq-pingasunik utoqqaassuseqalernissaata tungaannut arnamiitinneqartassasut aalajangersakkami aalajangerneqarpoq. Aalajangersagaq imm. 1-imut ataneqartinneqassaaq, taamaalilluni qimmit qimuttut sananeqaatimigut pissusimigullu pisariaqartitai naapertorlugit paarineqassallutik kiisalu ilisimatusarnermik suliaqarnermi suleriaatsit akuerisaasut naapertorlugit. Qimuttut piaraat inunnu qimminullu akuunissartik pisariaqartippaat arnaminillu perorsarneqartariaqarlutik taamaalillutillu inersimasunngorunik uumasooqataalluarniassammata. Qimmiaqqat arnaanit peersiaarpallaarneqarpata nappaateqalernissamut naapertuutinnngitsumillu pissuseqalernissaannut aarlerinaateqarnerulersarput. Qimmiaqqat tunineqaraluarpata tunniunneqaraluarpataluunniit piumasagaat atuuppoq, imaluunniit qimmiaqqat qimmilivimmut allamut assigisaanulluunniit nuunneqaannaraluarpata.

Qimmiaqqat arfineq-pingasut inorlugit utoqqaassusillit arfineq-pingasunik qaammateqalernissaasa tungaannut arnamiissinnaasariaqarput ajornaquteqanngitsumik. Arnaalli pisariaqartitsinera malillugu piaqqaminit ungavartersinnaasassaaq. Tamanna assersuutigalugu pisinnaavoq qimmit inaata qaanut innakarluni. Arnaat napparsimalerpat toquppalluunniit qimmiaqqallu suli sapaatit akunneri arfinilinnik utoqqaatigalutik arfineq-pingasulli suli angusimanagit qimmiaqqat arnaqaratik timikkut tarnikkullu nukittunersut kiisalu uumaannarsinnaaneri nalilersorniarlugit Uumasunut Nakorsaaneqarfik piginnittumik apersuissaaq. Aamma piginnittup immikkut akisussaaffini ilisimassavaa, tassa qimmiaqqat peqqissuutinnissaat piginnittup isumagisussaammagu. Qimmiaqqat timimikkut tarnikkullu pisariaqartitaat naapertorlugit paarineqarsinnaanngitsutut nalilernerqarpata toqunneqartariaqarput. Naliliinermi qimmiaqqat qanoq utoqqaatigineri isiginiarneqassapput kiisalu arnaminnit milunnatik allanik nerisaqarsinnaanersut ilanngullugit eqqarsaatigalugit.

## § 9

Imm. 1-imut

Qimmit qimuttut sisamanik qaammateqalereersimasut kalunnernik pitussimassapput, mattusimaneqarlutik, ungaluukkani mattusimaneqarlutik imaluunniit pituutaqartinneqassasut pillugit aalajangersakkami piginnittoq pisussaatinneqarpoq. Qimmit qimuttut ataatsimoorlutik ingerlaqatigiittarnissaat imaluunniit nappaatinik siaruarternissaat kiisalu kissaatigineqanngitsumik nulusarnissaat aalajangersakkakkut pinngitsoortinniarneqarpoq. Aalajangersakkakkut aamma qimmit qimuttut sumi tamaani angalaannarnissaat taamalu eqqiluisaarnikkut tukatsitsillutik assersuutigalugu eqqakkanik annanillu siaruarternissaat pinngitsoortinniarneqarpoq.

Aalajangersakkami aamma isiginiarneqarpoq qimmit qimuttut inunnik uumasunillu ajoqusiisinaanerat inunnit nalinginnaasumik ernummatigineqartarmat. Tamanna ilaatigut kalaallit qimmiata qimuttup qaniginerpaasaata amaruuneranik pissuteqarpoq taamaattumillu kamassarissinnaasarluni. Pingaarnertut qimmitut sulisussatut atorneqartarpoq aamma qimmitut nujuitsutut uumasuutaanngilaq, taamaattumik qimmeq qimuttoq mianersuunneqartariaqarpoq ataqqineqarlunilu aamma qimmimik piginnittoq paasiniaaffigeqqaarnagu qimmeq qanillineqassanngilaq. Qimmit qimuttut siusinnerusukkut arfinilinnik qaammateqaleraangata pitunneqartarput malittarisassalli kommuninit noqqqaassuteqartoqareersoq 2010-mi inatsisitigut allannguisoqarpat qaammatinut sisamanut sakkortusineqarpoq, kommuninit oqaatigineqarpoq qimmit qimuttut pituussaaqqaneranni qimmeqarfinni ajornartorsiuteqartoqartarsimasoq oqaatigineqarpoq.

Oqaaseq 'mattusimanissaat' taamaallaat tassaatinneqarpoq qimmit qimuttut illumiitinnissaat assersuutigalugu piginnittup illuani.

Imm. 2-mut

Qimmiliviit ungalukkat ilusissaat angissusissaallu pillugit aalajangersakkami piumasaqaatinik saqqummiisoqarpoq, taamaalilluni qimmit qimuttut aalanissaminnut periarfissaqarnissaat qulakkeerneqarluni. Ungalusamik qimmiliviit ilusaat sananerinilu atortut qimminut qimuttunut tassaniittunut pisariaqanngitsumik iluaalliuutaanatillu ajoqusiisassanngillat. Ungalusamik qimmilivik qajannaatsumik sananeqarsimassaaq, taamaalilluni qimmit qimuttut iluaniitiinnarsinnaaneqarniassammata.

Imm. 3-mut

Imm. 1-imi aalajangersakkami immikkut akuerineqarnissamik immikkoortuuvoq, taamaalilluni qimmit qimuttut piginnittumit nakkutigineqarlutik aqunneqarlutillu pituutaqaratik angalasinnaaniassammata. Aalajangersagaq piginnittoq qimmini qimuttut ilagalugit illoqarfiup nunaqarfiulluunniit avataani sanaartorfiunngitsumi pisuttuarpat taamaallaat atuuppoq. Illoqarfiit nunaqarfiillu sumiiffimmit sumiiffimmut nikerarsinnaasarput taamaammallu sumiiffinnik sanaartorfiunngitsutut aamma taaneqarlutik. Tassani pineqarput sumiiffiit sanaartorfiunngitsut inunnilluunniit ataatsimoorfiusinnaasut. Qimmip qimuttup pituutaqarani angalanera inunnit uumasunullu allanut akornusersuinnginnissaa pingaaruteqarpoq. Piginnittoq illoqarfiup nunaqarfiulluunniit eqqaanut piinnartoq qimmimi qimuttut pituutaqarnissaanik qularnaarissaaq.

Aamma piginnittup qimmini qimuttut nakkutigippagit aalajangersagaq taamaallaat atuuppoq aamma piginnittup qimmini qimuttut taamaallaat naalakkerlugit aqussinnaappagit. Tassungalu ilaavoq piginnittup qimmini qimuttoq tarrinnagu nakkutigiinnaavissinnaagaa qimmerlu qimuttoq naalakkersorlugu qammarsinnaallugulu, kiisalu naalakkiinermini qimmeq qimuttoq qimaatissanagu inunnut allanukartinnagu, illunulluunniit allanut. Piginnittup taakku saperunigit qimmit qimuttut ingerlaannaq pitunneqassapput. Qimmeq qimuttoq aqunneqarsinnaajunnaarluni pituutaqarani arlaleriarluni qimaasartoq inunnut, uumasunut sanaartukkanullu allanut eqqaaniittunut akornusersuisoq naalakkersorneqarsinnaasutut isigineqarsinnaanngilaq, taamaammallu sumunnaraluaangalluunniit pituutaqartinneqartuaannartariaqarluni.

#### Imm. 4-mut

Aalajangersagaq imm. 1-imit avaqqutaarisinnaanermik imaqarpoq, tassanilu qimmit qimuttut piaraat sisamat arfinillillu akornanni qaammatillit qimmilivimmi pitussimatinneqaratik angalaarsinnaanerat qulakkeerneqarluni tamannalu piginnittup nakkutilliineratigut pisassalluni. Tamatuma nassataanit piginnittoq qimmilivimmiisaaq qimmiminik qimuttunik nakkutilliilluni, kiisalu qimmiaqqat qimmillu qimuttut allat qimmilivimmiittut paalernissaat, qimaanissaat, inunnut allanut uumasunulluunniit imaluunniit illuutinut ajoqutaalernissaat pitsaaliortussaallugu. Aalajangersakkakkut piginnittoq pisinnaatinneqarpoq qimmiaqqat sisamat arfinillillu akornanni qaammatillit qimminut inunnullu allanut akuulersinnaanissaannut sulissutigisaqarnissaanik periarfissiivoq, taamaalillutik pitsaasumik inersimasunngornissaat anguneqarsinnaassalluni.

#### Imm. 5-imut

Aalajangersakkakkut periarfissuusoqarpoq qimmit qimuttut qaammatinit 6-inik utoqqaanerit qimussereernerup, qimmiliviup aaqqissuunnerani qimmeqatigiinniluunniit qimminut allanut akulerusimatinniarneqarneranni qimmilivimmi sivikitsumik pituussaaqqatinneqarsinnaanerat. Tamanna aamma atuuppoq tamatuma piginnittumit nakkutigineqaannaillutik pisinnaammata.

## § 10

#### Imm. 1-imut

Qimmit qimuttut qimmilivimmi pitussimatillutik aalasinnaanerannut piumasagaatit aalajangersakkami nassuiarneqarput. Qimmit qimuttut pitutat minnerpaamik 3 meterit tikillugit aalaffissaqartinneqassapput. Kalunnerit atorneqartillugit qaarsumut qissarutilerlugit ikkunneqarsimassapput taamaalillunilu qimmit kaajallallutik aalasinnaassallutik. Pisuni taakkunani qimmip qimuttup kalunneri minnerpaamik 3 meteriussapput. Angalanermi kalunnerit atorneqarpara marlunnit aalajangersimasunik qimmillu siuleriillutik pitunneqartarlutik taava qimmit aalasinnaanerat tumaasatut isikkoqassaaq.

Tukimut qanoq annertutigissanersoq kalunnerit takisuut qanoq qasukkaallatsigisinnaanerat apeqqutaassaaq. Taamaassappat qimmit ataasiakkaat kalunnerisa takissusaat assigiissanngillat, qimmillu kalunnerni tassani sumi pitussimanerat apeqqutaassalluni, tassami kalunnerni tassani

takisuuni qiterparaluttuinnartillugu kalunnerit qasunnerulersarput isuanit marlunnit takinerusinnaallutik. Ataavartunik angalanermilu angalanermi kalunnerit atorneqassapput. Ataavartunik kalunnernik atuinermi (qimmilivimmi qaarsunut ikkusimasut) kalunnerit 3 meterit atorneqassapput. Kalunnerit angalanermi atorneqarpata qimmit akornuteqanngitsumik aalasinnaallutillu nallarsinnaassapput qimminillu allanit ingalassimasinnaassallutik. Imm. 5-imut nassuiaatit takukkit.

Aasaagaluarpak ukiuugaluarpalluunniit piumasaqaat attatiinnarneqarpoq. Qimmit qimuttut minnerpaamik 3 meterinik tamatigut aalasinnaanerat qulakkeerniarlugu qanoq apitiginera isiginiarlugu kalunnerit ilaatigut nalimmassarneqartariaqassapput. Piumasaqaat taamaammat qimmit qimuttut aalaffigisinnaasaannik isiginninneruvoq, taamaalillunilu pisut ilaanni 3 meterinik takinerusinnaasarluni.

#### Imm. 2-mut

Qimmit qimuttut kalunnerit sunik sananeqarsimanerannik piumasaqaatinik aalajangersakkami nassuiarneqarput. Aalajangersagaq § 11-mi qimmit qungasequtaannut piumasaqaatinut ataneqartinneqassaaq. Kalunnerit sannaasa siunertamut naapertuuttuunissaannik oqarnermi tassaatinneqarpoq kalunnerit nungujaatsuussasut nutsunneqaraluarunik qimmilluunniit qimuttut avatangiisaannik sunnerneqaraluarunik kittoraruminaallutik. Qimmit qimuttut kalunnerit mangiarlugit kipisinnaassanngilaat, kalunnerillu kittorarsinnaanatik allatulluunniit qasukkarsinnaassanngillat. Kalunnerit saviminermik manngersumik sivisuumillu atasinnaasunik sanaajussapput. Pituutat aalisaatineersut, umiatsiat pituutaanneersut, allunaasat allalluunniit aseroriartortartut qimminut qimuttunut pituutarissallugit tulluurtuunngillat. Aamma kalunnerit sannaat qimminut qimuttunut ajoqusiisinnaanatik iluaallioortitsissanngillat, soorlu assersuutigalugu aalisaatit allalluunniit saattuaqqat, ipittut imaluunniit teqeqqullit taama ittartut.

Aalajangersakkami kalunnerit pituffiit ikinnerpaamik ataatsimik ajunngitsunik qipisoqassasut aalajangerneqarpoq. Taamaaliornikkut qulakkeerniarneqassaaq qimmit qimuttoq akornutitaqanngitsumik qimmilimmi aalasinnaanissaa kalunnernik aalasinnaanera millilluni ilattoorani. Qulaani taaneqartut qulakkeerniarlugit kalunnerit arlalinnik ajunngitsunik qipisoqarnissaat iluarnerussaaq.

#### Imm. 3-mut

Qimmit marluutillugit pituttarineqarniarpata aappaata pituutaa minnerpaamik 1 meterimik takinerussasooq aalajangersakkami aalajangerneqarpoq. Tassuunakkut qulakkeerneqassaaq qimmit imminnut naammattumik ungasillilaarnissaat, assersuutigalugu nerukkaanermut atatillugu. Qimmilli sanngiinnerup eqqissilluni qasuersaarsinnaanissaa immikkut qularnaarniarneqarpoq, taamaalilluni qimmip anneruniartup qimmimit sanngiinnermit pituutaa naannerutinneqassalluni.

#### Imm. 4-mut

Aalajangersakkami aalajangiunneqarpoq qimmit qimuttut imminnut angusinnaanatik akunneqassasut aamma qimmeqatigiinni qimmilivimmiit qimmilivimmut. Taamaaliornikkut qimmit qimuttut akuliusimanerminnik ersersitsisarput namminnerlu immikkut sumiiffeqartinneqarlutik. Ungasillinerisigut aamma kalunnerisa ilarutinnginnissaat qulakkeerneqassaaq.

#### Imm. 5-imut

Aalajangersakkami isiginiarneqarpoq qimmit qimuttut kalunnernik pituttaagaangamik aalajangersimasumik qimmilivinnisut angalanerminni pituttaasariaqannginneri. Aalajangersakkami kalunnerit nassartakkat pillugit piumasaqaammik aalajangersaasoqarpoq, kalunnerit angalanermi atorpeqartartut qimmip qimuttup qimussernermi, soorlu piniariarnermi takornarianillu qimussiussinermi, akornuteqanngitsumik aalasinnaanissaanut qulakkeerinnittuussapput. Pituuttat qimmit qimuttut uninnganerminni tummaatarisassa atorneqartarnerat ileqquuvoq. Taamatut pitussinermi qimmit qimuttut akunnerminni inissisimaffitik patajaallisittarpaat paggillutik ajoquseratik imaluunniit pituuttaminnik ilarunnatik.

### § 11

#### Imm. 1-imut

Aalajangersakkami qimmit qimuttut qungasequtaasa atornissaannut piumasaqaatit aalajangersarneqarput. Taamaalilluni affarmik tamakkiisumilluunniit nigavillugit qungasequtit, qungasequtit innaallagissamoortut qungasequtilluunniit allat qimmimut anniaataasinnaasut iluaalliortitsisinnaasulluunniit inerteqqutaapput. Assersuutigalugu aalisaammit, umiatsiat pituutaannit allamilluunniit qungasequtissatut tulluutinngitsut mangiaasut taamaattumillu atornissaannut inerteqqutaasut.

Qimmip qimuttup alliarturnerani qungasequta aamma nalimmassarneqanngikkuni taarserneqartassaaq.

#### Imm. 2-mut

Aalajangersakkami qungasequtip silissusissaa aalajangerneqarpoq. Qungasequtip minnerpaamik 2 cm-utinneratigut qularnaarniarneqarpoq qungasequt qimmimit qimuttumit mangiarneqannginniassammat kilernernik ajoqusernerrillu kinguneqarsinnaasut pitsaaliorglutik.

### § 12

#### Imm. 1 aamma 2

Qimmit qimuttut pituussaartut piginnittuata piaartumik tiguniarnissai akisussaaffigigai aalajangersakkami aalajangersarneqarpoq. Tamanna uumasunik illersuisumik pissaq, tak. § 8, imm.1. Aalajangersakkami ingammik qimmip piginnittuminit qimaasimanissaa aammalu piginnitsiminit nakkutigineqarani sanaatorfimmi pangalittaqattaarnissaa eqqarsaatigineqarpoq. Qimmimik qimuttumik piginnittup qimmiminik piaartumik tiguisinnaanngikkuni

kommunalbestyrelsimi qimminik tigusiaasartumit piginnittoq ikiortissarsiuusaaq. Uumasut tiguneqanngitsoorneqarneranni imm. 7-imi nassuiaatinut innersuussisoqarpoq.

Imm. 3-mut

Qimmit qimuttut qaammatinik sisamanik utoqqaanerit kommunalbestyrelsinit tiguneqartut kommunimit sivikinnerpaamik nal. akunnerni 72-imi inuttassarsiuunneqassapput. Qimmip qimuttup inuttassarsiuunneqarnera aamma sivitsorniarlugu kommuni aalajangersinnaavoq. Qimmit qimuttut qaammatinik sisamanik utoqqaanerit kisimik inuttassarsiuunneqartarnerisa peqqutigaa qimmit qimuttut qaammatinik sisamanik nukarliit pituttaasanngimmata qimmiliviullu avataaniissinnaallutik. Inuttassarsiuussineq kommunip nittartagaatigut imaluunniit kommunip allaffiani allagarsiinikkut assigisaanilluunniit pisinnaavoq. Inuttassarsiuussineq tamanit takuneqarsinnaassaaq taamaalilluni kommunimi qimuttunik qimminik piginnittut inuttassarsiuussinermi periutsit pillugit ilisimatinneqassallutik, taamaaliornermi qimminik qimuttunik piginnittut tamatumunnga tunngasunik paasisaqarsinnaaniassammata.

Qimmit qimuttut pituussaarsimasut allanut navianartorsiortitsisut taarsiiffigineqanngitsumik ingerlaannaq toqunneqarsinnaapput.

Inatsisartut Ombudsmandia suliassami 2007-imeersumi qimminik pituussaaqqasunik taarsiiviginertaqanngitsumik toqutsinerit pillugit malittarisassat nassuiarsimavai taavalu qimmit pituussaarsimasut allanut navianaateqartut taamaallaat taarsiinertaqanngitsumik toqunneqarsinnaasut aalajangerlugu. Inatsit tunngaviusumi § 73 naapertorlugu inuit piginnittussaataanerannik akuliuttoqarsimappat taarsiisussaataaneq aallaavittut atuuppoq. Taannali aallaavik atuutsinnginneqarsinnaavoq navianartumut pitsaaliuisoqarpat. Tamanna tunngavigalugu Ombudsmandip paasinninnera unaavoq qimmit angalaannartut qasuttumillu pissuseqartut qimmilluunniit ataatsimoortut angalaannartut navianartorsiortitsisutut nalilerneqarpata taarsiinertaqanngitsumik toqunneqarsinnaasut. Qimmit eqqissisimallutik pisut imaaliallaannaq toqunneqarsinnaanngillat. Qimmeq qimuttoq pituussaarsimappat eqqissillunilu angalaarluni piginnittuanut taarsiissutitaqanngitsumik toqunneqarsinnaanngilaq.

Ombudsmandip aalajangiinera qimminik qimuttunik qimmeqarnek aamma qinneqarnek qitsuuteqarnerlu pillugit Inatsisartut inatsisaannik 2009-imi allannguinermik kinguneqarpoq, tak. qimminik qimuttunik qimmeqarnek aamma qimmeqarnek qitsuuteqarnerlu pillugit Inatsisartut inatsisaannik nr. 28. 18. november 2009-meersumik allanngineq:

§ 9, imm. 3, oqaaseqatigiit siulliit:

“Qimmit tavaannartut, allanik piviusumik navianartorsiortitsisut, piginnittumut taarsiiffiginninnissamut akisussaaffilerneqanngitsumik toqunneqarsinnaapput.”

§ 12, imm. 2-mi aalajangersagaq isumannaatsumik inuanut utertinneqarnissaa siunertaralugu qimminik tigooqqaanermut ujaasinermullu tunngavoq, tak. § 9, imm. 1-imut nassuiaatit, aamma qimmit nunaqarfimmi illoqarfimmiluunniit avatangiisiminnut ajoqutaaffigisinnaasaminni innarliiffigisinnaasaminnilu tarfinnginnissaat qulakkeerseqassaaq. Aalajangersagaq pisunut piginnittup qimmini qimuttut § 8, imm. 1 aamma § 9, imm. 1 malinnagit isumaginninngiffisaanut tunngavoq, taamaattumik qimmit angalaannartarput tamatumalu saniatigut piginnittoq kommunalbestyrelsimit nal. ak. 72-it angullugit, sivisunerusumilluunniit, kinaassuserniarsimagaluarlugu attaveqarfiginiaraluarlugulu ilutsinngitsoortuni, tamatumani qimmeq qimuttoq tamanut ujarneqarsimassaaq. Taamatut pisumi piginnittoq aallarsimasutut imaluunniit nuussimasutut qimmini qimuttut piginnittuerussimasutut imaluunniit nassaatut assersuunneqarsinnaavoq, taamaattumik kommunalbestyrelse qimmeq qimuttoq inummut allamut piginnittutut piukkunnartumut allatut nalunaarsorneqarnissaa aalajangersinnaavaa, tamannali ajornarpat qimmeq qimuttoq piginnittumut taarsiinertaqanngitsumik toqunneqassaaq. Taarsiinertaqanngitsumik toqutsineq taamaalilluni piginnittup qimmiminut qimuttunut mianersuaalliorsimanera piaarisimaneraluunniit tunngavigineqarsinnaavoq.

#### Imm. 4-mut

Aalajangersakkami qimmip qimuttup inuttassarsiuunnerani tiguniarneqarneranut, tiguneqarnerani nerisaqartinneranut uninngatinneranullu aningaasartuutaasut piginnittumut kommunalbestyrelsip akiligassannngortissinnaagaa aalajangerneqarpoq. Akiliut aningaasartuutivinnut taamaallaat tunngavoq taakkunanngalu akisunerussanani. Taamaattorli kommunalbestyrelsip annikitsumik akiliisitsinissamut minnerpaaffissaanik aningaasartuutaasunillu ikinnernik aalajangersaanissaa ajornanngilaq. Aningaasat taakku piginnittunut paarsinnginnerannut, qimmini qimuttut eqqortumik isumannaarinnittanngitsunut, pitsaaliuinerit isigineqarsinnaapput.

Oqaatsimi 'aningaasartuutitut atorineqartunut' tunngatinneqartut tassaapput aningaasartuutit kommunip qimmimik qimuttumik tigusiniarnermini uninngatitsinerminilu aamma inuttassarsiuussinermi aningaasartuutaatai uppersarnerneqarsinnaasut. Allaffissornermut, qimmit qimuttut tiguniarnerinut nakkutiginerinullu akunnerit atorineqartut, nerukkaatissanut ilaatigullu pisariaqartinneqartunik aaqqiinerit qimmit qimuttut kommunimit tigummineqarneranni pisunut, matumanilu pisariaqartinneqartumik nakkutiginerannut imaluunniit uumasut nakorsaannit assigisaannilluunniit passussinernut atatillugu aningaasartuutit.

Aalajangersagaq pinngitsoorani tamatigut malinneqartariaqanngilaq. Taamaammat kommunalbestyrelsi akiliisitsinierani aalajangersinnaavoq. Akiliisitsinissamik atuineq (akiliisitsinnginnissarlunniit) ingerlatsinermi malittarisassat nalinginnaasut atuuttut malinneqassapput kiisalu suliamut naapertuuttumik, assigiisitsinissamik pissutsinullu naapertuuttumik periaatsit malinneqassallutik.

#### Imm. 5-imut

Qimmit qimuttut tiguneqartut kommunalbestyrelsip uninngatikkallarsinnaavai piginnittup imm. 3-mi taaneqartut akiliutissat akilernissaata tungaanut. Aalajangersakkakut kommunalbestyrelsip akiliutigineqartut ilumoortumik tiginissaat qularnaarneqassaaq, qimmimik qimuttumik piginnittup tigusereernermi kingorna akiliinngitsoornissaa piniarlugu. Aalajangersagaq tamatigut pinngitsoorani malinneqartariaqanngilaq, aamma kingorna akilerneqartussanngorlugu kommunalbestyrelsi qimmeq qimuttoq tunniunniarlugu aalajangersinnaavoq. Aalajangersakkamik atuinermi atuinnginnerluunniit, soorlu imm. 3-misut, ingerlatsinermi malittarisassat nalinginnaasut atuuttut malinneqassapput kiisalu suliamut naapertuuttumik, assigiisitsinissamik pissutsinullu naapertuuttumik periaatsit malinneqassallutik.

#### Imm. 6-imut

Aalajangersakkami piginnittoq akiliiumanngippat kommunimi pisortanut akiitsunik akiliisitsiniartarneq pillugu malittarisassat nalinginnaasut atorneqassapput, tak. Pisortanut akiitsut akilersinniartarnerat pinaveersaartinneqarnissaallu pillugit Inatsisartut inatsisaat nr. 3, 2. maj 1996-imeersoq kingusinnerusukkullu allanngortinneqartoq.

#### Imm. 7-imut

Naalakkersuisut qimminik qimuttunik eqqussuisarnermut, annissuisarnermut qimminillu qimuttunik qimmeqarnermut tunngatillugu sukumiinerusunik malittarisassaliornissamut aalajangersakkatigut piginnaatinneqarput.

Uumasunik illersuineq pillugu uumasunik il.il. tigooqqaanerit pillugit inatsimmi § 10-mi piginnaatitsinermit aalajangersagaq Qimminik qitsunnillu ningarniaasarnermut toqutsisarnermullu Namminersorlutik Oqartussat nalunaarutaat nr. 25, 28. decembari 2017-imeersoq qimminik qitsunnillu ningarniaasarnernut malittarisassanik nalunaaruteqarnissamut atorluarneqarpoq.

Aalajangersakkami tassani piginnaatitsineq maannakkut ujaasineq pillugu malittarisassanik aalajangersaanermit atorluarneqanngilaq.

### § 13

#### Imm. 1-imut

Piginnittup aallaqqanerani, assersuutigalugu aallaaniarnermi, aalisariarnermi, nuunnermi, napparsimavimmut uninnermi, pineqaatissinneqarsimalluni inissiisarfimmiinnerani assigisaanilluunniit pissuteqarluni aallaqqanerani sulinngiffeqarluniluunniit angalanerani qimmit qimuttut nakkutigineqarnissaannik, tassunga ilanngullugit nerisinneqartarnissaannut, imertinneqartarnissaannut allatigulluunniit paarsinissamut isumaginninnissamullu tunngatillugu isumaqatigiisuteqartoqarsimanngippat qimmit qimuttut qimanneqarnissaat aalajangersakkakut inerteqqutigineqarpoq. Qimmit piniariartarfinnut aallaaniartarfinnulluunniit, imaluunniit qimussimik angalanerani nakkutigittinnagit qimaannarneqarnissaat inerteqqutaavoq.

Aalajangersagaq § 11, imm 2-mut naleqqiunneqassaaq taamaalillutik qimmit qimuttut ullut tamaasa takusarneqartassapput, il.il. Taamaattumik piginnittup aallaqqanerani qimminik qimuttunik



piginnittutut pisussaaffeqarluni paarsisussap ullut tamaasa nerukkaasarnissamut, imertitsarnissamut paarsinissamullu piumasqaatinik malinninnissaa piginnittup qulakkiissavaa. Taamaaliortoqangippat piginnittoq qimmiminik qimuttunik sumiginnaasimanermut akisussaasutut inissinneqarsinnaavoq, taakkua allamit paarineqartussanngortinneqarsimaneri apeqqutaatinnagu, tak. § 46, imm. 1.

Imm. 2-mut

Aalajangersakkami inerteqqut § 13, imm. 1-imik malinnitsitsineq qulakkeerniarlugu uumasup passunneqarnera pillugu peqqussuteqarnikkut akuliunnissamut inatsisitigut tunngavissaqarpoq, tak. § 46, imm. 1. Tassa piginnittoq qimmini qimuttut nakkutiginigigit nuunnaera aallaqqaneraluunniit imminut illersorsinnaanngitsumik suliarinninnertut isigineqartariaqarpoq, tak. § 49, taamaattumillu kommunalbestyrelsip uumasup passunneqarnera pillugu peqqussuteqarsinnaavoq, tassunga ilanngullugu piginnittumut allamut tunisineq allatulluunniit piginnittussamut naleqquttumut tunisineq imaluunniit tamanna iluatsinngippat qimmerluunniit qimuttoq napparsimappat katsorsarneqarsinnaanngitsumilluunniit ajoqusersimappat toqunneqassaaq, tak. § 49, imm. 2. Aalajangersakkami Uumasunut Nakorsaaneqarfik kommunalbestyrelsilu pisinnaatinneqarput qimmeq qimuttoq allamut naleqquttumut nutaamut nalunaarsorsinnaallugu imaluunniit qimmimik qimuttumik toqutsisinnaallutik naleqquttumik piginnittussaannik nassaartoqarsinnaanngippat.

Qimmip qimuttup nal. akunnerni 72-init sivisunernit nakkutigineqarsimannginneranut naliliineq qimmip qimuttup qanoq issusaanik, kommunip qimmeqatigiinnut tunngaviusumik nakkutilliineranik kiisalu najukkami ilisimasat qimmillillu pillugit nalunngisat tunngaveqartariaqarput. Piffissami aalajangersimasumi qimmeq qimuttoq naammattunik nerisassaqartinneqarnera soq imigassaqartinneqarnera soq ilaatigut misissuiffiginerisigut pineqartumi oqartussaasut qimmeq qimuttoq ilumut nakkutilliisoqartinnagu qimanneqarsimanersaq qulakkiissavaat. Nal. akunnerit 72-it qaangiutereerpata oqartussat akuliutissapput qimillu qimuttup nutaamik piginnittulerlugu nalunaarsornissaa toqunnissaaluunniit sulissutigissallugu. Aalajangersakkamik atuinermi pissutsinut naapertuuttumik periaaseqarnissaaq isiginiarneqassaaq, taamaattumillu piginnittoq ilisimaneqarpat saaffiginiarneqassaaq qimmit qimuttut allamut tunniullugit nalunaarsunnginneranni toqunneqannginneranniluunniit inuttassarsiorneqassallutik.

Qimmip qimuttup naalliutsinnginnissaa annertuumillu ajoqusinnginnissaata qulakkeerneqarnissaatut isigineqarpat qimilluunniit qimuttup inuttaa aallarsimappat allatulluunniit peqanngippat qimmimillu qimuttumik isumaginngittoqanngippat imm. 2 naapertorlugu piaartumik toqutsisoqarsinnaavoq. Qimmeq qimuttoq naalliunnersoq annertuumilluunniit ajoqusersimanersaq pisut ataasiakkaat uummasullu ataasiakkaat aallaavigalugit nalilerneqartassaaq, assersuutigalugu qimmeq qimuttoq sivisuumik nerukkarneqarsimannginnerup kingunerisaanik sanigorsimappat imaluunniit qimmeq qimuttoq ikeqarpat katsorsarneqarsinnaanngitsumilluunniit nappaateqalersimappat. Assersuutini periarfissat tamarmiunngillat.

Qimmeq qimuttoq naalliuttutut imaluunniit annertuumik ajoqusersimasutut nalilerneqarpat qimmeq ingerlaannaq toqunneqassaaq. Pissutsit taamaatillugit kina piginnittuunersoq imaluunniit piginnittut kikkuunerinik misissueqqaarnissat pisortat utaqeqqaartariaqartassanngilaat. Uumasut naalliunnginnissaat aammalu sivirusumik naalliutsinneqannginnissaat pingaarnepaajuvoq. Qimmittaaq ingerlaannaq toqunneqarsinnaapput imm. 1 naapertorlugu piginnittup aallarsimanerata kingunerisaanik peqqussutit inerteqqutilluunniit malinneqarsinnaatinnagit piginnittullu tamakku isumagisinnaanngippagit.

Imm. 3-mut

Piginnittumut akiligassanngorlugu aamma tassunga taarsiiviginertaqanngitsumik toqutsisoqassaaq, tassami piginnittoq pisumut nammineq pisuugami aamma tamatuma malitsigisaanik ajoqusernermut pisuugami toqutsisoqartariaqalerlunilu, taamaattumik tamanna piginnittumut tunngatillugu nammineq pisuugami.

## § 14

Imm. 1-imut

Qimminik qimuttunik tigusiniarnerit toqutsinerillu sukkasuumik anniartitsinertaqanngitsumillu pissasut aalajangersakkami aalajangiunneqarpoq. Toqutsinissamut periutsit piumasaqaatinik naammassinniffiusut tassaapput soorlu assersuutigalugu uumasut nakorsaata nakorsaait atorlugit toqutsinera imaluunniit qarasaanut uummammulluunniit toqqaannaq aallaannilluni toqutsinera. Taamaaliornikkut qimmeq qimuttoq sukkasuumik toqussaaq anniarnissanilu misiginngitsoorlugu.

Imm. 2-mut

Aalajangersakkatigut imaani imermiluunniit ipititsilluni, qimitsilluni nivinngaalluniluunniit toqutsinissaq inerteqqutigineqarput. Imermi immamiluunniit ipititsinissaq, qimitsinissaq nivinngaannissarlunniit inerteqquteqarnermi ilaapput, tassami periutsit taakku tamarmik uumasup arriitsumik annernartumillu toquneranik kinguneqassammata. Qimmip qimuttup qanoq utoqqaatiginera aamma piaraanera apeqqaatinnagit inerteqqut atuuppoq Aalajangersakkami toqutseriaatsit taakku immikkoortinnerinut pissutaavoq qimuttunik qimmillit ilaat nivinngarlugit qimitsinikkut toqutsisarsimmammata qimmit qimuttut amii "pitsaaneruniassammata".

Imm. 3-mut

Qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi § 17, imm. 3 naapertorlugu Inatsisartullu inatsisaannik uuminnga akuerineqarluni atuutsitsilernikkut atorunnaartussami Naalakkersuisut qimminik qitsunnillu toqutsinissamut malittarisassiorsinnaatitaapput. Piginnaatitsineq pillugu aalajangersagaq aalajangersakkami imm. 3-mi nangeqqinneqarpoq. Qimminik qitsunnillu ningarniaasarnermut toqutsisarnermullu nalunaarut nr. 25, 28. decembari 2017-imeersoq Uumasut illersorneqarnissaat pillugu inatsimmi tunngavissaqarluni saqqummiunneqarpoq. Qimminik qitsunnillu toqutsisarnissat pillugit

aalajangersagaq uumasut illersorneqarnissaat pillugu inatsimmi § 13, imm. 2-mi tunngavissalik nalunaarutigineqarpoq.

## § 15

### Imm. 1-imut

Aalajangersakkami kiisortunik qimuttunik qimmeqarnissaq inertequtaasoq aalajangersarneqarpoq. Aalajangersakkami aamma qimmip qimuttup qaqugukkut kiisortutut taaneqarsinnaaneraniq nassuiarneqarpoq. Qimmeq qimuttoq pissusissamisuunngitsumik pissusilersornermigut ulorianarpat kiisortuusutut imaluunniit naatsorsuutigisassaannngitsutut isigineqassaaq. Qimmit qimuttut inunnik uumasunillu pequtissaqannngitsumik arlaleriarlutik kiisisimasut matumani assersuutaasinnaapput. Tassani perlilerneq, anniartinneqarneq allaalluunniit pinnguarluni kiisineq kiisalu kiisortuuneq pissutigalugu kiisinerit immikkoortinneqarluinnassapput. Qimmit qimuttut ataatsimoortarput inissisimaffitsillu attanniarlugit ersersitsisarnerat nalinginnaasuvoq, tassungalu paggittarnerat ilaavoq. Ataatsimoortut pissusiisa ilaat nalinginnaasoq, tassa arnavissap sarliartup allat piarai qaninngoorpallaartut uiartortarmatigit piaqqani illersorniarlugit imaluunniit qimmit qimuttut inersimasut allat ataatsimoortunut qimmilivimmulluunniit isertut kiisarlugit.

Qaqugukkut nalinginnaannngitsumik ulorianartumik pissuseqartarnerannut nalilersuinermit killeqaqqissaartariaqarpoq, pisunut assigiinngitsunut pissutsinullu ataneqartillugu nalilersuisoqartassalluni. Aalajangersakkami qimmit qimuttut pillugit suliani nalilersuiniarnermit kommuni Uumasunullu Nakorsaaneqarfik isumasioqatigiillutik pisassasoq aalajangerneqarpoq.

### Imm. 2-mut

Aalajangersakkami qimmit qimuttut uumasunik allanik inunnilluunniit ajoqusiisumik kiisisimasut toqunneqassasut aalajangerneqarpoq. Qimmit qimuttut sakkortuumik kiisisimasut pillugit sulianik nalilersuinermit kommunalbestyrelsit aamma Uumasunullu Nakorsaaneqarfik isumasioqatigeereerlutik naliliisoqartassaaq qimmip qimuttup toqunneqannnginnerani. Inaarutaasumik aalajangiineq pillugu imm. 3 takuuk.

Sakkortuumik kiisineq pissutsinut tunngasutut isiginiarneqassaaq. Inunnut tunngatillugu kiisinermit qimmip qimuttup "kiiseqqissanngilaq"-mik pissusiminik ersiuteqassaaq, taamaalilluni paasineqarsinnaalerluni ataasiarluni kiisiguni qimmeq qimuttoq kiiseqqissanngilaq. Qimmeq qimuttoq arlaleriarluni kiisippat sakkortuumik kiisineq pineqarnerasoq nalilersorneqassaaq. Inuup assersuutigalugu qimuttumut qimmimukarluni pitoqqasumut unataalluni arlaleriarluni kiisikkuni qimmeq qimuttoq toqunneqassanngilaq.

Assinganik qimmit ataatsimoornerminni qimminik allanik toqutsinermit kinguneqartumik paggittarnerat nalinginnaasuvoq. Taamaattoq qimmit ataatsimoorneranni qimmeqatiminnik arlaleriarlutik toqutsillutik pagginnerminni toqutseqattaartarnerat nalinginnaasuunngilaq.

Sorraatsumik pissuseqartarnerat qimmeqatigiit akunnerminni inissisimaffimminnik attassinissamik eqqissisimatitsinissamillu siunertaqartarpoq, qimmeqatigiinnilli uiartuinaannarnermik siunertaqartarani. Tassani immikkut isiginiarneqassapput namminneq qimmeqatigineeraat aamma qimmit qimuttut qimmeqatigiinnit allaneersut. Qimmit qimuttut qimuttunut qimmeqatigiinnut allanut qimmeqarfimmut isertut imaluunniit qimussertilluni allanut ilaruttut sorraatsumik pissuseqartarput ajoquseerujussuarlutik kiisisinnaasarlutik. Qimmip qimuttup qimmeqatini qimuttoq alla piaaraluni ajoqusiisumik kiisimaneraa pillugu inerniliinnginnermi pisut imminut atanerat ataatsimut isiginiarneqaaqassapput.

Ajoqusiisumik kiisineq imatut nassuiarneqarpoq:

- ikit arlallit itisuut ammalortut, ammip ataanut itisuumik annguttut imaluunniit nukinnut annguttut; erseqqissumik takuneqarsinnaassaaq arlaleriarluni kiisisoqarsimasoq taamaaliortoqarsimallunilu sakkortuuliornikkut, imaluunniit
- siissineq (kilerneq itisooq) ammip ataani/nukinni (tassa amikkuinnaanngitsoq), imaluunniit
- kiisinikkut ajoqusiinerit, neqimik annaasaqarnermik kinguneqartut (qimmit siutaanni annikitsuinnarmik ajoqusiinerit pinnagit), imaluunniit
- kiisinikkut ajoqusiinerit, toqumik kinguneqartut, taamatuttaaq pissutsit tassa qimmip qimmimik allamik issuttuussilluni toqutsinera, kiisineq taannaannaalluni ajoqusiinermut pissutaanngikkaluartuq immikkoortuni siuliini pingasuni allaaserineqartutut.

Imm. 3-mut

Aalajangersakkami aalajangerneqarpoq Uumasunut Nakorsaaneqarfik suliassaqarfimmi suliamut immikkut ilisimasalittut suliassani tassani qullersaasoq, taamaammallu isumaqatigiinngitsoqartillugu inaarutaasumik aalajangiisassalluni.

Imm. 4-mut

Aalajangersakkami aalajangersarneqarpoq imm. 1 imaluunniit 2 naapertorlugu pissusilersortunik qimminik qimuttunik qimmilik toqunneqarnissaanillu piumaffigineqarsimasumik , peqquneqarnermi kingorna akunnerit 24-t iluanni toqutsisimanngippat kommunalbestyrelsip piaartumik toqutsisoqarnissaa sulissutigissavaa. Qimmeq qimuttoq kiisortoq allanut navianartorsiortitsisarmat toqutsineq piginnittumut akiligassanngortinneqassaaq tamannalu taarsinertaqanngitsumik pissalluni.

## § 16

Imm. 1-imut

Aalajangersakkakkut qimminik qimuttunik qimmilivissanik kommunalbestyrelsi innersuussisassasoq aalajangiunneqarpoq. Nunaminertamik tunniussinermut periaatsit nunaminertamillu atuinissamut malitassat kommunit aalajangersagaanni aalajangersarneqartarput. Aalajangersakkakkut qimmit qimuttut piginnittup illuaniissinnaaneri mattunneqanngillat.

#### Imm. 2-mut

Qimmiliviup innersuunneqartup qimminik qimuttunik qimmiliviusinnaanerani naleqquutuunersoq kommunalbestyrelsip eqqumaffigissagaa aalajangersakkakut aalajangiunneqarpoq.

Aalajangersagaq una imm. 3-mut 4-mullu naleqqiunneqassaaq. Ilaatigut pissutsit § 18-imi taaneqartut ilanngunneqarsinnaapput, taamaalillutik sumiiffiit tuniluuffioratarsinnaasut qimuttunik qimmeqarfigineqassanngillat katersuuffiussanatilluunniit. Taamaattumik qimmeqarfimmik eqqaavissuup, tunisassiorfiup, nerisassaarniarfiup assigisaasaluunniit eqqaannut innersuussinissaq naleqquutuussanngilaq. Taamatuttaaq qimmeqarfimmik takusariaannaanngitsunut taamalu paarsinerlunnermik kinguneqarsinnaasunut illoqarfimmiit nunaqarfimmiilluunniit ungasissumut innersuussinissaq naleqquutuussanngilaq. Taakkua saniatigut qimmeqarfimmut tunngatillugu silap ukiullu qanoq ilineri isiginiarneqassapput, assersuutigalugu sikuertartumi imaluunniit apummi sermimilu aattartumi qimmiliveqarnissaq pinngitsoortinniarneqassalluni.

#### Imm. 3-mut

Aalajangersakkami aalajangersarneqarput qimmiliviit kommunalbestyrelsimit innersuunneqartarnerannut piunasaqaatit, immikkoortoq 2-mi aalajangersakkat tunngaviusut saniatigut tunngasut. Qimmilivittut innersuunneqartoq ukioq naallugu annertunerusumik panertuussapput, sapinngisamik toqqissuullutik, qimmit qimuttut taamaalillutik ajornanngitsumik qimmilivimmiissinnaassallutik akornutitaqanngitsumillu eqqissisimaarfissamik nallarsinnaassallutik. Tamatuma saniatigut piginnittoq qimmit qimuttut isumassuisumik isumagineqartarnissaat pillugit piunasaqaatinik malinnittussaavoq, tak. § 8, imm. 1.

#### Imm. 4-mut

Imm. 2-mi 3-milu taaneqartut saniatigut kommunalbestyrelsip qimmilivinnik innersuussisarneranut piunasaqaatit allat aalajangersakkami aalajangersarneqarput. Taamaalillutik qimmiliviit inuit najugaqarfiinut, suliffeqarfinnut imaluunniit pisortanut namminersorlutillu sullivinnut ingasattumik akornusersuutaassanngillat. Soorunami qimminik qimuttoqarfiusuni najugaqarnermi qaqugukkulluunniit annertunerusumik annikinnerusumilluunniit qimmit assersuutigalugu qilunnerinit miaggoornerinillu akornusersorneqarneq nalaanneqartassaaq. "Ajoqutit" nalinginnaasut taama ittut aalajangersakkami ilaatinneqanngillat. Ingasattumik akornusersuinerit, assersuutigalugu sanilerisat illumi eqqaanni niuertumulluunniit aqutissatuaat assigisaaluunniit qimminik qimuttunik amerlasuunik assersimasarneri aalajangersakkami pineqarput. Qimmeqarfinnut sanilerisat akornuserneqaratik angerlarsimaffimminnukarsinnaassapput nunamilu illumi najugaqarfigisaasa eqqaaniissinnaassallutik. Aamma suliffeqarfinnut assigiinngitsunut tamanna atuuppoq.

#### Imm. 5-imut

Aalajangersakkami qimuttunik qimmilik peqquneqarpoq qimmilivimmi ersarissumik allaqqasunik attavissanut paasissutissanik peqarnissaa qulakkiissagaa (ateq, oqarasuaatip normua) imaluunniit ID-normu Uumareg-imeersoq (nuna tamakkerlugu uumasunut paasissutissaasivik) kiisalu

qimmilivimmi qimmit qassiuneri pillugit paasissutissat. Taamaaliornikkut qimmit qimuttut isumannaatsinniarlugit peqqissuutinniarlugillu, tassa piginnittoq qimmilivimmi, assersuutigalugu kalunnerit ilassimappata, qimmit qimuttut paggippata, pituussaarsimappata il.il.

ajornartorsiuteqartillugu attaveqarfigeriaannangorlugu. Aamma nakkutilliisut qimuttunik qimmilik attavigeriaannaaniassavaat ilungersunartumik ajornartorsiortoqartillugu, assersuutigalugu qimmit qimuttut nappaalalerpata ajoqusersimappataluunniit. Piginnittup allagartaliinissamut piumasaqaat malikkusunngippagu kommunalbestyrelse allagartaliinissamut piumasaqaat malillugu ullut 14-it qaangiuppata allagartaliisinnaavoq piginnittumit akilerneqartussamik.

#### Imm. 6-imut

Aalajangersakkakut aalajangersarneqarpoq qimuttunik qimmillit qimmilivissatut nunaminertap pissarsiami eqqiluisaartinnissaa torersuunissaalu qaqugukkulluunniit akisussaaffigaaat.

Taamaalilluni piginnittup qimmilivimmi annat eqqagassallu il.il. piiartassavai allanut ingasappallaamik akornutaappata qimminulluunniit qimuttunut akornusiinissaannik aarlerinartorsiortitsippata piiartartussaavai. Tamakku tassaasinnaapput sanaartornermi atortut qinneri kikiaaluunniit nuisaannartut qimminullu ajoqusiisinnaasut.

Kommunalbestyrelsip aamma qulakkiissallugu akisussaaqataaffigaa qimuttunik qimmillit qimmilivitsik eqqiluisaartinnissaannut, kiisalu qimmit qimuttut anaannik eqqiluisarneq eqqarsaatigalugu illersorneqarsinnaasumik passunnissaat ilanngullugu eqqarsaatigalugu. Tamanna ilaatigut atortunik inissiinikkut pisinnaavoq, ass. eqqaaviit containerit spandilluunniit atorlugit taamaaliornermi qimuttunik qimmillit eqqagassaatic igissinnaaniassammatigit.

## § 17

#### Imm. 1-imut

Aalajangersakkami aalajangerneqarpoq qeqertat qimmiliviit qanoq sivisunerpaamik atorineqarnissaannik piffissaliilluni. Piffissaliinermi takutinneqarpoq qeqertat qimmiliviit aasakut atorineqartarneri. Taakku saniatigut § 8, malillugu qimuttunik qimmeqarnissamut piumasaqaatic naammassineqarsimassapput.

#### Imm. 2-mut

Aalajangersakkakut aalajangersarneqarpoq kommunalbestyrelsip qeqertat qimmilivissat Uumasunut Nakorsaaneqarfimmut innersuutigisassagai kiisalu tamakku aatsaat akuereererpagit qimmilivittut atorineqarsinnaasunngorlugit. Qeqertat qimmiliviit qimminut qimuttunut inssiivigissallugit naleqquttuussapput taamaattumillu Uumasunut nakorsaaneqarfiup qeqertat isumannaatsuuneri qularnaassavaat. Taamaammat qeqertanut qimmilivissatut atorineqalerniartunut atugaareersunullu tunngasunik atuinissamut akuersissummik piniartoqassaaq.

#### Imm. 3-mut

Aalajangersagaq qimmiliviit pillugit aalajangersakkamut assingusumut naapertuuttunngortinneqassaaq, tak. § 16, imm. 3 aamma qimmit qimuttut isumassuisumik passunneqartarnissaat pillugit piunasaqaatit, tak. § 8, imm. 1.

Taamalu qimmit qimuttut qimmilivinni qeqertaniittut eqqiluitsumik imeqartinneqassapput. Qeqertarmi inuttaanut attavissamik paasissutissartalimmik allagartaqassaaq, taamaalilluni piginnittoq nanineqarsinnaaniassammat qimmiminullu akisussaattillugu. Piginnittup aamma qimmit qimuttut ullormut alakkartassavai ajunnginnissaat timikkut peqqissutsikkullu pisariaqartitaat isumagisarlugit. Aamma qimmit qimuttut silamut illersorlutik oqquiffissaqarnissaat piunasaqaataavoq.

Imm. 4-mut

Qeqertaq qimmilivik qimmeqatigiinnik ataasiinnarnit qimmiliviussasoq aalajangersakkami aalajangiunneqarpoq. Tamatumunnga peqqutaavoq qimmeqatigiit sumiiffimminnik illersuiniarlutik pagginnissaat aarlerinarmat.

Imm. 5-imut

Qeqertami qimmilivimmi kina qimminik piginnittuunersoq, qimmit qassit qeqertamiinnersut pillugit allagartaliisoqassaaq. Qimmit inuttaat qeqertami qimmilivimmi allagartarsualiisimanngippat kommunalbestyrelsip piginnittoq ullut 14-it iluanni allagartarsualeeqqullugu peqqusinnaavaa, kommunalbestyrelsillu peqqussutaa taassuma malinngippagu kommunalbestyrelsi allagartarsualiinissamut sulissuteqassaaq piginnittup akiligassaanic.

## § 18

Imm. 1-imut

Aalajangersakkami uumasut isumannaatsuunissaat isiginiarneqarpoq, tassami qimmit qitsuillu sumiiffinnut ataatsimoortillugit inisseqqusaanngillat uumasut isumannaassusaannut aarlerinartorsioertitsisinnaasunut soorlu sanaartorfinni, eqqaavissuarni ikuallaaviup eqqaaniittuni imaluunniit suliffissuaqarfiit eqqaanni angallaffiusuniluunniit, tassanilu avatangiisit isiginiarneqarput, meeqqanut inuusuttunullu paaqqinnittarfii, atuarfiit, napparsimmaviit utoqqaalluunniit illuisa eqqaat, inuussutissanik suliaqarfiusuni tunisassiorfiilluunniit eqqaanni. Aalajangersakkami kommunalbestyrelsip qimmeqarfissatut innersuussinera qimminillu qimuttunik assartuinnermi qimussimilluunniit sukkaniunnermi peqataanermi ataatsimoortitsisarnerit ilatinneqarput. Taamaattumik qimmeqarfiiit uumasuutitut uninngatitsivigissallugit naleqquttuussapput avatangiisinullu peqqissutsitigut aarlerinartorsioertitsissanatik. Tassa imaappoq, ingerlatsiviup, tunisassiorfiup, eqqaavissuup, nerisassanik nutaanik assigisaanilluunniit tuniniaaviusut eqqaanni qimmeqarfiliortoqassanngitsoq. Taamatutaaq peqqissutsip naleqquttumik isumagineratigut qimussimik sukkaniunnerup ingerlanneqarnissaa qulakkeerneqassaaq, taamaattumik sumiiffinni qimmit nappaataannik tunillaassuuffioqqammersuni tunillaassuuffiusuniluunniit ingerlanneqassanngilaq.

Imm. 2-mut

Sumiiffiit qimmit qitsuillu katersorneqarfigisartagaat pillugit maleruagassanik immikkut ittunik Naalakkersuisut aalajangersaasinnaasut aalajangersakkami aalajangiunneqarpoq. Malittarisassani ilaatinneqarsinnaapput akiuussusersuinerni atortunullu tunngasut kiisalu qimmit qimmilivimmi amerlanerpaamik qassiusinnaanerannut tunngasut.

## § 19

Imm. 1-3-mut

Aalajangersakkami aalajangersarneqarpoq kommunalbestyrelsit qimuttunik qimmeqarfimmiittut kommuniminni aalajangersakkami imm. 2-mi innersuunneqartut malillugit qimuttunik qimmeqarnissamut ileqqoreqqusaliornissaannut pisussaatinneqartut, taamaattoq imm. 3 naapertorlugu najukkami pissutsinut naleqqussaasoqarsinnaalluni. Ileqqoreqqusat akuersissutigineqassapput atuutilinnginnerannilu Naalakkersuisunit ilisimatitsissutigineqaaqaartussaallutik.

## § 20

Imm. 1-imut

Qimminik qimuttunik pilattaanermik nakorsaasersuillunilu passussinerit Uumasut nakorsaqaarnikkut oqartussaaffik akuerisaasumik Uumasunut Nakorsaaneqarfimmit taamaallaat suliarineqarsinnaasut aalajangersakkami aalajangersarneqarput. Nakorsaatiniq katsorsaaneq ima paasineqassaaq nakorsaatiniq tamanik katsorsaaneq, akiuussusersuineq minillugu. Ilisimajunnaartitsilluni ilisimajunnaartitsinaniluunniit qimminik qimuttunik timaannik pilattaanerit pilattaanertut tamarnik isigineqarput.

Aalajangersakkakkut qulakkeerniarneqarpoq inuit uumasut nakorsaattut allagartaqanngitsut pilattaasannginnissaat, taamalu kukkulluni uumasumik pilattaanikkut assigisaanilluunniit passussinerimi anniannginnissaa qulakkeerniarneqarluni. Taakku saniatigut aalajangersakkakkut qulakkeerneqassaaq qimmit qimuttut upperisapalaat ilisimasakinnerluunniit pissutigalugit naalliutsinnginnissaat. Piniartut ilaasa qimmimi qimuttut timmiinnaleraangata pamiuisa ilaannik kipisisarnerat kiisalu aseruuttoorneranni siutaasa ilaannik kipisisarnerat ilisimaneqarpoq. Taamatut pilaasarnerup inerteqqutaanera manna aalajangersagaq naapertorlugu erseqqilluinnarpoq. Uumasunut nakorsassaaleqisoqartoq nassuerutigineqarpoq taamaammallu ass. ajuamik imaarsiniarluni annikitsumik amiatigut sivikitsumik ammaanikkut imaluunniit imininnerit imaarnerat, tassani suliarinninnerup anniaataanera aaqqivinnissamut ajoqutaarunnissamullu naleqqiullugu minnerulluni.

Imm. 2-mut



Aalajangersakkakut peqqinnissaqarfimmi sulisut uumasunut nakorsaq isumaqatigereerlugu nakorsaatnik tunniussisinaanissaat, passussinermi ikiuussininaanissaat kiisalu qimminut qimuttunut passussinissamut atugassanik uumasut nakorsaannit tunniuteqquneqartunik tunniussisinaanissaat periarfissinneqarpoq.

#### Imm. 3-mut

Aalajangersagaq imm. 1-imut ataneqartillugu isigineqassaaq, tassanilu aalajangerneqarluni qimmit qimuttut isikkui allangortinniarlugit passunneqaqqusaanngitsut. Isikkuinik allannguiniarluni passussinerni pineqarput passussinerit suulluunniit qimmit qimuttut isikkuinik allannguiniartutut siunertallit, matumani pamiuinik siutaasalu nuuinik kipisinerit kiisalu eqeqqusaannik qittusaannillu kipisinerit.

#### Imm. 4

Aalajangersakkami aalajangersarneqarpoq atortulersorluni allatulluunniit iliorluni qimmit qimuttut kigutaannik ajoqusiinissaq inerteqqutaasoq. Qimmit qimuttut ilaatigut anuiarlutik kimmerartut piginnittuisa tuloriaajartaraat takuneqartarpoq. Inuunnaq kigutinik paaariaraluarpat qimmeq qimuttoq naalliutsinneqassaaq tamatumalu kingunerisaanik qanermini aseruuttuussaaq aammalu napparsimaleratarsinnaanera ilimanaateqarnerulissaaq allaallu toqumik kinguneqarsinnaalluni. Aalajangersakkap uuma taamaasilluni qimmit qimuttut taamatut pilattarneqannginnissaat qulakkiissavaa. Assersuutigalugu kigutaanik napisoqarsimappat uumasup nakorsaata passussinera aalajangersakkami ilaatinneqanngilaq.

## § 21

#### Imm. 1-imut

Aalajangersakkami aalajangiunneqarpoq uumasunut nakorsat, soqutigisaqaqatigiit uumasunillu nakorsaqarfimmi sulisut qimminik qimuttunik passussinissamik kissaateqartut, matumanilu qimmit qimuttut passunneqarnissaannut siunnersuinerit, nakorsaatissaannik tunniussinerit, pilattaanernik suliaqarnerit, akiuussusersuinerit, nakorsaatit atorlugit katsorsaanerit assigisaalluunniit imaluunniit uumasunik nakorsiartarfinnik ingerlatsinernut tunngasunik ingerlatserusuttut Uumasunut Nakorsaaneqarfimmit akuersissummik tunineqaqqaartassasut. Aalajangersakkap oqaasertaa naapertorlugu aamma inuit qimminik qimuttunik suliaqarusuttut siunnersuerusuttullu Nunatsinni sulilinnginnerminni Uumasunut Nakorsaaneqarfimmut akuersissummik piniaqqaassapput. Maani nunami qimmit qimuttut sunik katsorsarneqarnerannut siunnersuinerimullu tunngatillugu kalaallit oqartussai tamakkiisumik malinnaasinnaanissaat tamatuma qulakkiissavaa.

#### Imm. 2-mut

Imm. 1 naapertorlugu qimminik qimuttunik katsorsaannissamut il.il. akuersissuteqarnermi pineqartup Uumasunut Nakorsaaneqarfimmut ingerlaavartumik nalunaarusiornissaa kiisalu

nakorsaasiinissamut, katsorsaanissamut siunnersuinissamullu tunngatillugu Uumasunut nakorsaaneqarfiup malittarisassaanik malinninnissaa piumasagaatigineqarsinnaapput. Akuersissutip imai annertussusaalu apeqqutaatillugit aalajangersakkakut periarfissiisoqarpoq akuersissummik tunniussisoqassappat Uumasunut Nakorsaaneqarfiup amerlanernik piumasagaateqarsinnaanerani. Piumasagaatit malitassallu malinneqanngippata akuersissut ingerlaannartumik atorunnaarsinneqassaaq.

## § 22

### Imm. 1-imut

Kalaallit Nunaanni qimmit qimuttut tamarmik atajuaannartussamik ID-mik nalunaaqutsersorneqassasut aalajangersakkami aalajangiunneqarpoq. Qimmip qimuttup tuniniarneqarsinnaalinnginnerani imaluunniit tunniunneqarsinnaalinnginnerani kingusinnerpaamillu qaammatinik sisamanik utoqqaassuseqalinnginnerani ID-mik nalunaaqutserneqarsimassaaq. ID-mik nalunaaqutsersuinikkut qulakkeerneqassaaq qimmip qimuttup qularnaatsumik kinaassusersisinnaanissaa, taamaalillunilu qimmeq qimuttoq qimminut allanut paarlaanneqassanngilaq aammalu ID-mik nalunaaqutsersuineq qimmimut allanut nuunneqarsinnaassanani. ID-mik nalunaaqutsiineq qimmip qimuttup suminngaanneerneranut uppersaataavoq pingaaruteqarluinnartoq. ID-mik nalunaaqutsiineq pisarpoq qimmip qimuttup amianut mikrochip kapuummik ikkunneqartarpoq uumasut nakorsaannik akuerisaasumit imaluunniit qimmit nakkutilliisuannik akuerisaasumit.

### Imm. 2-mut

Imm. 1 naapertorlugu ID-mik nalunaaqutsiinerit uumasunut nakorsamik Naalakkersuisunit akuerisamit, imaluunniit Uumasunut Nakorsaaneqarfimmit qimminut nakkutilliisutut piginnaatinneqartumit taamaallaat suliarineqartassapput, taamaattoq qimminut akiuussusersuisartumit akuerisamit suliarineqartassanngillat, taakku taamatut passussinissamut ilinniartinneqarsimannginnamik.

Aalajangersakkami ersarissarneqarpoq kalaallit qimmiat qimuttoq ilumut kalaallit qimmerineraat qimuttoq qulakkeerniarlugu kommunit immikkut akisussaaffigaa. Kommunip qimminut tunngasunik suliaqarnermi sulisuisa qimmit qimuttut najukkamilu immikkut ilisimasaqarfigissagaat naatsorsuutigineqarpoq, taamaaliornermi qimminik allanik kalaallit qimuttunik qimmerinngisaannik qimmeqarfimmiittoqartoq pasitsaanneqarpat misissuisinnaasunik.

Qimmip qimuttup eqqunngitsumik ID-mik nalunaaqutserneqarnermigut ajoquserluni anniartinneqannginnissaa aalajangersakkakut qulakkeerneqassaaq.

### Imm. 3-mut

Imm. 1 naapertorlugu piginnittoq ID-mik nalunaaqutsiinermit akerliussagaluarpat qimmip qimuttup pinngitsaalillugu nalunaaqutserneqarnissaa pillugu kommunalbestyrelsip sulissutigisinnaagaa

aalajangersakkami aalajangerneqarpoq. Qimmit qimuttut ID-mik nalunaaqutsersornissaanut suliniutinik aallartitsinissaminut qulakkeerinnittussanik kommunalbestyrelsi suliaqartussaataavoq.

Imm. 4-mut

Aalajangersakkami imm. 3 naleqquttumut allamut tunniunnissaa imaluunniit toqunneqarnissaa kommunalbestyrelsimiit piaartumik sulissutigineqassasoq aalajangersarneqarpoq. Pisuni taakkunani toqutsineq piginnittumut akilertinneqassaaq. Imm. 3-mik 4-millu allassimasunik atuinissamut isumaliutiginninnermi pisortat ingerlatsineranni inatsisitigut nalinginnaasumik tunngavissat malinneqassapput, tassunga ilanngullugu assigiimmik tunngaveqarneq. Taamaammat ID-mik nalunaaqutsiinerup naammassineqarnissaa anguniarlugu kommunalbestyrelsi piginnittumik ikiortiserinnissimassaaq. Piginnittoq ikiuukkumangippat aamma ID-mik allatut ilisarnaasersuisoqarsinnaangippat kiisalu piginnittussamik naleqquttumik nassaartoqarsinnaangippat taarsiinertaqanngitsumik toqutsisoqartariaqassaaq, piginnittormi nammineerluni pigisaminut pisortatut oqartussaasunit pineqaatissinneqarami, taamaalilluni inatsisitigut taarsiissuteqarnissamut malittarisassat illersuutaajunnaarlutik.

## § 23

Imm. 1-imut

Aalajangersakkami aalajangersarneqarpoq qimminut akiuussusersuisarnermut pilersaarutip malinnissaa qimmimik qimuttumik piginnittup isumagissavaa, tassani qimmit nappaataat, parvovirus perlerornissaallu pinaveersaarniarlugit aalajangersimasumik qimmit kapineqartassasut. Akiuussusersuisarnermut pilersaarut, tassunga ilanngullugit akiuussusersuinerit akuttussusaat, akiuussuseeriaatsit, sera-mik nakorsaatisanillu atuinissamut malittarisassat, nalunaaruteqarneq il.il. Uumasunut Nakorsaaneqarfimmit aalajangersarneqartarput.

Imm.1 malillugu qimminik qimuttunik piginnittoq akisussaasuvoq. Qimmimik qimuttumik kina paarsisuunersoq akisussaasussaataanersoq kiisalu nerukkaasarnersoq, paarsillunilu ulluinnarni isumaginnittuusarnersoq tunngavigalugit nalilersueqqissaarnikkut piginnittuunermik aalajangersaasoqassaaq. Qimmip qimuttup qimanneratigut imaluunniit allamut paarsititsigallarnermigut piginnittoq akisussaasuunerminik taamaatitsisinnaangilaq.

Inuk qimmimik paarsigallartoq aalajangersagaq manna malillugu akisussaatinneqassangilaq. Tamatumani pineqarput pisuni inuup allanik qimminik piginnittup piinik ullualunni imaluunniit sulinngiffeqarnerani paarsineranut atatillugu.

Naak akiuussusersuinernut, ID-mik nalunaaqutsersuinermut nalunaarsuinermullu aningaasartuutit inatsimmi aallaqqaasiutitut nassuiaatini pisortanit akilerneqartussaagaluartut taamaattoq qimmimik piginnittup pingaarnertut qimmimi eqqortumik akiuussusernissaa, ID-mik nalunaaqutsernissaa nalunaarsornissaalu akisussaaffigaa. Qimmimik piginnittup ilisimaleruniuk qimmimi ilaat

arlallilluunniit akiuussuserneqarsimannginnerat imaluunniit ID-mik nalunaaqutserneqarsimannginnera nalunaarsorsimannginnerallu qimminik piginnittup akisussaaffigaa pisussaaffigalugulu oqartussat eqqortut attavigissallugit tamatuma piaartumik aaqqinneqarnissaa siunertaralugu.

Aalajangersakkami aamma aalajangerneqarpoq qimmillip qimmimi amerlassusaat allannguutaat tamaasa kommunimut nalunaarutigisassagai, tassunga ilaallutik qimmit qimuttut toquppata, piaqqisoqarpat, qimmit qimuttut inersimasut nutaat, qimmit qimuttut tunineqartut il.il. Taamaaliornikkut qimmit qimuttut amerlassusaat taakkulu akiuussusersorneqarnerat pillugit nunatsinni qimminik paasissutissaasivik malinnaatinneqarnissaa qulakkeerniarneqarpoq.

Imm. 2-mut

Aalajangersakkakkut imm. 1 naapertorlugu akiuussusersuinermit nalunaaqutsersuinermit taamaallaat uumasut nakorsaat imaluunniit qimminik akiuussusersuilluni kapuisinnaatitaasumit akuerisamit qimminilluunniit nakkutilliisumit suliarineqarnissaat aalajangerneqarpoq. Qimmip qimuttup ajoqusinnginnissaa kukkusumilluunniit kapineqannginnissaa aalajangersakkakkut qulakkeerniarneqarpoq.

Imm. 3-mut

Aalajangersakkakkut aalajangerneqarpoq kommunalbestyrelsit akisussaaffigaa pisussaaffigalugu sulisussat pisariaqartinneqartut naapertorlugit amerlassuseqartussat kommunimi atorfinitsinnissaat, taamaaliornikkut Inatsisartut inatsisaanni aalajangersakkat malillugit akiuussusersuineq, ID-mik nalunaaqutsersuineq nalunaarsuinerlu suliarineqarniassammata.

Imm. 4-mut

Aalajangersakkami kommunalbestyrelsit inassuteqareernerisigut kommunini qimminut akiuussusersuisartunik Uumasunut Nakorsaaneqarfik kisimi ilinniartitsisassasoq akuersisassasorlu aalajangersarneqarpoq.

Uumasunut Nakorsaaneqarfiup kommunimi qimminik nakkutilliisunut imaluunniit qimminik nakkutilliisussanngortussanut ingerlaavartumik pikkorissartinneqartarnissaat pilersaarusiopaa. Kommunalbestyrelsit taamaalillutik kommunimi qimminik akiuussutissanik kapuisartussatut inassutigisaasa qimmit qimuttut ID-mik nalunaaqutsersinnaalernissaannut akuersissuteqalernissaat anguniarlugu Uumasunut oqartussaaffiup qimminik akiuussutissanik kapuisartutut akuerisaanissaannut pikkorissartitsineranut peqataanissaannut inatsit una malillugu inassuteqaateqassapput.

Inassutigineqartup qimminut akiuussutissanik kapuisartutut tulluannginnera pissutigalugu inassutigineqartup ilinniareernermit kingorna paasinarsippat akuersissummik tuninissaa

illersorneqarsinnaanngitsoq, taava Uumasunut Nakorsaaneqarfiup inassuteqaatigineqartup akuersissutissaanik tuniumasinnaanngilaa.

Qimminik akiuussutissanik kapuisarteq inatsit una malillugu qimminut akiuussusersuinnginnerani nalunaaqutsersuinnginneranilu Uumasunit Nakorsaaneqarfimmit akuerineqaqqaarsimassaaq. Uumasut nakorsaat imaluunniit qimminik nakkutilliisut akuerisaasut kisimik qimminut qimuttunut ID-mik nalunaaqutsersuisinnaapput, taamaalillunilu qimminik akiuussusersuisartut akuerisaasut ID-mik nalunaaqutsersiinnermik suliaqarsinnaatitaanngillat. Qimminik nakkutilliisut akuerisaasut ID-mik nalunaaqutsersuinermit saniatigut aamma akiuussusersuisinnaapput.

Qimmip qimuttup ajoqusinnginnissaa kukkusumillu passunneqannginnissaa aalajangersakkakut qulakkeerniarneqarpoq. Aammattaaq aalajangersakkakut qulakkeerneqassaaq akiuussusersuinermit pilersaarutit malinneqarnissaat, ID-mik nalunaaqutsersuinerit eqqortumik suliarineqarnissaat paasissutissallu eqqortumik uppersaasorsornissaat.

#### Imm. 5-imut

Aalajangersakkami aalajangersarneqarpoq qimmit qimuttut akiuussuserneqartut pillugit kommunalbestyrelsi uumasunut paasissutissaasivimmud akiuussuserneqarnerinit ID-millu nalunaaqutsiinerit pillugit kingusinnerpaamik qaammatip ataatsip qaangiunnerani nalunaaruteqarnissamut pisussaaffeqarteq. Tamatumani paasissutissat eqqortut nalunaarsorneqarnissaat qulakkeerniarlugu, taamaalilluni kommunalbestyrelsip kommunimi qimmit qimuttut tamarmik akiuussutissamik kaporneqarsimanissaannik aamma ID-mik nalunaaqutsersorneqarnissaannut malittarisassat atuuttut malillugit pinersut nakkutiginnissaat qulakkeerniassammagit.

#### Imm. 6-imut

Imm. 5 malillugu nalunaarutiginninnerit pillugit, tassunga ilanngullugit kommunalbestyrelse paasissutissanik sunik nalunaarutigissanerannut kiisalu qanoq akulikitsigisumik nalunaaruteqartoqartassaneranut tunngatillugu malittarisassanik aalajangersaanissamut aalajangersagaq Naalakkersuisunut piginnaatitsivoq.

#### Imm. 7-imut

Akiuiniarnissamut malittarisassat ersarinnerusut, tassunga ilanngullugit akiuussusersuinerit akulikissusaat, akiuussutissanut assigiinngitsunut tunngatillugu piumasaqaatit kiisalu akiuussusersuisarnermut pilersaarutinik aalajangersaanissamut aalajangersagaq Naalakkersuisunut piginnaatitsivoq. Aalajangersakkakut ugguuna qulakkeerneqassaaq qimmit qimuttut ilisimasat nutaanerpaat tunngavigalugit nappaatinullu pitsaanerpaamik illersuisinnaasut tunngavigalugit akiuussuserneqartarnissaat.

#### Imm. 8-mut

Qimminik qimuttunik pisussaaffittut katsorsarnissaanut malittarisassanik ersarinnerusunik aalajangersaanissamut aalajangersagaq Naalakkersuisunut piginnaatitsivoq. Qimmip qimuttup peqqissuunissaa atugarissaarnissaa qulakkeerniarlugit taakku malittarisassat ilaatigut quperlornermut katsorsaasarnermut imaluunniit peqqinnerulersitsinissamut pinaveersaartitsinermulluunniit katsorsaarnissamut piumasagaatinik imaqaassapput.

## § 24

### Imm. 1-imut

Aalajangersakkakut qimmip qimuttup piginnittua inatsisit malillugit pisussaaffiusunik akiuussusersuinissaq akerlerippagu qimmip pinngitsaalillugu piginnittumut akiligassanngortillugu akiuussuserneqarnissaa pillugu kommunalbestyrelsi suliniuteqassasoq aalajangersarneqarpoq.

Piginnittoq akiuussusersuinissamut akerliusutut oqaatigineqarsinnaavoq, qimuttuminik akiuussusersuisimanngininnermillu nalunaarsuisimanngininnermik kommunalbestyrelsimut piaaraluni nalunaarutiginninngippat. Aamma taamaassaaq piginnittoq akiuussutissanik kapuisartooq qimminilluunniit nakkutilliisoq akiuussutissanik kapisinissaanut akerliuppat, imaluunniit piginnittup akiuussutissanik kapuisartooq uumasulluunniit nakorsaata ikiunngippagu qimminik tigooqqaanissamut aalaakkiinissamulluunniit, taakku akiuussutissanik kapuiniarneq naammassiniassammat.

### Imm. 2-mut

Imm. 1 naapertorlugu qimmeq pinngitsaaliissummik akiuussutissanik kapineqarsinnaanngippat, kommunalbestyrelsip suliniutigissavaa piginnittup akiligaanik tigungminnittumullu taarsiinertaqanngitsumik qimmip qimuttup toqunneqarnissaa.

Aalajangersakkami qimmit tunillaassuisut imaluunniit tunillaassuisinnaasut uumasunut peqqissunut tunillaassuisinnaaneranut aarlerinaat millisinniarneqarpoq, taamaalilluni nappaatit navianartut siaruaatsinnaveersaarlugit.

Qimmeq eqqortumik akiuussuserneqanngippat qimmit nappaataannik tuniluutiasunik akiuiniarneq nakkutigilluarneqarsinnaanngilaq. Taamaammat pisortat taassuminnga periarfissamik tunngavissaqarnissaat pisariaqarpoq, qimmimik qimuttumik piginnittoq suleqataarusassanngikkaluarpat imaluunniit qimmimi qimuttup akiuussuserneqarnissaanut akerliuppat.

Pinngitsaaliilluni nalinginnaasumik toqutsisoqartassaaq uumasut nakorsaata qimminilluunniit akiuussusersuisartut namminneq takullugu paasigunikku qimmeq qimuttoq napparsimalereersimasooq imaluunniit nappaateqarneranik ersiuteqartoq, peqatigisaanillu qimmip qimuttup nalunaaqutsigaanngippat nalunaarsugaananilu. Kommunalborgbestyrelsip taamaattoqarpat toqutsineq suliniutigissavaa. Toqutsineq sapinngisamik erngertumik pissaaq, qimmip qimuttup

pisariaqanngitsumik naalliutsinnissaa isiginiarlugu, aammali tuniluuttoqarnissaanut aarlerinaat millisarniarlugu. Uuma aalajangersakkap atorneqarnissaanik isumaliuteqarnermi pisortani ingerlatsinermi tunngaviusumik suleriaatsit isiginiarneqassapput. Matuma saniatigut pissutsinut naapertuuttumik periaaseq isigineqassaaq, taamaaliornikkut qimmeq qimuttoq qimmilluunniit qimuttut toqunneqannginneranni iliuutsit akuliunnerillu minnerit naammattullu atorneqarniaqqaarneqassapput.

Qimmit qimuttut akiuussuserneqarsimangitsut uumaannarsinnaanerannut periarfissaq ima annikitsigaaq, allaat piunngitsutut taaneqarsinnaalluni. Qimmit qimuttut uumariaasaat qimminit allanit avissaarsimatitsiuminaatsitsivoq taamaammallu qimmit akornanni nappaatit tuniluutiallutik. Amerlanertigut qimmit qimuttut ullaakkut nappaateqarneranik ersiuteqaraangata unnukkaangat anniarlutik naalliullutik toqoreersimasarput. Taamaammat qimmeq qimuttoq napparsimasoq imaluunniit nappaammik ersiuteqartoq piaartumik toqunneqartassaaq, piginnittumit akuersissuteqarnikkut, imaluunniit taamaassinnaangippat pinngitsaaliilluni toqutsinikkut.

Aalajangersagaq taanna naapertorlugu toqutsineq piginnittumit akilerneqassaaq tassungalu taarsiinertaqanngitsumik pissalluni. Qimmimik qimuttumik pinngitsaaliilluni toqutsisoqartariaqarpat tamanna piginnittup inatsimmi akiuussusersuinissamik aalajangersakkanik malinninnginnera tunngaviusaaq. Qimmit qimuttut akiuussuserneqarnissaat piginnittup akisussaaffigaa. Taamaammat piginnittoq inatsimmi akiuussusersuinissamik aalajangersakkanik malinninngikkuni taarsiivigineqarsinnaanngilaq.

## § 25

### Imm. 1-imut

Aalajangersakkami aalajangersarneqarput Uumasunut Nakorsaaneqarfiup akiuussusersuinissamut pilersaarutai naapertorlugit qimmit qimuttut qimmit nappaataannut, parvovirusimut perlerornermullu akiuussutissamik kapitinnerannut aamma ID-mik nalunaaqutsersorneqarnerannut atatillugit aningaasartuutit Nunatta karsiata akilertassagai. Matumani Nunatta karsiata atortussat kapuutit akiuussutissallu ilanngullugit akilertassavai, illoqarfinnulli nunaqarfinnullu nassiunneri pinnagit. Taakku kommunalbestyrelsip akilissavai.

### Imm. 2-mut

Uumasunut Nakorsaarfiup pilersaarutaata avataatigut akiuussutissiinernut ID-millu nalunaaqutsiinernut aningaasartuutit kiisalu uumasut allat qimmit qimuttuunngitsut akiuussusersorneqarnerat Nunatta Karsiata susassarinnilai. Taakku aningaasartuutit kommunalbestyrelsip imaluunniit qimmimik qimuttumik piginnittup nammineq akilissavai. Akiuussusersuinerit ID-millu nalunaaqutsiinerit inatsisitigut piumasaqaataasut aningaasartuutaat kisiisa Nunatta Karsiata akilissavai.

Inatsimmi ersarissarneqarpoq qimmit qimuttut akiuussusersuinerimut pilersaarut malillugu eqqortumik akiuussusersimanissaat ID-millu nalunaaqutsersimanissaat piginnittup tulliattullu

kommunalbestyrelsip akisussaaffigigaat. Akiuussusersuinermit pilersaarut malinneqanngippat, ass. akiuussusersuinerit akornanni piffissamik qaangiinikkut, qimmeq qimuttoq akiuussuseqqinneqassaaq qimmit qimuttut akiuussusersuinermit pilersaarutaat malillugu nappaammut akiuussusersuineq qulakkeerniarlugu. Taamaalilluni akiuussutissat amerlanerit atorneqartariaqarput taamatullu akiuussutissanik atuineruneq kommunalbestyrelsimit/piginnittumit akilerneqassapput. Taamatut atuinerunermik nalilersuiniarnermi pingaaruteqarpoq nuna tamakkerlugu uumasunut paasissutissaasivik tamatigut qimmit amerlassusai akiuussuserneqarsimanerilu pillugit nutarsarneqartuarnissaa. Uumasunut Nakorsa qarfiup kommunit inniminniigaangata akiuussutissanik nassitsisarpoq taamaalilluni atuinerut pigineqartunullu aamma akiuussutissanillu inniminniinernut kiisalu nuna tamakkerlugu uumasunik paasissutissaasivimmiittut sanillersuussinnaallugit. Tamanna tunngavigalugu akiuussutissanik atuineruneq naatsorsorneqarsinnaalissaaq tamannalu kommunalbestyrelsimut akiligassanngorlugu nassiunneqassalluni.

## § 26

### Imm. 1-imut

Aalajangersakkami Uumasunut Nakorsa qarfik tuniluunnermik pitsaaliuiniarluni qimminik qimuttunik nakkutilliinermik aallartitsisinnaasoq aalajangerneqarpoq. Uumasunut Nakorsa qarfik nakkutiginninnernut atatillugu misiligutissanik tigooqqaallutillu katersisinnaavoq, kiisalu immikkut nalunaaqutsersuillutik nalunaarsuillutillu uumasunillu nakorsaanermut periaatsit allat ilanngullugit eqqarsaatigalugit. Aalajangersagaq ilaatigut atorneqartarpoq qimmit nappaataannik aamma parvovirusimik nappaalanersuaqaraangat nappaalanerup annertussusaa sakkortussusaalu eqqarsaatigalugit immikkut iliortoqartariaqalerpat tunngaviumik peqqinnermut pilersaarummut uumasunilluunniit naalliutsitsinnginnissaaq isiginiarlugu iliuuseqartoqarnissaa pisariaqarpat.

### Imm. 2-mut

Aalajangersakkami qimminik piginnittoq Uumasunut Nakorsa qarfirmut pisuni imm. 1-imi ittumi akeqanngitsumik pisariaqartitsineq naapertorlugu ikiutissasoq aalajangersarneqarpoq, matumani misiligutissanik tigusineq nalunaaqutsiineq allallu ilanngullugit.

## § 27

### Imm. 1-imut

Aalajangersakkami qimmit qimuttut akornanni nappaat tuniluutilerpat tuniluutsitsinaveersaarnermik pisariaqartunik suliniutinik kommunalbestyrelsi Uumasunut Nakorsa aneqarfirmut aallartitsinissamut peqquneqarsinnaasoq aalajangerneqarpoq. Suliniutit pisariaqartut ilaatigut tassaasinnaapput qimminik qimuttunik mattussigallarnissamut immikkoortinnissaalu pillugit peqqusineq, qimminik qimuttunik kommunimit/ kommunimut nuussinissamut inerteqquteqarneq, matumanilu qimmilivimmut allamut nuussinernut, aalisarfinnit assigisaanilu angallannernut,



toqutsinernut, ID-mik nalunaaqutsiinernut assigisaannullu peqqusinerit inerteqquteqarnerilluunniit. Iliuutsit tuniluunnermik siammarterititsinaveersaassapput. Taamatut pisoqartillugu kommunalbestyrelsi Uumasunut Nakorsaaneqarfimmit ilitersuineranik malinnittussaataavoq, kiisalu Uumasunut Nakorsaaneqarfiup ilitersuutai kommunimi qimminik qimuttunik piginnittunut ingerlateqqittussaallugit, nakkutigalugillu peqqussutit inerteqqutillu malinneqarnerisut.

#### Imm. 2-mut

Aalajangersakkakut qimmit qimuttut illoqarfiit nunaqarfiillu akornanni eqqussinerit annissinerillu nappaammik tuniluutsitsisinnaappata Uumasunut Nakorsaaneqarfik tamassuminnga inerteqquteqarsinnaatinnearpoq. Uumasunut Nakorsaaneqarfik pisuni ataasiakkaani nalilersuissaaq inerterinissaq pisariaqassanersoq. Ilaatigut taamatut pisoqarsinnaavoq sumiiffimmi nappaammik tuniluuttoqarpat imaluunniit nappaammik tuniluuttoqarnissaa ilimanarsippat ilimanarnerulerpalluunniit. Inerteqqut aallaaviatigut piffissaligaassaaq, kisianni Uumasunut Nakorsaaneqarfik piffissaliussap qaangiunnerani nappaatip suli tuniluunna pissutigalugu inerterinerup sivitsornissaa pisariaqarnerisut nalilersorsinnaavaa.

#### Imm. 3-mut

Aalajangersagaq naapertorlugu nappaalasoqalernerani nappaatinillu tuniluuttoqarnerani Uumasunut Nakorsaaneqarfik nappaammik tuniluuttoqartillugu nappaalasoqartillugulu uumasut nakorsaat qimminillu akiuussusersuisartut saniatigut qimminut akiuussusersuinissamat nalunaaqutsiinissamullu pisinnaatinnearpoq, taamatummi pisoqartillugu iliuuseqapallannissaq pisariaqarsinnaasarmat soorlu uumasut nakorsaat qimminillu akiuussusersuisartut piffissaq eqqorlugu pissarsiarineqarsinnaajuannangimmata. Nappaalasoqalernerani tuniluunnerup unitsinnissaa pingaaruteqarluinnarpoq, taamaammatt Uumasunut Nakorsaaneqarfik pisariaqassappat soorlu piniartumut qimminik qimuttunik suleqateqarnermut misilittagalimmut, kommunefogedimut politiinulluunniit akiuussusersueqqusisinnaavoq nalunaaqutsersueqqusisinnaallunilu.

Aalajangersakkakut aamma qimminik qimuttunik piginnittoq nammineq qimmiminik qimuttunik akiuussusersuisinnaanissaanut ID-millu nalunaaqutsiinissaanut Uumasunut Nakorsaaneqarfimmit piginnaatinnearpoq. Tamannali uumasut nakorsaannik qimminilluunniit akiuussusersuisartumik/qimminik nakkutilliisumik ilitersorneqarnikkut akisussaaffigineqartumillu tamatigut pisassaaq. Taamaaliornikkut qulakkeerniarneqarpoq qimminik akiuussusersuisartoq/qimminik nakkutilliisoq uumasulluunniit nakorsaat qimmeqatigiinnut nakkutigiartugassaanut tullernut nappaammik tunillatsinnginniassammat.

#### Imm. 4-mut

Aalajangersakkami aalajangerneqarpoq imm. 1-imi suliniutinik aallartitsinermut attuumassuteqartunik aningaasartuutit kommunalbestyrelsimit akilerneqassasut.

Aalajangersakkami aalajangerneqarpoq qimmit nappaataannik parvovirusimillu annerusumik imaluunniit nappaatinik tuniluuttartunik allanik tuniluuttoqarluni nappaalasoqarnerani taamaallaat uumasunut nakorsaaneqarfimmit innersuippata akuersippatalu akiuussusersuisoqassasoq.

Aalajangersakkakkut qularnaarniarneqarpoq akiuussusersuinerit taama ittut eqqortumik aaqqissuunnissaat ataqatigiissarneqarnissaallu, taamaalilluni nappaatit siaruaannissaanut akiuiniarnerup pitsaanerulernissaa anguniarneqarluni. Uumasunut Nakorsaaneqarfik nakkutilliisussatut qulliusutut kommunit killeqarfii akimorlugit sumiiffinnut eqqugaasunut nakkutilliisinnaapput, taamaalillutillu takulluarsinnaanerullugu sumi suliniuteqartoqassanersoq. Taamatut ataatsimut ataqatigiissarinikkut qimmit qimuttut nappaataannik parvovirusimillu annerusumik imaluunniit nappaatinik tuniluuttartunik allanik tunillatsissimasut kukkusumik akiuussusersorneqarnissaat aarlerinannginnerussaaq.

Akiuussutissanik kapuineq pitsaaliuinerinnaavoq, qimmillu qimuttut nappaalalereersut napparsimajunnaarsissinnaanagit. Qimmit qimuttut taamaattut tuniluuttoqannginniassammat ingerlaannaq toqunneqartassapput. Uumasunut Nakorsaaneqarfik tassani oqartussaaffimmi immikkut ilisimasalittut uumasut nappaataannik nungusaanermi akiuussusersuineri oqartussaapput naleqqunnerpaat, soorlu annerusumik nappaalasoqartillugu kiisalu kommunalbestyrelsit siunnersornissaannut ilitersornissaannullu suliaqartussatut eqqarsaatigalugit. Nappaalasoqalersillugu napparsimasoqalersilluguluunniit, imaluunniit kommunalbestyrelsi pasitsaassaqaruni napparsimasoqalersimaneranik nappaalasoqalersimaneranillu kommunalbestyrelsi taamaammat ingerlaannartumik Uumasunut Nakorsaaneqarfimmut attaveqassaaq suliniummut pilersaarummik suliaqartoqarnissaa siunertaralugu kiisalu akiuussusersuinissamut suleriaasissaaq annertusisaaq pillugu aaqqissuunneqassanersoq kiisalu ingerlanneqassanersoq eqqarsaatigalugit.

## § 29

### Imm. 1-imut

Aalajangersakkami aalajangersarneqarpoq qimmit sungiusaaviinik aaqqissuussineq ingerlatsinerlu taamaallaat Uumasunut Nakorsaaneqarfimmit akuersissuteqarnikkut pisinnaasut. Qimmit ineqarfii sumiiffimmi pineqartumi pilersinneqarnissaat illersorsinnaanersoq ineqarfiullu ingerlanneqarnissaa aaqqissorneqarneralu uumasuuteqarnermut uumasunillu aningaasarsiuuteqarnermut piumasaaqaatinut nalinginnaasunut akuersisat naammassinninersut Uumasunut Nakorsaaneqarfiup nalilersortassavaa. Uumasut ineqarfigisaat uumasut tammartut, qimatat tunniunneqartulluunniit ineqarfiattut nassuiarneqarpoq. Uumasulli ineqarfigigallagaat tassaavoq uumasut, akiliilluni, ineqarfigigallagaat, tamatumani piginnittup uumasutini tassani paarineqartussanngorlugu, nerisinneqartartussanngorlugu ineqarfigigallagaanullu tunniuttarjaa. Qimminut ineqarfiit tassaatinneqarput qimuttunik qimminik piaqqititsivik tuniniaanissaaq siunertarineqarluni, qimuttunik qimmilinnut nammineq qimmissaminik piaqqiortitsisumut allaanerullutik.

Imm. 2-mut

Aalajangersakkami qimmit sungiusaaviinik ingerlatsinermut, piaqqiortitsinermut, allisaanermut, nipitartitsinermut kiisalu piaqqanik arnavissanillu ilumittunik paarsinermut paaqqutarinninnerlu pillugit Naalackersuisut ersarinnerusunik malittarisassiorsinnaasutut piginnaatinneqarput.

### § 30

Aalajangersakkami aalajangersarneqarpoq qimmit qimuttut piaqqat tunniunneqartigatik tunineqartigatilluunniit sivikinnerpaamik sapaatit akunnerinik arfineq-pingasunik utoqqaassuseqalereersimassasut. Aalajangersagaq § 11, imm. 4-mut ataqatigiitsinneqarpoq, taassuma kingorna qimmit qimuttut sapaatit akunnerinik arfineq pingasunik utoqqaassuseqalernissaasa tungaanut arnaanneeqatigitinneqassallutik. Aalajangersakkami qimmit qimuttut piaqqat piumasagaatit nunani tamalaani akuerisat naapertorlugit isumannaatsumik illersorneqarsinnaasumillu ineriartornissaat qulakkeerniarneqarpoq, taamaaliornikkut piaqqat arnaminnit perorsarluarneqassapput kiserlioratillu taamaaliornikkuttaaq peqqissuullutik peroriartorluassapput. Tamanna qimmiaqqap sapaatit akunnerinik arfineq-pingasunik utoqqaassuseqalernissaata tungaanut arnaaniisinneratigut qulakkeerluarneqarsinnaavoq, kiisalu qimmiaqqap sapaatit akunnerinik arfineq-pingasunik utoqqaassuseqalinnginnerani atugai allangoriataartinneqassanngillat. Taamaakkaluartoq taanna sioqqullugu qimmiaqqat tunineqarsinnaapput taakku arnaat ilanngullugu tunniunneqassappat.

### § 31

Aalajangersagaq naapertorlugu qimuttunik qimminik niuerneq pillugu Naalackersuisut pisariaqassappat ersarinnerusunik allaffissornikkut ilitersuusiornikkut malittarisassiorsinnaatinneqarput, Matumani ilaallutik pisinermi tunisinermilu nalunaaruteqarneq nalunaarutiginninnerlu, peqqissusaannut tunngasunut piumasagaatit, misissuinissamut piumasagaatit, passussinerit, assartuinerit, uninngatinneqarneri assigisaannullu tunngasut.

### § 32

Imm. 1-imut

Aalajangersakkami qimminik qimuttunik assartuineq illersorneqarsinnaasumik qimmillu qimuttup isikkua, peqqissusaa tarnikkullu pisariaqartitaat isiginiarlugit assartuisoqartassasoq aalajangersarneqarpoq.

Kialluunniit qimminik qimuttunik qimmeqarfiup iluani imaluunniit nunatta avataanut qimminik qimuttunik assartuerusuttup qimmit illersorneqarsinnaasumik assartorneqarnissaat isumagisussaavaa. Assartuineq pisariangippat qimmimut qimuttumut anniartitsissanngilaq aamma uippakajaartitsissanngilaq. Qimmit qimuttut aamma peqqissusaat assartuineri qularnaarneqassaaq,

taamaaliormermit tuniluttoqannginniassammat imaluunniit qimmeq qimuttoq nappaatinut timaatigullu ajoqusernissaa pitsaaliorneqassammat.

Imm. 2-mut

Angalaneq nal. akunnerni sisamani sivilunermiluunniit pippat qimmeq qimuttoq imissaqartinneqassasoq aalajangersakkami aalajangersarneqarpoq.

Imm. 3-mut

Aalajangersakkakut Naalackersuisut pisinnaatinneqarput qimminut kalaallit qimuttunik qimmeringisaannut qimuttoqarfikkoortunut ersarinnerusumik malittarisassiorsinnaatinneqarlutik. Aalajangersakkami immikkut sammineqarput qimminik qimuttoqarfinni mittarfiit nunanit tamalaanit tikinneqarsinnaasut inuillu Kalaallit Nunaannut Kalaallillu Nunaannit angalanerminnut atatillugu aqqusaartagaat. Aalajangersakkami Naalackersuisut pisinnaatinneqarput inunnut mittarfinnullu piomasaaqateqarnissamut kalaallit qimmiinik qimuttuunngitsunik qimuttoqarfikkoortunik illersorneqarsinnaasunik aaqqiinissamut tunngasut eqqarsaatigalugit. Piomasaaqatit ilaatigut tassaasinnaapput inissiigallarfinni atortunut kiisalu qimminik aqqusaartunut passussinerit ilaatigullu taakku pillugit uppersaatinut ilaatinneqartunut tunngasut.

## § 33

Imm. 1-imut

Qimminut qimuttunut napparsimmavinnik, nakorsiartarfinnik, angerlarsimatitsisarfinnik, paaqqinnittarfinnik assigisaannillu aaqqissuussineq ingerlatsinerlu taamaallaat Uumasunut Nakorsaaneqarfimmi akuersisoqarneratigut pisinnaasoq aalajangersakkami aalajangiunneqarpoq. Aalajangersakkami Uumasunut Nakorsaaneqarfiup qimmit qimuttut qanoq pineqartarneranik tamakkiisumik takunnissinnaanissaa kiisalu massuma Inatsisartut Inatsisaat malinneqarnersoq paasiniarlugu misissuiartorsinnaanissaa nakkutilliinissaalu qulakkeerneqassaaq.

Imm. 2-mut

Aalajangersakkami imm. 1 naapertorlugu napparsimmavinnik il.il. aaqqissuussinernut ingerlatsinermullu Naalackersuisut ersarinnerusunik allaffissornikkut ilitersuusiornikkut malittarisassiorsinnaatinneqarput, matumani akuersissuteqarnissamut piomasaaqatinut malittarisassat ilanngullugit.

## § 34

Qimminik paannitsitsinerit qimminik qimuttunik ajoqusiinnaasunik pisariaqanngitsumilluunniit eqqissiviilliuutaasinnaasunik artukkiinnaasunilluunniit aaqqissuussineq unammisitsinerlu aalajangersakkami inerteqqutaatinneqarput. Taamatuttaaq qimuttumik qimmerisamik taamaattunut peqataatitsinissaq inerteqqutaavoq. Taakkua saniatigut ajoqusernerit, tassaasut ajoqusernerit

suulluunniit aammalu eqqissiviilliornerit pisariaqarsorineqanngitsut immikkoortinneqartarnerat erseqqissarneqassapput. Ataatsimut isigalugu qimmit qimuttut ataatsimoortinnerisigut eqqissiviinnginnerusarput. Tamanna assersuutigalugu piniariarnissarsuaq sioqqullugu pisinnaasarpoq. Taamaattumik pisuni taakkunani qimmit qimuttut eqqissiviillioartarnerat taama ittuni peqataanissaannut taamaallaat tunngavilersuutaasinnaangilaq. Taamaattoq pissusiulersut nutaaq soorlu qimminik noqquutsitsinerit "dog-pulling"-imik taaneqartartoq assigisaaluunniit aalajangersakkami ilaapput taamaattumillu inerteqquataallutik.

## § 35

Qimussimik sukkaniunneq nalinginnaasutut qimminillu qimuttunik piaqqiortitsineq kalaallit ileqquisa ilaattut isigineqarnerat pissutigalugit qimussimik sukkaniunnerit aalajangersakkami ilaatinneqanngillat.

### Imm. 2-mut

Qimmit qimuttut qimussimik sukkaniunnermi peqataasussat qimmip sananeqaataa pissusaalu eqqarsaatigalugit sukkaniunnissamut unamminernilu assingusuni sungiusarneqarnissaat aalajangersakkami qularnaarniarneqarpoq. Sungiusaaneq qimmimit qimmimut assigiinngiiaarsinnaavoq, taamaammallu pingaaruteqarpoq sungiusaanermi tamatuma eqqumaffiginissaa. Qimmip qimuttup sananeqaataanut pissusaanullu tunngatillugu piumasaqaatinut tunngasut sukkaniunnerpamut tunngatillugu aamma atuupput.

### Imm. 3-mut

Aalajangersakkami qimmit qimuttut qaqugukkulluunniit isumassortumik pineqartassasut aalajangerneqarpoq taamaammallu ersarissumik aalajangersaasoqarluni sukkaniunnermi unamminernilu allani timikkut tarnikkullu pillaasarnermut tunngasunik. Tarnikkut pillaaneq timaatigut pillaanermi (anniartitsineri) misigisimasaanik eqqaasitsinikkut qimmimik qimuttumik pillaasoqartarpoq. Assersuutigalugu kalunnernik nipiliortitsineri qimmeq qimuttoq sukkannerusumik tunuartinneqartarluni. Tamanna pisinnaavoq, tassa qimmip qimuttup siornatigut anniarneq misigereernikuugamiuk (timaatigut pillarlugu) kalunnernik anaalertilluni, taamaammatt kalunnerit nipaannaaluunniit timikkut anniarneq eqqaamalersittarpaa qimmerlu qimuttoq qisuariartarluni.

Aalajangersakkami siunertarineqarpoq pillaaneq qimallugu pitsaasumik kajumilersitsisarneq atornerullugu ilisimallugulu qimmip qarasa kissaatigisamik ilioqqullugu (soorlu sukanganerulersillugu, nallartinniarlugu il.il.) qanoq sulisarnersoq. Tamanna isumassuilluni qimminik pinninnermut aamma qimminut qimuttunut eqqarsartariaasiannut atuuttumut appakaanniarnermut naapertuuppoq. Suliami tassani timikkut tarnikkullu pillaasarnernik paasinninneq pingaaruteqarpoq.

Imm. 4-mut

Aalajangersakkakut tassuuna qulakkeerneqassaaq illoqarfimmi/nunaqarfimmi/kommunimi qimmit qimuttut tassaniittut sorliunersut ilisimanissaat kiisalu naammattumik inissaqarnissaat qulakkeerneqassalluni. Pingaarnepaavorli nuuffimmi qimmit qimuttut eqqortumik akiuussuserneqarsimanersut nakkutigineqarsinnaappat, taamaaliornermi nappaataasinnaasut sumiiffimmut eqqunneqannginniassammata.

### § 36

Qimminut sukkaniunnermi imaluunniit unamminermi peqataasunut aamma arlalinnik aalajangersagaq piumasaqaateqarpoq. Qimmit pillugit maleruagassat malillugit aammalu Uumasunut Nakorsaaneqarfiup kaammattuutaat malillugit perlerornermut, qimmit nappaataanut parvovirusimullu akiuussutissamik kapineqarsimassapput atajuartussamillu ID-mik nalunaaqutserneqarsimassallutik kiisalu nunatsinni qimminut paasisutissani nalunaarsorneqarsimassallutik. Tassunga ilanngullugu piginnittup sukkaniunnermi aqutsisunut, kommunimut oqartussanullu qimmit qimuttut peqataasut tamarmik akiuussusersimanerannut ID-millu nalunaaqutsersimanerannut tunngasunik uppernarsaatini takutitsisinnaassaaq. Uppernarsaatit tassaasinnaapput kommunimit qimmit qimuttut tamarmik pillugit akiuussuserneqarsimanerannut ID-millu nalunaaqutsersimaneranut uppernarsaat.

Qimmip atianik allannerinnaq naammangilaq. Taamaasiortoqarpoq qimmit qimuttut akiuussutissanik kapineqarsimangitsut unammersuarnermi peqataasinnaaneri pinngitsoortinniarlugit. Qimmit qimuttut sukkaniunnermi unammisitsinerniluunniit peqataasut tamarmik minnerpaamik 12-it sinnerlugit qaammateqalereersimassapput peqataaniarunik. Tassani qimmip timaata sananeqaataa pissusilersortarnermigullu ineriartornissaat isiginiarneqarput, qimmillu pisariaqanngitsumik ajoqusersinnaanerini pinngitsoortinniarneqarlutik soorlu gigteqarnerup nungullarsimanerulluunniit kingunerisaanik anniaatinik annertusaasinnaasunik taamaasillunilu qimmit uummanerini sivikillisaataasinnaasut pinaveersaartinniarlugit. Utoqqaassusaannik taama killiliisoqarpoq ileqqutoqqat piniarnermilu kulturi paasillugit ataqqiniarlugit.

§ 36, imm. 1, nr. 4 naapertorlugu qimmeq qimuttoq sukkaniunnermut peqataanissamut piareersarneqarsimalluni sungiusarneqarsimassaaq taamaalilluni sungiusarnera qimmeq qimuttoq 12-nik qaammateqalinnnginnerani pisimassalluni. Uumasunut nakorsaqaarnikkut nunat tamalaat malittarisassaata malinneqassasut inassutigineqarpoq tassanilu piumasarineqarpoq qimmeq sukkaniunnermi peqataassaguni ikinnerpaanik 18-inik qaammateqassasoq.

Qimmit ilumittut milutsitsisulluunniit sukkaniunnermi peqataassanngillat, qimmip arnavissap timikkut tarnikkullu sananeqaataata innarlinnginnissaa eqqarsaatigalugu. Uumasunut Nakorsaaneqarfimmit qimmit arnavissat nuliusut piaqqineranniit siusinnerpaamik sapaatit akunneri 12-it qaangiutereerpata sukkaniunnermi peqataasinnaassasut inassutigineqarpoq.

### § 37

Sukkaniunnerup unammisitsinerulluunniit aallartinnnginnerani ersarissunik malittarisassaqaassasoq aalajangersakkami ersarissarneqarpoq. Allattukkat tamakkiisuunngillat. Sukkaniuttoqannnginnerani malittarisassat uumasunut nakorsaqaarfiup akuereqqaassavai. Aalajangersakkami siunertarineqarpoq sukkaniunnermi uumasut illersorneqarnissaasa qaffassarnissaat qimminillu qimuttunik isumassuinerup illersuinerullu patajaallisarnissaat.

#### Imm. 2-mut

Uumasunut Nakorsaaneqarfiup taassuma kingorna ataatsimut nalilersuereernermi sukkaniunnermut malittarisassanik allanik piumasaaqateqartoqassanersoq, taamaaliornermi qulakkeerniarlugu pingaartumik uumasunik illersuiniarnermi soorlu napparsimasoqalernissaa tunillaassuuttoqarnissaalu pitsaaliorniarlugit iliuuseqartoqarnissaa anguniarneqassammat.

### § 38

Qimmit isikkuannik, qasujaassusaannut pinertunerannullu iluaqusiisussanik nukkassaaitortinneqarnissaannut inerteqqummik aalajangersakkakut pilersitsisoqarpoq. Tamanna atuuppoq sungiusaanermi sukkaniutivinnertaanilu peqataanermi. Aamma tamanna atuuppoq pisuni qimmip qimuttup ajoqusersimalluni assersuutigalugu nipaallisaaitortariaqarnerani imaluunniit qimmip qimuttup sukkaniunnermi piginnaasaanik qaffatsitsisumik passunneqartariaqarneranik. Qimmip qimuttup nakorsaatini imm. 4-mi taaneqartunik katsorsarneqarsimannginnissaa piginnittup akisussaaffigaa.

#### Imm. 2-mut

Aalajangersakkami aalajangerneqarpoq imm. 4 naapertorlugu piginnittup akisussaaffigigaa qimmimi qimuttut sunik katsorsarneqarsimanerannik ilisimannissalluni, taamaalilluni qimmip qimuttup qasujaallisaatigisinnaasaanik sukkaniunnermi pitsaanagerusumik angusissutissaanik tunineqarnissaa pinngitsoortinniarneqassammat.

#### Imm. 3-mut

Aalajangersakkami uumasunut nakorsaatit qimmimut aqqatigut taasamut uumasut nakorsaannit taamaallaat tunniunneqarsinnaasut aalajangersarneqarpoq. Nakorsaat taanna qimmimut qimuttumut tassungaannaq atorneqarsinnaavoq.

#### Imm. 4-mut

Qimmip qimuttup § 38-mut akerliusumik pineqannnginnissaa piginnittup akisussaaffigigaa aalajangersarneqarpoq.

### § 39

Aalajangersagaq naapertorlugu Naalakkersuisut piginnaatinnearput sukasaatinik atuinermut nakkutilliinissamut malittarisassanik ersarinnerusunik aalajangersaasinnaanissamut, kiisalu sukkaniunnermi uumasunik nakkutilliinissamut misissuinissamullu tunngasut ilanngullugit.

#### § 40

Nappaalasoqalerneru imaluunniit nappaalasoqalernissaa aarlerinaateqarpat kiisalu qimmit qimuttut sukkaniunnermi peqataasut peqqissusaannut pissutsit navianartorsiortitsippata aalajangersagaq naapertorlugu Uumasunut Nakorsaaneqarfiup qimminik qimuttunik sukkaniutsitsinissaq unitsissinnaavaa sukkaniunnerulluunniit ingerlanneqarnissanut inerteqqutigisinnaavaa. Qimminut qimuttunut sukkaniunnermi peqataasunut pisariaqanngitsumik navianartorsiortitsisoqassappat aarlerinartorsiortitsissappalluunniit sukkaniunnissaq qimmit qimuttut peqqissusaanut aarlerinartorsiortitsisinnaatillugu Uumasunut Nakorsaaneqarfiup sukkaniunnissaq taamaatissinnaavaa kinguartissinnaalluguluunniit. Uani eqqarsaatigineqarput aputaasannera, sukkaniuffimmi nilakkarsimannera assigisaaluunniit sukkaniunnermi pitsaanngitsumik sunniuteqartussat eqqarsaatigalugit.

#### § 41

Aalajangersagaq aqqutigalugu sukkaniunnerup nalaanni qimmit qimuttut pituutaasigut kipineqarsimasut tiguneqartarnissaasa piginnittumit akisussaaffigineqarnera aalajangersarneqarpoq. Tamatuma saniatigut qimmip qimuttup ajoqusersimasup katsorsarneqarnissaa piginnittup pisussaaffigaa. Qimuttunik piginnittup nal. akunnerit sisamat iluanni qimmiminik tigusisimanngippat sukkaniunnermi aqutsisut kommunalbestyrelsi nalunaarfigissavaa, taamaaliornikkut qimmip qimuttup tiguneqarnissaa qulakkeerneqassammat. Sukkaniunnermi aqutsisut tassaapput inuk, imaluunniit inuit sukkaniunnerup ingerlanneranik inernerinillu aaqqissuussillutillu isumaginnillutik nakkutilliisut. Sukkaniunnermi aqutsisut qimmip qimuttup tiguneqarnissaa aammalu tigusiniarnerup isumannaatsumik pitsaasumillu ingerlanissaa qulakkeertussaavaat, taamaasiornikkullu qimmip pituutaminit kipineqarsimasup pisariaqanngitsumik ajoqusersinnaanissaa aallatigulluunniit ajoquserneqarsinnaanera pinngitsoortinneqassaaq.

Imm. 2-mut

Imm. 1 naapertorlugu qimuttunik piginnittup nal. akunnerit sisamat iluanni qimmiminik qimuttumik tigusisimanngippat qimmit qimuttut tiguneqarnissaat siunertaralugu kommunalbestyrelsi suliniutinik aallartitsissaaq.

Imm. 3-mut



Aalajangersakkami imm. 2 naapertorlugu kommunalbestyrelsip peqqusineratigut tigusiniarneq piginnittumut akiligassanngortinneqarsinnaasoq aalajangersarneqarpoq.

## § 42

Aalajangersakkami qimminik paatitsineq inerteqqutaasoq aalajangerneqarpoq tassanilu pineqarlutik qimmit marluk akornanni paatitsinissamik aaqqissuussineq ilaatigullu toqunissaata tungaannut paatinneqartussasut aaqqissuussinerit eqqarsaatigalugit. Qimminik paannitsitsisarneq aaqqissuussaasumik aaqqissuussaannngitsumillu pisinnaavoq. Qimminik paannitsitsineq aaqqissuussaannngitsoq tassaasinnaavoq qimmit qimuttut marluk piginnittuisa kajumissaarinerisigut suaarnerisigulluunniit imminnut saassunnerat. Qimminik paannitsitsineq aaqqissuussaasoq tassaakkajuttarpoq, qimminik paannitsitsineq siumut pilersaarutaareersoq, qimmit amerlanerusut peqataatinneqaraangata kiisalu nalinginnaasumik aningaasanik akissarsiassaqaaraangat. Qimminik paannitsitsineq aaqqissuussaasoq aaqqissuussaannngitsumut sanilliullugu annertunerusumik unioqqutitsinertut isigineqassaaq, pineqaatissiiniarnermi tamakkua erseqqissarneqassapput, taamaakkaluartoq pissutsit taakkua marluk inerteqqutaapput. Aaqqissuussisoqarsimappat aaqqissuussisoq, taamatuttaaq qimminik paannitsitsinermi peqataasunik qimminik qimuttumik arlalinnilluunniit piginnittoq aalajangersakkami pineqarput. Qimmip qimuttup isumaginissaa inuillu qimminik qimuttunik paarsitat qimminik qimuttunik isumagisaqarluarnissaannik qulakkeerinninnissamik piginnittoq tamatigut akisussaasuunera pissutigalugu piginnittoq qimminik paannitsitsinerup pineranik ilisimasaqanngikkaluartoq akisussaasuussaaq.

## § 43

### Imm. 1-imut

Aalajangersakkami qimmit qimuttut sananeqaataanik ipiusaasartaanillu atorluni naartutitsilernissaq piaqqiortitsinissarlu killilersorneqarput. Anisuunik embryoninillu inuit eqqussuinerat kalaallit qimmiisa qimuttut sananeqaatai eqqarsaatigalugit ajorseriarnissaannut aarlerinartorsiortitsisuupput. Illuatungaatigullu anisuumik mannessanilluunniit nuussisarneq qimmeqarfinit assigiinngitsuneersunik pilersaarusiukkamik kinguaassiortitsiniarnermut atorneqarsinnaavoq taamalu qimmit akuneqanngilersut akuneqaatigisinnaallugu. Taamatut piaqqiortitseriaatsip inerteqqutaalluinnarnissaanut taamaammat siunniussisoqanngilaq. Akerlianik inerteqquteqartoqarnissaanik inerteqqutilluunniit atorunnaarsinneqarnissaanik nalilersuinissamut pisuni ataasiakkaani uummasunut nakorsaqaarfiup nalilersuisinnaanissaa periarfissaalissaaq.

### Imm. 2-mut

Kalaallit qimmii anisuumik mannessanilluunniit nuutsivigineqassapput qimmeqatigiit sorliit tassunga atorneqassanersut pillugit Naalakkersuisut malittarisassiorsinnaanissamut piginnaatinneqarsinnaapput. Aalajangiisumik naliliinermi pingaarpoq qimmeqatigiit

aalajangersimasut sananeqaataasa kalaallit qimmiat qimuttoq ima allanngortitsigissagaa, allaat ajorseriaatsitut isigineqarsinnaassanersoq pillugu nalilersorluaqqissaarneqartariaqarpoq.

#### § 44

##### Imm. 1-imut

Aalajangersakkami misiligutissanik, paasissutissanik kisitsisitigullu paasissutissanik katersisarnerit kiisalu qimminik qimuttunik nakkutilliinerit misiligaanerillu uumasunut nakorsaaneqarfimmit akuerineqaqqaartarnissaat aalajangersarneqarpoq. Aalajangersakkakut qulakkeerniarneqarpoq uumasunut nakorsa qarfiup suliaasaqarfimmik nakkutilliisinaanissaa qimmillu qimuttut akuerisaanngitsunik nalorninartunillu il.il. misileraavigineqannginnissaannut illersuutaalluni. Kiisalu kalaallit oqartussaata kalaallit qimmiisa qimuttut qanoq pineqartarnissaannik tamakkiisumik aalajangiisuusumillu nakkutilliinissaannik aalajangersagaq qulakkeerinnittuussaaq.

##### Imm. 2-mut

Aalajangersakkami aalajangersarneqarpoq imm. 1 naapertorlugu akuersissuteqarnermi piunasaqaataassasoq imm. 1-imi allaaserineqartutut misileraanermut il.il. atatillugu paasissutissat katersorneqarsimasut Uummasunut Nakorsaaneqarfimmit tiguneqareersimassasut. Paasissutissat pineqartut Uumasunut Nakorsaaneqarfimmi piunasaqaatit akimorlugit tiguneqarsimanngippata akuersissutaasimasoq atorunnaarsinneqarsinnaavoq misiliinermilu akisussaasut akiliisinneqarnermikkut pineqaatissinneqarsinnaasut.

##### Imm. 3-mut

Aalajangersakkami imm. 2 naapertorlugu paasissutissat pillugit ilisimatitsisarnerit qanoq ingerlanneqartassaneri aallaaserineqarput. Piunasaqaatit malillugit kingusinnerpaamillu misiliinerup naammassinerani paasissutissat pisariaqartinneqartut Uumasunut Nakorsaaneqarfimmi tiguneqareersimassapput. Paasissutissat qanoq isikkoqartillugit nassiunneqartarnissaat Uumasunut Nakorsaaneqarfiup aalajangersartassavaa. Tamanna ilaatigut immersugassanik immersuinikkut imaluunniit qarasaasiaq aqquutigalugu immersuinikkut tassungaluunniit assingusumik pisinnaavoq.

##### Imm. 4-mut

Qimminik qimuttunik misileraaneq pillugu maleruagassanik erseqqinnerusunik aalajangersakkakut Naalackersuisut aalajangersaasinnaanissaannik pisinnaatinneqarput.

#### § 45

##### Imm. 1-imut

Aalajangersakkakut aalajangiunneqarpoq Naalackersuisut tassaassasut Inatsisartut inatsisaannik malinnittoqarnissaa nakkutigissagaat oqartussatullu akisussaaffigalugu ulluinnarni nakkutilliinerit oqartussatullu suliaasat kommunalbestyrelsinit suliakkiunneqarsimasut pitsaasumik inatsillu

malillugu suliarineqarnissaat, soorluttaa Naalakkersuisut namminneq nakkutilliinerminni ingerlaavartumillu nakkutilliinikkut Uumasunut Nakorsaaneqarfik aqutigalugu oqartussatut suliasatik suliarissagaat.

#### § 46

Aalajangersakkami kommunalbestyrelse taassungalu oqartussaasut, tassa qimminik nakkutilliisut, akiuussutissanik kapuuisartut allallu immikkut ittumik oqartussaasut najukkanik ilisimaqarnermikkut tunngavississimanertillu pissutigalugit nalinginnaasumik oqartussaasut inatsimillu nakkutilliisuusut aalajangerneqarpoq. Taamatutaaq kommunalbestyrelsi inatsimmi ersarissumik allasimappat aamma kommunalbestyrelsi uumasoaqarnermut tunngasunik aamma paasissutissaatitaanermik, pissutsinik Uumasut nakorsaqaarnikkut oqartussaaffiup ataniittut aamma Uumasunut Nakorsaaneqarfimmiittut najuutinngikkaangata nalornissuteqaraangamilu Uumasunut Nakorsaaneqarfimmut paasiniaasassasoq peqquneqarpoq.

#### Imm. 1-imut

Aalajangersakkami inatsimmi aalajangersakkat kommunalbestyrelsip nakkutigisai aamma aalajangersakkat peqqussuteqaarnikkut inerteqquteqaarnikkulluunniit malinneqarnissaannik qulakkiiqassai immikkut ittumik nassuarneqarput. Taamaalilluni kommunalbestyrelsip nakkutigisai tassaalerput tullinnguuttut pillugit pissutsit nalinginnaasut ilaapput, tassalu pissutsit qimuttunik qimmeqaarnermut, tassunga ilanngullugit akuersissutinik qinnuteqaatinik suliarinninnerit, nalunaaqutsersuinerit, akiuussutissanik kapuuisimanernik nalunaarsuinerit, qimmiliviit, malittarisassat, kommunip ilaani qitsuuteqaqqusaananilu qimmeqaqqusaannginnerit, qimminik qimuttunik qimatsinnaqusaannginnerit, qimmit pillugit kommunimi ileqqoreqqusat kiisalu uumasunik il.il. katsorsaanerit.

#### Imm. 2-mut

Aalajangersakkami kommunalbestyrelsip pissutsit uumasunut nakorsaqaarfimmit aamma uumasut ikinngutaannit ilisimasariaqartut pineqartillugit Uumasunut Nakorsaaneqarfimmut paasiniaasussaatitaavoq, soorlu tullinnguuttut makku nalilersorneqassappata, qimmeq kiisornersoq, tak. § 15, imm. 1, qimmeq kiisippat, tak. § 15, imm. 2, qimmip sumit kingoqqisuunera, tak. § 5, toqutsisoqartariaqarnersoq, tak. § 5, imm. 4, § 12, imm. 3 aamma § 49, imm. 2, kiisalu kommunalbestyrelsi uumasunut tunngatillugu pissutsinik nalornisaqaraangami, soorlu qimmeq qimuttoq imminut illersorneqarsinnaanngitsumik pineqarsimanersoq, tak. § 8 aamma § 49.

Aamma kommunalbestyrelsi oqartussaasutut akisussaaffimminik nalornissuteqartillugu paasiniaasussaatitaaneq aamma atuuppoq, tamatumani Uumasut nakorsaqaarnikkut oqartussaaffimmik oqaloqateqaarnermigut iluarsiiiffiginiartussaavai, Uumasunut Nakorsaaneqarfik tassaavoq Naalakkersuisut suliasaqaarfimmi oqartussaasui uumasunut tunngatillugu immikkut ittumik pisariaqartinneqartunik ilisimasaqarfiusoq, tak. § 47.

Imm. 3-mut

Aalajangersakkami kommunalbestyrelse pissutsinik inatsisit malillugit Uumasunut Nakorsaaneqarfimmit akuliuffigineqartariaqartunik eqqumaffiginnileraangami taakkununga nalunaartussaataitaasoq aalajangersarneqarpoq. Aalajangersakkami pissutsit tamakku uumasunik immikkut ilisimasalinnit nalilersorneqarnissaat qulakkeerneqarpoq aamma pissutsinut illoqarfimmi nunaqarfimmiluunniit uumasunut nakorsaqaanngitsunut aamma pissutsit oqarasuaatikkut allakkatigulluunniit paasiniaaffigisariaqartut pineqartillugit, tamannali aamma uumasut nakorsaat qanittumiippat sulianilu tunngavigalugit nalilersuiartoqqullugu aggersarneqarnissaa immikkut isiginiarneqarput.

## § 47

Imm. 1-imut

Uumasunut Nakorsaaneqarfik inatsimmut tunngatillugu uumasunut pingaarnertut oqartussaataitaalluni aamma aalajangersakkanut allanut immikkut ittunut akisussaasuvoq, tassani immikkut allassimavoq aamma kommunalbestyrelsip aalajangiineri pillugit naammagittaalliortarfiuvoq, tak. § 29, taamaattorli Uumasunut Nakorsaaneqarfimmik siunersiuilluni aalajangiinerunngitsunut. Uumasunut Nakorsaaneqarfiup Inatsisartut inatsisaat una malillugu oqartussaanini suliarisarpaa nakkutilliiartorluni namminerlu nakkutilliilluni kiisalu kommunalbestyrelsimit allanillu pissutsit Inatsisartut inatsisaannut ilaasunik tunngasunik saaffigineqaraangami ilisimasaqaleraangamiluunniit. Tamanna aamma atuuppoq Uumasunut Nakorsaaneqarfiup uumasunik illersuiniarluni inatsit malillugu oqartussaaffini suliaralugu Inatsisartut inatsisaannut uunga ilaasunik pissutsinik ilisimasaqalersimaguni.

Imm. 2-mut

Aalajangersakkami Uumasunut Nakorsaaneqarfik najuussinnaanngikkaangat tamakku kommunalbestyrelsip piviusunngortittusssaagai aalajangersarneqarpoq. Aalajangersakkami nunaqarfimmi illoqarfimnilu Uumasunut Nakorsaaneqarfik tassaniluunniit oqartussaasut najuutinnginneranni pissutsit ilaatinneqarput aamma pisuni kommunalbestyrelsip oqartussanera inuttut pissutsit pissutsilluunniit allat pissutigalugit Uumasunut Nakorsaaneqarfimmi aalajangikkat piviusunngortinnissaannut tunuarsimaarsimappat.

Suliani Uumasunut Nakorsaaneqarfik najuussinnaanani suliamilu aalajangersimasumi passussineq pisariaqartutut isigineqarpat, ass. uumasooq napparsimappat anniarpalluunniit imminut isumagisassanngorluni tuniluuttoqarnissaaluunniit aarlerinaateqarpat Uumasunut Nakorsaaneqarfik imm. 1 naapertorlugu inuit piginnaatissinnaavai suliamut naammattumik ilisimasaqartutut nalilerneqarpata. Piginnaatitsineq inummut tunngasuusaaq pisumullu aalajangersimasumut iliuusissanik aalajangersimasunik ilaqassalluni inunnullu suliamik suliarinnissinnaasutut nalilerneqartunut nalunaarutigineqassalluni. Piginnaatitsineq piffissamut killiligaanngitsumut tunniunneqarsinnaanngilaq, tunngaviatigullu suliami pineqartumi piffissamik pisariaqartitsineq naapertorlugu naatsorsorneranit sivisunerussanani. Taamatuttaaq piginnaatitaasumik

kinaassusersineq aamma taassuma allakkianik pissarsiniarnermini pissusilersuutai pillugit piumasagaatit atuupput, tak. naleqqiussinermik tunngaveqarnej, soorlu imm. 1-imi.

Imm. 3-mut

Aalajangersakkami aalajangerneqarput Uumasunut Nakorsaaneqarfiup pisinnaatitaaffii kiisalu eqqartuussiviit aqputigeqqaarnagit nakkutilliisoqarsinnaaqullugu qulakkeerneqarluni.

Aalajangersagaq naleqqiussinermik tunngaveqarnej annikitsumillu akuliunnerit isigalugit atuutissaaq taamaattumillu nakkutilliisut aalajangersakkamik atuinnginneranni atorniarsarineqassalluni. Piginnittoq nakkutilliisunik najukkami pineqartumi assartuussisumilluunniit pisariaqartinneqartunik uppersaatinik saqqummiussinissaanut atugassiissasoq kaammatorneqassaaq. Akuliunnerni annikinnerit misilinneqareerpata naammagatillu Uumasunut Nakorsaaneqarfik aalajangersakkami allaqqaneratut iliuuseqarsinnaatitaavoq.

Aalajangersakkami aalajangerneqarpoq Uumasunut Nakorsaaneqarfiup nakkutilliinnginnermini piginnittoq naapineqarsinnaappat ilaqutaaluunniit angerlarsimappata piginnittumut kinaassutsiminnik takutitsisussaallutik. Akuliunneq § 23, imm. 3-mi nassuiarneqartoq annertuumik akulerunneruvoq taamaammallu tamanna Uumasunut Nakorsaaneqarfimmit aallaaviatigut suliarineqassalluni.

Imm. 4-mut

Suliani Uumasunut Nakorsaaneqarfik najuussinnaanani suliamilu aalajangersimasumi passussineq pisariaqartutut isigineqarpat, ass. uumasooq napparsimappat anniarpalluunniit imminut isumagisassanngorluni tuniluuttoqarnissaaluunniit aarlerinaateqarpat Uumasunut Nakorsaaneqarfik imm. 1 naapertorlugu inuit piginnaatissinnaavai suliamut naammattumik ilisimasaqartutut nalilerneqarpata. Piginnaatitsineq inummut tunngasuusaaq pisumullu aalajangersimasumut iliuusissanik aalajangersimasunik ilaqassalluni inunnullu suliamik suliarinnissinnaasutut nalilerneqartutut nalunaarutigineqassalluni. Piginnaatitsineq piffissamut killiligaanngitsumut tunniunneqarsinnaanngilaq, tunngaviatigullu suliami pineqartumi piffissamik pisariaqartitsineq naapertorlugu naatsorsorneranit sivilunerussanani.

## § 48

Aalajangersakkami aalajangerneqarpoq qimminik qitsunnillu illersorneqarsinnaanngitsumik pinnittoqarpat nalunaartussaataaneq nalinginnaasoq, taassumalu saniatigut pissutsit taama ittut pasitsaanneqarpata aamma nalunaartussaataanermik ilaneqarluni. Aalajangersagaq uumasunik qanoq pinnittarnermik ilisimasaqalernerulernermik taamalu malittarisassiulernernik tunngaveqarpoq, taamaalillunilu anguniarneqarluni inuit qitsunnik qimminillu ikioqatigiillutik illersuisarnissaat, kiisalu qulakkeerniarneqarluni suliaassaqarfimmi akisussaasut, kommunit

qimminut nakkutilliisui uumasulluunniit nakorsaat illersorneqarsinnaanngitsumik pinnittoqarsorineqarpat ilisimatinneqarnissaat.

## § 49

### Imm. 1-imut

Aalajangersakkami kommunalbestyrelsit pisinnaatinneqarput qimminik qimuttunik illersorneqarsinnaanngitsumik pineqarpata akulerussinnaallutik piginnitorlu uumasut qanoq pineqarnissaannik pesussaaffilerneqarsinnaalluni. Tamanna aamma allat imminut illersorneqarsinnaanngitsumik pinnippata atuutissaaq.

### Imm. 2-mut

Kommunalbestyrelsip uumasut nakorsaat isumasioqatigereerlugu uumasut uummaannartinneqassappata pisariaqanngitsumik anniartinneqarnerannik kinguneqarpat piginnittoq peqqusinnaavaa qimmikt qimuttoq toqoqqullugu.

### Imm. 3-mut

Aalajangersakkami saqqummiunneqarput pesussaaffiliinermi toqutsinermilu periaasissat, matumanilu piginnittumut tusarniaasussaaneq ilanngullugu eqqarsaatigalugu. Tullinnguuttut naapertorlugit peqqussut § 49, imm. 3 allakkatigut nalunaarutigineqassaaq tamannali sioqqullugu Uumasunut Nakorsaaneqarfimmit nalilersuiffigineqaaq aamma piginnittoq oqaaseqarnissaminut periarfissaqassaaq. Kisianni uumasup annertunerusumik anniaateqarnissaa pinngitsoortinniarneqassappat imaluunniit piginnittoq aallarsimasimappat suliami allakkatigut peqqussut saneqqunneqarsinnaavoq, § 49, imm. 5, aamma piginnittumut taarsiissuteqarani toqutsisoqarsinnaavoq, tak. § 49, imm. 5.

### Imm. 4-mut

Aalajangersagaq uumasup annerusumik anniannginnissaa anguniarlugu uumasup sooq toqunneqarasuarnissaanik tunngavimmik ajornanngippat uumasullu nakorsaanit eqqorsuorisamik naliliinikkut allakkatigut peqqussuteqarnissamik tusarniaanissamillu imm. 3-mi piumasaqaammik sanioqutitsinissamik tunngavissiivoq. Piginnittoq aallaqqappat tamanna uumasumik imminut illersorneqarsinnaanngitsumik iliornerussaaq aamma allakkatigut peqqussut illua´tungiliuttutullu tusarniaaneq taamatut saneqqunneqarsinnaapput. Qimmeq qimuttoq pigisatut piginnittumut allamut tunineqarsinnaasutut imaluunniit toqunneqarsinnaasutut isigineqassaaq, naleqquttumik allamik piginnittussamik nassaartoqanngippat.

### Imm. 5-imut

Aalajangersakkami piginnittoq nammineerluni qimmimik qimuttumik ajoqusiisimaguni aamma uumasunut nakorsat kingusinnerusukkut naliliinerisigut qimmeq qimuttoq piginnittumit,

kommunalbestyrelsimit Uumasunut Nakorsaaneqarfimmit toqunneqarpat piginnittoq taarsiisussaataasutut akisussaatinneqarsinnaangilaq. Qimmeq qimuttoq inummit allamit ajoquserneqarpat taarsiisussaataanermut malittarisassat nalinginnaasut atuutissapput.

## § 50

### Imm. 1-imut

Aalajangersakkami peqqussutit inerteqqutillu naammattumik piffissaqarluni suliarineqartarnissaat aalajangersarneqarpoq, taamaasiornikkut peqqussutip inerteqqutilluunniit malitseqartinneqarnissaannut piginnittoq periarfissinniarlugu qulakkeerneqassammat. Taamaattoq naammattumik piffissaliilluni nalunaaruteqarnerup nal. akunnerit 72-it qaangissanngilai. Piffissaliussap kinguninngua peqqussut inerteqqulluunniit piginnittumit malinneqarsimanersoq oqartussat qulakkeerlugu paasiniassavaat.

### Imm. 2-mut

Aalajangersakkakkut aalajangersarneqarpoq peqqussutit inerteqqutillu ingerlaannartumik malitseqartinneqartassasut taamaasillunilu qimmit qimuttup naalliunnissaralua pinngitsoortinniarlugu nalunaaruteqartoqaqqaarnissaa utaqqeqaartariaqarani. Tassalu uani pineqarpoq peqqussutit inerteqqutillu piginnittumit akisussaaffigineqartut pisariaqanngitsumik utaqqissuteqaarnagit ingerlaannartumik malitseqartinneqartarnissaat. Taamatut pisoqanngippat oqartussat qimmeq qimuttoq pisariaqartillugu toquttariaqassavaat piginnittorlu politiinut unnerluutigalugu,

## § 51

### Imm. 1-imut

Aalajangersakkami § 46-mi peqqussut inerteqqulluunniit malinneqanngippata kommunalbestyrelse imaluunniit Uumasunut Nakorsaaneqarfiup qimmeq qimuttoq illersorniarlugu piginnittussamut allamut naleqquttumut nalunaarsorsinnaavaat qimmimut illersuisinnaappat, tassa qimmip qimuttup peqqissusaa naapertorlugu tamanna illersorneqarsinnaasumik pisinnaappat. Tamanna pisinnaanngippat kommunalbestyrelsi imaluunniit Uumasunut Nakorsaaneqarfik sulissuteqassaaq qimmip qimuttup toqunneqarnissaa anguniarlugu, imaluunniit allat naleqquttutut nalilerneqartut, assersuutigalugu piniarnermut nakkutilliisut imaluunniit piniartut ilisimaneqartut toqutsinissaannut piginnaatinneqarsinnaapput piginnittumullu akiligassiisutaasumik toqutsinissaannut. § 14-mi allassimasut naapertorlugit toqutsisoqassaaq.

## § 52

Aalajangersagaq aqutigalugu nalunaaruteqarnek, peqqussutit inerteqqutillu pillugit Naalakkersuisut ersarinnerusumik malittarisassiorsinnaanissaminnut piginnaatinneqarput.

## § 53

Aalajangersakkami kommunalbestyrelsip aalajangiinera Uumasunut Nakorsaaneqarfimmut naammagittaalliuutaasinnaasoq allassimavoq, kisianni suliassaniunngitsoq oqartussaasut marluit taakku siunersioqatigiillutik aalajangiisimappata. Kingullertulli taaneqartoq pillugu naammagittaalliortoqarsinnaanngilaq. Oqartussaasut marluk taakku naammagittaalliornissamut ilitersuusiortussaataapput.

## § 54

### Imm. 1-imut

Aalajangersakkami paragraffinik assigiinngitsunik aalajangersimasunillu unioqquitsinerit Kalaallit Nunaanni Pinerluttulerinermut inatsimmi malittarisassat malillugit akiliisitsinermik kinguneqarsinnaaneri aalajangersarneqasimapput.

### Imm. 2-mut

Aalajangersakkami allaffissornikkut najoqqutassanik inatsisartut inatsisaat manna naapertorlugu suliareqarsimasunik unioqquitsinerit Kalaallit Nunaanni Pinerluttulerinermut inatsit naapertorlugu pineqaatissinneqarnermik kinguneqarsinnaaneri aalajangersarneqarpoq.

### Imm. 3-mut

Aalajangersakkami erseqqissaatigineqarpoq aalajangersakkanik sakkortuumik imaluunniit uteqqiattumik unioqquitsinerit Kalaallit Nunaanni Pinerluttulerinermut inatsit naapertorlugu qimminik qimuttunik sunilluunniit passussinissamut qimmeqarnissamulluunniit inerteqqusiinermik pineqaatissiisoqarsinnaasoq.

### Imm. 4-mut

Aalajangersakkami qimuttunik qimmeqarsinnaanerup imaluunniit qimuttunik qimminik suliaraqarnissap imm. 3, malillugu inerteqqutigineqarnissaa pineqaatissiissutigineqarpat tamanna atajuartussatut imaluunniit sivikinnerpaamik ukiunut marlunnut pisinnaanera aalajangersarneqarpoq. Inerteqqutinik taama ittunik unioqquitsinerit Kalaallit Nunaanni Pinerluttulerinermut inatsimmi malittarisassat malillugit pineqaatissiinermik kinguneqarsinnaapput., soorlu parnaarussaaneermik.

### Imm. 5-imut

Aalajangersakkami inuit inatsisit malillugit akisussaasut Kalaallit Nunaanni Pinerluttulerinermut Inatsit naapertorlugu akiligassinneqarsinnaasut aalajangersarneqarpoq.

## § 55



Imm. 1 aamma 2-mut

Aalajangersakkami unioqutitsinerit akiliisitsinermit qaffasinnerusumik kinguneqassanganneqanngitsut inullu pineqartoq unioqutitsinermit pisiusutut nassuerpat piffissaliunneqartullu ersarinnerusup ingerlanerani akiligassanngortitap akilernissaanut piunassuseqarluni nassuerpat, suliaq eqqartuussivimmi suliarineqanngitsumik aalajangiiffigineqarsinnaasoq aalajangersarneqarpoq. Tamannattaq pigisanik nalilinnik arsaarinninnermi atuuppoq. Taamaasiornikkut suliaassat pisariunngitsutut isikkoqartut piaartumik isumannaatsumillu suliarineqartarsinnaanissaat qulakkeerneqassaaq.

Kommunalbestyrelsi aalajangersagaq taanna naapertorlugu allaffissornikkut akiliisitsissappat innuttaasoq Eqqartuussisarnermi inatsimmi unnerluussutit imarisai pillugit malittarisassanik aamma pasillerneqartoq pinngitsaalillugu oqaaseqartinniarneqarsinnaanngitsaq, nammineq naammagittaalliorsinnaatitaanera, tamatumani Uumasunut Nakorsaaneqarfik naammagittaallioortarfiulluni, pillugit ilisimatinneqassaaq. Aalajangersagaq taanna akiliisitsinernik arsaarinninnermi pisunik isertitanik Naalakkersuisunut tigusaqarsinnaalersitsivoq, taamaalillutik Nunatta Karsianut tuttussaallutik.

## § 56

Imm. 1-imut

Inatsisartut inatsisaata atuutilerfissaa tassaavoq 1. juli 2022.

Qimmeqarneq qitsuuteqarnerlu pillugit Inatsisartut inatsisissaattut siunnersuut inatsisartut inatsisaat manna peqatigalugu akuerineqartussatut naatsorsuutigineqartup qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktober 1998-imeersoq kiisalu qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktober 1998-imeersumi § 13, imm. 2 naapertorlugu atulersinneqartoq kommunit qimmit qitsuillu pillugit ileqqoreqqusaat pillugit Namminersornerullutik Oqartussat nalunaarutaat nr. 15 ulloq 19. juni 2003-meersoq atorunnaarsippai.

Imm. 2-mut

Aalajangersakkami aalajangerneqarpoq qimminik qimuttunik qimmiuteqarnermik malittarisassaqtitsisut kommunimi ileqqoreqqusat qimmeqarneq qitsuuteqarnerlu pillugit ileqqoreqqusanik nutaanik taarserneqarnissami tungaanut atuutiinnassasut. Tamatumani tulliuttut pineqarput: Kommune Kujallermit qimmeqarnermut qitsuuteqarnermullu ileqqoreqqusaq, Kommuneqarfik Sermersuumi qimmeqarnermut ileqqoreqqusaq, Qeqqata Kommuniata qimmeqarnermut ileqqoreqqusaa kiisalu Qeqqata Kommuniata qitsuuteqarnermut ileqqoreqqusaa.

## Tusarniummut akissuteqaat

### Oqartussaasut suleqatigiiffiillu il.il. tusarniaavigineqarnerat

Kalaallit qimmiinik qimuttunik qimmiuteqarnermut illersuinernullu tunngasoq siunnersuut piffissami 15. september 2021-mit 14. okotber 2021-mut tusarniaassutigineqarsimavoq.

Siunnersuut piffissami tassani [www.naalakkersuisut.gl-imi](http://www.naalakkersuisut.gl-imi) Naalakkersuisut tusarniaasarnermut nittartagaanni tamanut saqqummiunneqarpoq.

Kalaallit qimmiinik qimmeqarneq illersuinerlu pillugit siunnersuut ukununga tusarniaassutigineqarpoq:

Sulisitsisut, KNAPK, Kalaallit Nunaanni Politiit, Naalakkersuisut Siulittaasuata Naalakkersuisoqarfia, Pinngortitamut Avatangiisinullu Naalakkersuisoqarfik, Aningaasaqarnermut Naalakkersuisoqarfik, Aatsitassanut Naalakkersuisoqarfik, Ineqarnermut Attaveqarnermullu Naalakkersuisoqarfik, Ilinniartitaanermut, Kultureqarnermut Ilageeqarnermullu Naalakkersuisoqarfik, Isumaginninnermut Inatsisinillu Atuutsitsinnermut Naalakkersuisoqarfik, Inuusutissarsiornermut, Nukissiornermut, Ilisimatusarnermut Suliffeqarnermullu Naalakkersuisoqarfik, Nunanut Allanut Tunngasunik Naalakkersuisoqarfik, KNQK, QIMMEQ, Pinngortitalerivik, WWF Kalaallit Nunaat, Issittumik Sakkutooqarfik, Fødevarestyrelsen i Danmark, Avannaata Kommunia, Kommune Qeqertalik, Qeqqata Kommunia, Kommune Kujalleq, Kommuneqarfik Sermersooq.

Uku inatsisissamat siunnersuummut oqaaseqaatissaqarsimapput:

Suliffeqarfiup iluani tusarniaaffigisanit akissutit tiguneqartut ilannguneqarsimapput, kisianni oqaaseqaatini ataani allassimasunut ilannguneqarnatik.

Ataani allassimasuni ilanngunneqarnerani allangortinneqarsimasunik tusarniaaffigisamiit aalajangersakkamat innersuussisoqartillugu inatsimmi aalajangersagaq allangortinneqarsimasoq inaarutaasorlu ungaluutini ( ) takuneqarsinnaassaaq.

"Kalaallit Nunaanni Sulisitsisut naammagisimaarpaat pitsaanagerusumik aqutsisoqarneratigut aamma uumasut nakorsaqaarnermut oqartussat aamma kommunit akornanni erseqqinnerusunik malittarisassaqaarnikkut akisussaaffiillu agguarneqarnerisigut qimmit qimuttut, qimmit qitsuillu pillugit inatsisissatut siunnersuutini marlunni tamakkiisumik paasisaqarsinnaaneq anguniarneqarmat, suliat ataasiakkaat tusagassiorfitsigut saqqummiunneqaraangata tamanna unammillernartuusinnaammat. Inatsisissatut siunnersuutit marluusut eqqarsaatigalugit taaguut

"Kalaallit Nunaanni qimminik qimuttoqarfiit" atorneqarpoq. Qimminik qimuttoqarfiit sumiinneri kikkunnit tamanit naluneqanngikkaluartut - imaluunniit tamanna ilimagisariaqarluni inatsisip nunami atuuffigisaa killilerniarlugu sumiiffik pillugu nasuiaateqarnissaq inissaminiippoq. Taamaaliorqarpoq paatsoorsinnaanerit peerniarlugit. Kalaallit Nunaanni Sulisitsisut inatsisissatut siunnersuummut allanik oqaaseqaatissaqanngillat."

*Akissut: Qimminik qimuttoqarfiit inatsisissatut siunnersuummi § 2-mi nunami naleqqat iluaqutigalugit allaaserineqarput, inatsimmullu ilanngussatut sumiiffik pillugu nunap assiliorqarsimalluni.*

### Kalaallit Nunaanni Politiit:

"Kalaallit qimmiinik qimuttunik qimmeqarnek illersuinerlu pillugit Inatsisartut Inatsisissaattut siunnersuummi siunnersuutigineqarpoq § 6, imm. 2 imatut oqaasertalerneqassasoq:

*"Qimminik qimuttoqarfiusunut qimminik qimuttuunngitsunik eqqussinissaq sunaluunniit inerteqqutaavoq, taamaattoq imm. 3 takuuk."*

Tassunga oqaatigineqassaaq akiliisitsinermik imaluunniit arsaarinninnermik taamaallaat kinguneqartumik unioqqutitsinernut tunngasut pinerluttulerineri inatsisini akisussaaneq inatsimmik unioqqutitsinermit ukiut marluk kingorna pisoqalisooortartoq. Tamanna pinerluttulerineri inatsimmi § 21, imm. 1, nr. 1-imi takuneqarsinnaavoq. Aalajangersakkatut siunnersuutigineqartumi qimminit qimuttunit allaanerusunik qimminik allanik *eqqussineq* kisimi pinerluttuliorninngortinneqarpat eqqussinerup pineraniit ukiut marluk sinnerlugit ingerlasimasoqarpat suliamik Kalaallit Nunaanni Politiit taamaalillutik malinnaasinnaassanngillat.

Qimminik qimuttunik allaanerusunik qimminik allanik *pigisaqarneq* aamma pinerluttuliorninngortinniarneqarpat tamanna aalajangersakkami erseqqissumik takuneqarsinnaasariaqarpoq. Kalaallit Nunaanni Politiit kalaallisut danskisulli inatsimmi oqaasertat imminnut naapertuunnersut isummerfigisimanngilaat. Kalaallit Nunaanni Politiit ataani allassimasunut atatillugu allanik iliuseqassanngillat.

*Akissut: Naalakkersuisoqarfik isumaqataavoq aamma § 6, imm. 2-mut "pigisaqarneq" ilanngussimallugu.*

Kommune Kujalleq kalaallit qimmii qimuttut pillugit inatsisissatut siunnersuummut tunngasumik tusarniaanermi akissutit nassiuuneqarnerinut qujavoq maannakkullu inatsisip, kalaallit qimmii qimuttut aamma qimmit allat qitsuillu pillugit inatsisinut marlunnut tunngasunut immikkoortilerneru

tapersorsorlugit, aamma kalaallit qimmiinik qimuttunik qimmeqarneq illersuinerlu pillugit Inatsisartut Inatsisissaattut siunnersuummut allanik oqaaseqaateqarnani.

*Akissut: Naalackersuisoqarfik uppernarsaavoq.*

Kommuneqarfik Sermersuumi sumiiffimmi ataatsimiititaliaq imatut oqaaseqaateqarpoq:

1. Ittoqqortoormiini nunaminertamik qimmit pitutorfissaannik amigaateqarpoq
2. Kalunnerit 3-4 meterit takivallaarput, tassa nunaminertaq amigaataammat aamma Ittoqqortoormiini maani arlalissuit 10-15-it missaannik qimmeqartarmata, ataaseq 15-inik qimmeqartoq 60 meterinut naapertuuttumik nunaminertamik peqassappat, aamma Ittoqqortoormiini qimmiutillit ukiuunerani qimmitik sikumut nuuttarlugit, tassa Ittoqqortoormiini 8-10 meterimik apisarmat.

*Akissut: Inatsimmi malittarisassanut kiisalu qimminik qimuttunik isumassuisumik pinninnissaq pillugu uumasut illersugaanerit pillugu inatsimmi malittarisassanik naammassinnittumik qimmit inissaannik qeqertanillu qimmiliviusussanik nunaminertanik tulluurtunik nassaarnissaq kommunalbestyrelsip nammineq aalajangissavaa. Inatsimmi sumiiffinni pissutsinut kommunimi ileqqoreqqusat tulluarsarsinnaanerit periarfissiisoqarpoq, soorlu aamma qillerneqarsimasunut pituffissanut aalangersimasut kalunnit atornerqarsinnaasut kiisalu kalunnit angalanermi atornerqarsinnaasut apisarnermullu tulluarsarsimasut, kisianni § 13-mi piumasagaatip qulakkiissavaa qimmit qimuttut naannerpaamik 3 meterimik aalaffissaqartinneqassasut, qaqutigoortumillu utaqqiisaasumillu taamaallaat saneqqunneqarsinnaasooq, assersuutigalugu angalanerni aamma immikkut silami pissutsini.*

Issittumi Sakkutooqarfik makkuninnga oqaaseqaatissaqarpoq:

"§ 22-mi uumasut nakorsaqaarnerit pillugu inatsimmut tunngasut sammineqarput. Sakkutuut Uumasut nakorsaqaarnikkut nakkutilliisuat piffissami sumiiffimmi uumasut nakorsaqaarfiunngitsumi piffissani napparsimasoqalersillugu imaluunniit ajutoortoqartillugu sakkutuut qimminik qimuttullit qimussertut pisariunngitsunik nakorsaanikkut pilattaanikkullu akuliunissamat uumasut nakorsaqaarneq pillugu inatsimmiit immikkut akuerineqarsimapput. Immikkut akuersinermut piumasarineqarpoq sulisut siumoortumik naleqquttumillu ilinniartitaanissaat, Sakkutuuni uumasut nakorsaasa arlaannut assersuutigalugu oqarasuaatikkut sillimasumut uumasup nakorsaanut atassuteqarnissaq pillugu piumasagaat kiisalu angalanermi allattuisarnissaq akuttunngitsumillu nakkutilliisarnissaq iliuuseqartarnissarlu. Nakkutilliineq sakkutuut uumasut nakorsaata silasiorfinnut ukiumut marloriarluni tikeraartarneratigut ingerlanneqartarpoq. Taamatut immikkut akuersineq Fødevarestyrelsimit tunniunneqarsimavoq.

Namminersorlutik Oqartussat aamma suliassaqaarfimmi uumasut nakorsaqaarnikkut immikkut akuersinissaq kissaatigissappasuk suliassaqaarfimmi kingorna oqaloqatigiinnermi Issittumi

Sakkutooqarfik aamma Sakkutuut peqqinnissakkut Naalackersuisoqarfia peqataasinnaapput. Silasiorfinni pissutsit Sakkutuut uumasut nakorsaqaarnikkut nakkutilliisuanit akuerineqarsimapput aamma suliasaqaarfimmi kalaallit kiisalu danskit inatsisaannik tamakkiisumik naammassinnillutik."

*Akissut: Naalackersuisoqarfik oqaaseqaatit tigunerinut uppernarsaavoq.*

Kalaallit Nunaanni Qimussertartut Kattuffiat – KNQR -  
inatsisissamat siunnersuut pillugu tusarniaanermut imatut oqaaseqaateqarpoq:

**§ 6 imm. 4:**

- Oqaaseq "*piumasaqaateqartoqarsinnaavoq*" nammineq oqaaseq ammasuummat taassuma "*piumasaqaatinngorlugu*" allanngortinnissaa kissaatigaarput.

*Akissut: Uumasut nakorsaqaarnermi oqartussat piumasaqaatit suut aalajangersarneqassanersut naliliisarput.*

**§11 imm. 2, 1:**

- Oqaaseqatigiit "*..kiisalu anorimut, silamut seqinermullu assiaquserneqassallutik*" peerneqassapput. Qimmeq qimuttoq sumiiffimmut uumaffigisaminut tulluarsartarpoq, piniarfinni/aalisarfinni assiaqutit ikkussuunneqassappata taakkuninngalu inuit ikkussuissappata tamanna pisariusunik kinguneqartitsiinnassaaq. Oqaaseq "*panertumik nallavissaqartinneqassapput*" namminerminni ajunngilaq, tamanna qimmilivinnut tulluarpoq, ukiuuneranili apummi nalasarmata tamanna erseqqissarneqassaaq.

*Akissut: Qimmit qimuttut Uumasut illersugaanerannik inatsimmit illersugaapput, aamma qimmilivinni imaluunniit qeqertani qimmilivinni pitussimatillugit anorimut silamullu assiaqusersimassallutik. Qimmit angalanermi atorneqartillugit pisoq allaavoq, tassanilu qimmeq qimuttoq assaalluni imoqqallutik.*

**§11, imm. 2, 3:**

- "*ullormut minnerpaamik ataasiarluni nerukkarneqarlutik*" - aasakkut kiatsillugu ullut tamaasa nerinissamat qimmeq pisariaqartitsinngilaq, pingaarnaruvoq imerpat. Qimmiaqqat ullut tamaasa nerisarpata tulluarpoq. Pingaarpoq erseqqissallugu ukioq kaajallallugu ullut tamaani qimmiaqqat nerisarnissat.

*Akissut: Qimmit qimuttut Uumasut illersugaanerannik inatsimmit illersugaapput, taamaalillunilu qimminik qimuttunik qimmiutilik kinaluunniit taakku peqqissaartumik paarineqarnissaannut pisussaaffeqarpoq, tassunga taakku pisariaqartitaat eqqarsaatigalugit nerukkarlugit imertittarlugit paaralugillu, tamannalu uumasut nakorsaqaarnikkut isigalugu isumaqarluni ullut tamaasa nerukkarneqartassasut. Taamaattorli inatsimmi, tak. aalajangersakkamat nassuiaatit,*

*siunniunneqarluni sulinermi misilittakkat aamma eqqarsaatigineqassasut, tassunga ilanngullugit qimminik qimuttuutillit ilaasa qimmit sapaatit akunnikkaartumik aalajangersimasumik nerisittarlugit.*

**§ 12:** Inatsit namminermi ajunngilaq, taamaattorli taasuma malinneqarnissaa ajornartorsiutaalluni, assersuutigalugu Kulusummi ungalunut atortussanik pisinissaq ajornarluni. Qinnuigineqartarput eqqaavissuarmi atortussanik aallequllugit, eqqaavissuarli paarnaqqasarmat aallertoqarsinnaanani. *Akissut: Sulinermi ajornartorsiuteqarsinnaanera naalakkersuisoqarfimmit alaatsinaanneqarpoq, isumaqarlunili inatsisip ulluinnarni eqqortinneqarnissaanut kommunalbestyrelsi akisussaasuusoq, tamakku pillugit qimmiutilinnik, Uumasut nakorsaqaqarnermi oqartussanik aamma Namminersorlutik Oqartussanik oqaloqateqarnissaq isumagalugu.*

**§ 13:** Aalasinnaanermut minnerpaamik 3 meterinik qimmit kalunneqarnissaat eqqarsaatigalugu Avannaata Qimussusersuata kalunnerit naannerit atorpai, tassa nunaminertaq annertoorujussuaq atorineqartarmat aamma qimussimik sukkaniunnermi peqataasut amerlasarmata. 2 meteri atorineqarpat pitsaanerussiaaq.

*Akissut: Siunnersuut qimmit qimuttut qimminut qanittumiittunut aporaannatik aalasinnaanermik uumasut nakorsaqaqarnikkut naliliinermik tunngaveqarpoq, taamaattumik kalunnerit minnerpaamik 3 meteriusariaqarlutik. Taamaattorli qimussimik sukkaniunnersi utaqqiisaasumik immikkut akuersisooqarsinnaalluni.*

**§ 13 imm. 3 aamma 4:** Qimmit marluk sanileriillutik pitussimappata kissaatiginnilarput kalunnerup aappaata takinerunissaa, tassa qimmeq takinerusumik kalunnilik allap imerfia angusinnaassammagu - taamaattumik kalunnerit takeqatigiissallutik.

*Akissut: Kalunnerit takissusiisa qimmit imminnut akornusersornatik nalsinnaanerat pisinnaalersissavaat, tamatumalu kingunerisinnaallugu anguniagaq taanna anguniarlugu kalunnerit takissusai assigiinnatik. Soorlu aamma imm. 3-mut nassuiaatinit takuneqarsinnaasoq kalunnerit takissusiat naannerpaamik 1 meterimik assigiinngittariaqarput.*

**§ 13 imm. 5:** Piniariarluni angalanermi kalunnerit atorineqarnissaat akuerisinnaanngilarput, isumaqaratta suut nammineq atussallugit qimmiutillip nammineq tamanna akisussaaffigigaa.

*Akissut: Kalunnerit atorineqarnissaat pillugu piumasaaqateqannigilaq. Nassuiaatinit takuneqarsinnaavoq qimmit qimuttut uninnganerini qimmit pituutaat atorineqarnerusartut. Taamatut pitutsinermi qimmit qimuttut akunnerminni inissisimaffitik patajaallisittarpaat, paanermikkut ajoquseratik imaluunniit pituuttaminnut ilarunnatik. Imm. 5-imi sillimaffiginiarneqarpoq qimmit qimuttut kalunnernik pituttaagaangamik aalajangersimasumik qimmilivinnisulli angalanermi pituttaasariaqanniginneri. Aalajangersakkakkut angalanermi*

*kalunnerit qimmit qimuttut akornuteqanngitsumik aalasinnaanerat qulakkeerneqassasoq aalajangiunneqarpoq, angalanermilu kalunnerit taakku qaqugumut atortussiaassanngillat taamaallaat qimussimik angalanerinnarmi, assersuutigalugu piniariarnermi takornarianilluunniit angallassinermi ator neqartassallutik.*

**§ 14 imm. 2:** Qungasequt 2 cm-inik silissuseqarpat - 1 cm-inik mikisunik qungasequtit ator neqarsinnaassanngillat, aallaqqaammut qimmiaqqanut ator neqartartut, taakkulu ator neqarnerusarlutik. Taamaattumik akuerisinnaanngilarput 2 cm-iusunik qungasequtinik atuinnisaq inatsisitigut aalajangersarneqarpat. (2 centimeterinit minnerusut qungasequtit assilineri quppernermi kingullermi ilanngunneqarpoq).

*Akissut: 2 cm-mik silissuseqartumik qungasequtit ator neqarnissaat pillugu piunasaqaat qimmit qimuttut uumasut atugarissaarnissaat eqqarsaatigalugu tunngavilersuuteqarpoq periutsiniillu allaanerunani, kingornalu qimmiaqqanut tulluurtut 1 cm-nik silissuseqartut ator neqalerlutik, naak qimmit inersimasunngoreeraluurtut.*

**§ 15:** Qimmiutilik piniariarluni angalasimappat qimmerlu pituussaarsimalluni toquinnarnagu uternissaata tungaanut paarineqarnissaa inatsimmi erseqqissarneqartariaqarpoq.

*Akissut: Aalajangersakkat erseqqissaannarpaat qimminik piginnittup siunertarinngisaanik pituussaarsimasut ingerlaannaq tiguniarneqartassasut.*

**§ 16 imm. 2:** Inatsimmi nutaami takuneqarsinnaavoq qimmip ataatsip qimmeq alla kiisimappagu toqunneqassasoq. Ippinnartoq tassaavoq qimmit qaasuttut aamma qimmit paanninnermik nuannarisqaartut akornanni immikkoortitsisoqannginnera. Qimmit qaasuttuunngikkaluarlutik paannissinnaapput. Nalinginnaasuvoq qaasuttuunngikkaluarlutik qimmit paatillutik kiisisarnerat.

*Akissut: Taamatut immikkoortitsineq nassuiaatini naammattumik sillimaffiqineqarpoq, tassunga ilanngullugu qimmit qimuttut sumiiffiminni naalagaaniartarnerat qullersaqartarlutik najugartillu illersortarlugu.*

**§ 22:** Nunami isorartuumi angalaneq ajornakusoorsinnaavoq. Uumasut nakorsaat qimminik kilersimasunik passussissappat tamanna qimmit illersorneqarneri pillugit anguniakkanut akerliussaaq. Assersuutigalugu qimmeq ataaseq nannumit arnavissamit kiineqarsimappat ikilerneqarsimalluni qimmiutillip qimmeq passussinnaava uumasup nakorsaata tikinnissaa utaqqinagu. Aamma uumasut nakorsaqarniarneq ajornakusooreerpoq.

*Akissut: Aalajangersakkap qulakkiissavaa inunnit ilinniarsimasuunngitsuniit pilaalluni akuliunnissamut qimmit qimuttut illersugaanerat, tassunga ilanngullugit qimmip isikkuanik allannguinnissamik siunertaqartut imaluunniit upperisapalaaq pissutigalugu, assersuutigalugu*

*timminnermi paamiup ilaata kipineqarnerani imaluunniit aseruuttoornermi siutaata kipineqarnera. Akerlianilli qimmeq qimuttoq ajoqusersimappat piginnittoq soorunami akuliussinnaavoq, assersuutigalugu nannumit kiineqarsimappat piffissaagallartillugulu uumasup nakorsaanit ikiorneqanngippat toqunnissaa naliliiffigalugu. Uumasut nakorsaannik amigaateqarneq pissutigalugu ikiorneqarnani pisariaqanngitsumik anniassappat qimmip toquneqarnissaa pillugu aalajangiinermik kinguneqarsinnaanera naalackersuisoqarfiup ilisimalluarpa.*

**§ 39, 4:** Oqaaseq "iluminani" ("drægtig?") qanoq isumaqartinneqarpa, qanoq isumaqarnerseq erseqqinnerusumik nassuiarneqartariaqarpoq.

**§ 40:** Uumasut nakorsaannit akuerineqartussanik qimussimik sukkaniuunnernut malittarisassaliortoqarnissaa isumaqatiginngilarput. Sukkaniuunnerit kattuffimmit peqatigiiffinnillu aaqqissuunneqartut tamatigut qimmit qimuttut illersorneqarneri isiginiarlugit ingerlanneqartarput, tulluurtumik, isumannaatsumik minnerunngitsumillu kulturitta allanngortinnginnissaa isiginiarlugu, tassa aaqqissuussisut ataqqineqarsinnaasariaqarmata. Taamaattumik taamatut aalajangersagaqarneq inatsimmiit peerneqartariaqarpoq.

*Akissut: Malittarisassat qimmit qimuttut uumasutut atugarissaarnissaat aamma siusinnerusukkut qimussimik sukkaniuunnernit misilittakkat eqqarsaatigalugit tunngavilersorneqarsimapput.*

**§ 40, 5:** Sukkaniuunnermi apuuffissamut pigaanni qimmit qassiunissaannik uumasup nakorsaata aalajangiinissaa tulluunngitsutut nalilerparput. Tamatumunnga tunngavilersuutaavoq sukkaniuunnerup ingerlanerani qimmit peerneqartut piginnittuminnut utertinnissaannut aaqqissuussisut akisussaammata, pisussaaffeqarmata suliassaralugulu.

*Akissut: § 40-mut Naalackersuisoqarfiup akissutaanut innersuussisoqarpoq.*

**§ 42:** Piumasarissavarput § 42-p atorneqarneratigut Naalackersuisut qimmit qimuttut sukassaertinnerini atorneqarsinnaasunik nalunaarsuinissaat.

*Akissut: Taamatut ittumik piareersaasoqarnissaanut tunngavissiisoqarpoq.*

**§ 43:** Piumasaraarput tamatumunnga uumasup nakorsaa kisimi pisinnaatinneqassanngitsoq, kisiannili kattuffik suleqatigalugu tamanna isumagineqassasoq. Tamatumunnga pissutaavoq sumi nappaalasoqalersimanerani kattuffik tamatigut alaatsinaattarmat, peqataanissamullu inerteqquteqareertarluni.

*Akissut: Suliassaqarfimmi uumasut nakorsaqarnikkut oqartussat suliatigut oqartussani qullersaapput aalajangersagarlu malillugu taamatut aalajangiisarlutik.*



§ 44: Taanna 4 tiiminiit tiiminut marlunnut allanngortinneqassaaq. Misilittakkat takutippaat qimmit ilai qimussimik sukkaniuunnerup aqaguani aatsaat tiguneqarsinnaasartut.

*Akissut: Tamannarpiaq pissutigalugu sukaterisoqarpoq - uumasunik illersuinermi eqqarsaatigisassat aallaavigalugit.*

§ 48 imm. 2: Oqaasertaliussaq una: "naalliutsinnissaa pitsaaliorniarlugu" imatut iluarsineqartariaqarpoq "naalliutsinnissaa pinaveersaarniarlugu".

Qeqqata Kommuniata makku oqaaseqaatigai

Qeqqata Kommuniata piffissaq tusarniaaffissaq 9. november 2021-imut sivitsortissimavaa, taakku oqaaseqaataat ilanngunneqarumaarlutik.

Suliniut qimmeq, Ilisimatusarfik imatut oqaaseqaatissaqarpoq

"Kalaallit qimmiini qimuttuni kulturip atatiinnarnissaa siunnersuummi akueriniarneqarpoq peqatigisaanillu kalaallit qimmiat qimuttoq illersorniarnearluni. Tamanna pitsaasuvoq. Peqatigisaanik pingaarpoq erseqqissassallugu "qimminik qimuttunik peqqinnerusunik" inatsisissatut siunnersuutip iluaqutaasumik kinguneqartitsinissaanut tunngavik pingaarutalik naammassineqanngimmat, tassa qimminik qimuttoqarfiusuni uumasut nakorsaannit ikiorserneqarsinnaaneq. Tamanna tulluanngilaq piviusumillu ilaatigut tamanna isumaqarluni allamik periarfissiinngitsumik qimmit napparsimasut ikilernerqarsimasullu qimmiutilinnik misilittakkat tunngavigalugit ajorunnaarsitsiniarnerit pinerluttuliorninngortinneqarmata.

"Siunnersuummut nassuiaatit" aallartinnerani allassimavoq:

"Malittarisassat aamma siunertaraat kalaallit qimmii qimuttut ukiuni kingullerni ilaatigut nappaalanerit kiisalu inooriaatsit silallu pissusaata allanngorneri qamuterallannik atuinerulernermik qimusserneq akigalugu kiisalu sikuusarnerata annikilliarternera pissutigalugit ikiliartuinnarsimasut illersornissaat."

Tassanga takuneqarsinnaavoq qimmit qimuttut taannalu pillugu kulturi illersorneqassappata inatsit nutaaq taanna kisimiissanngimmat. Arctic Nomads'imiit (2017) aamma Suliniut Qimmeq'miit (2020) inassuteqaatini erseqqissarneqarput suliniutit arlallit qimminik qimuttunik kulturip piujuartinnissaata ineriartortinnissaanut iluaqutaasinnaasut tamarmillu politikikkut iliuuseqarnissamik pisariaqartitsisut:

- 1) Qimminik qimuttunik ingerlatsisussanik kinguaariinnik tulluuttunik ilinniartitsineq. Kalaallit Nunaanni meerarpassuit inuusuttorpasullu ullumikkut qimmiuteqarnermik qimussertarnermillu ilinniartinneqarnatik alliarporput. Taamatut ilinniartitsineq kalaallit

nunaanni efterskolinit, sannavinnit, atuarfinit tapersorsorneqarunik ikorfartorneqarunillu iluaqutaasiinnaapput.

- 2) Qamuterallannut unammillertitut assartuutitut qimmit qimuttut illersugaaneri. Qimusserluni tammajuitsussarsiorluni piniartarnerit, qimussimik qalerallinnik assartuisarnerit il.il. arriitsumik nipaatsumillu sunniuteqarluarnerusunit qamuterallannit ingiarneqalerput. Qimminik qimuttunik atuinerup iluaqutaasumik immikkoortitsisoqarnissaanik pisariaqartitsisoqarpoq.
- 3) Qimmit qimuttut pillugit siunnersuisoqatigiinnik pilersitsineq ilaatigut misilittagalinnit peqataaffigineqartoq, qimminik qimuttunik kultureqarnermut, taassuma piujuartitsisumik ineriartortinneranut pingaaruteqartunik tunngasunik pissutsinik annikitsunik annertuunillu politikerinut siunnersuisinnaasoq.
- 4) Kalaallit Nunaanni maannakkut uumasut nakorsaqaarnikkut amigaateqarneq aamma illoqarfinnut nunaqarfinnullu qimminut nakorsaatinik pilersuinerup amigarnera aaqqinniarneqassaaq, assersuutigalugu telemedicin aqqutigalugu aamma pikkorissarnissamut periarfissanik pilersitsinikkut.
- 5) Qimminut qimuttunut saaffiginnittarfimmik imaluunniit qimmit qimuttut pillugit højskolimik pilersitsineq, qimmeq kulturilu pillugit ilisimasat pilersinneqarlutik ingerlateqqinneqarlutillu.

Akissut: Inatsisip suliarinerata ingerlanerani inassuteqaatit taakku Naalackersuisoqarfimmit suliareqqinneqassapput.

Avannaata Kommunia makkuninnga oqaaseqaatissaqarpoq:

Allakkap danskisuuani allannerlutanik naqinnerlutanillu arlalinnik peqarpoq. Inatsisissatut siunnersuummi qimmit qimuttut pillugit taaguutit assigiinngitsut atorneqarput. Siunnersuummi tamarmi taaguut ataaseq atorneqartariaqarpoq. Taamaangippat allaaserisaq "qimmeq qimuttoq" § 2-mi atorneqartoq pisariaqanngilaq. Aamma Qeqqata Kommunia Qeqqata Kommuniatut allassimanera tupigusuutigineqarpoq. Taamatut allannerlutat allatanik kukkunersuinermi nassaarneqartariaqarput. Tamanna pitsaanerulersinneqassasoq inassutigineqarpoq. Aammattaaq inassutigineqarpoq kalaallisoortaa taamaaqataanik pitsassutsikkut qulakkeerneqassasoq.

*Akissut: Oqaaseqaat naalackersuisoqarfimmit tusaatissatut tiguneqarpoq.*

§ 4, imm. 1-imut. Pisariaqartutigit aalajangiisussamik imaluunniit naammagittaalliuutinik tiguneqartunik isumaginnittumik qimmeqarfiusuni uumasut nakorsaqaarnikkut oqartussaasunik peqarunnaarnikuuvoq, tak. § 4, imm. 3. Tamanna suliatigit illersorneqarsinnaanngilaq qimmeqarfinni kalaallit qimmiinik qimuttorpassuarnik isumaginnittussamik oqartussatut suliatigit ilinniarsimasumik Naalackersuisut atorfinitsitsisoqarnissaanik isumaginnissimanatik, qimminik qimuttoqarfiit avataanni kommunini najuuttunik ilinniarsimasunik oqartussanik sulisoqarluni.

*Akissut: Oqaaseqaatit Naalackersuisoqarfimmit tusaatissatut tiguneqarput, ilisimatitsissutigisinnaallugulu Uumasut nakorsaqaarnikkut oqartussaaffimmut uumasut nakorsaannik sulisussarsiornermi namminersorlutik oqartussat nalinginnaasumik ajornartorsiuteqarmata.*

§ 5 Imm. 1-imut. Uumasut nakorsaqaarnikkut oqartussat eqqartuussivikkut aalajangiinertaqanngitsumut pisortanut inuinnaallu illuinut kiisalu sumiiffinnut assartuutinullu isersinnaallutik annertoorujussuarmik piginnaatinneqarput. Aamma tupinnarpoq Uumasut nakorsaqaarnikkut oqartussat allagaatinik takunnissinnaanerata. Imaappa Uumasut nakorsaqaarnikkut oqartussat pisortat qarasaasiaqarfiinut innuttaasullu qarasaasiaannut, inuit attaveqaataannut il.il. tamanut isersinnaasut? Nassuiaatinit takuneqarsinnaavoq naleqqiussuinermi tunngavik isiginiarneqassasoq, misissorneqartariaqarlunili tamanna Kalaallit Nunaanni eqqartuussisarnermik inatsimmut 2016-imeersumut naapertuunnersoq.

*Akissut: Inatsit malillugu nakkutilliinermi suliaqarnermut atatillugu § 5, imm. 1-imi periarfissaq taaneqartoq Uumasut nakorsaqaarnikkut oqartussat taamaallaat periarfissaraat nakkutilliinerullu ingerlanneqarnissaa sioqqullugu piginnittumut imaluunniit taassuma ilaqutaanut kinaassutsiminnik uppersaasussaallutik, taamaalillutillu kommunimit taatsiarneqartutut pingitsaaliillutik iserniarsinnaanatik. Tamatuma saniatigut erseqqissumik aalajangersarneqarpoq taamatut piginnaasaqarneq uumasut nakorsaqaarnikkut oqartussat kisimik pigigaat, kiisalu naleqqiussuinermi tunngavik isiginiarlugu tamanna ingerlatissallugu.*

Imm. 2-mut.

Uumasut nakorsaqaarnikkut oqartussat imm. 1 malillugu paasissutissanik pissarsinissamut tulluartutut missiliorneqartunut inunnut aalajangersimasumik, piffissamut killilikkamut piginnaatitsissummik atulersitsisinnaapput. Inuit tulluartutut missiliorneqartut kinaassutsiminnik uppersaateqassanersut nassuiaatinit takuneqarsinnaanngilaq. § 5, imm. 1-imi piunasaqaat assigalugu inatsimmi tamanna piunasaqaataasariaqarpoq, Taamaalilluni inassutigineqassaaq § 5, imm. 1 aamma imm. 1 itisilerneqassasut, tassa paatsuuinissamut namminerlu iliuuseqarsinnaanermut ammaassisoqarmat. Piffissaq akuersissuteqarfiusoq ersernerluppoq, inassutigineqassaarlu taanna erseqqissarneqassasoq suliamut ataasiinnarmut atuutissanersoq, imaluunniit ullormut/sapaatip akunneranut ataatsimut il.il. taamaallaat atuutissanersoq. Aammattaaq inassutigineqarpoq paragrafip taassuma sumi qaqugulu atorneqarsinnaanera pillugu inatsimmi itisiliisoqarluni.

*Akissut: Inuit, Uumasut nakorsaqaarnikkut oqartussani imm. 1 malillugu paasissutissanik pissarsinissamut piginnaatinneqartut aamma kinaassutsiminnik uppersaasassapput, imm. 2-milu nassuiaatini tamanna pillugu Naalackersuisoqarfik oqaaseqatigiinnik ikkussilluni. Tamatuma saniatigut Naalackersuisoqarfik isumaqarpoq piginnaatitsinerup piffissalernerata allanneqarnerani taassumalu aalajangersimasumik ilusaa naammattumik nassuiaatini erseqqissoq,*

*nappaateqarnermi tuniluunneqarsinnaanerani: "Piginnaatitsineq inummut tunngasuussaaq pisumullu aalajangersimasumut iliuusissanik aalajangersimasunik ilaqassalluni inunnullu suliamik suliarinnissinnaasutut nalilerneqartunut nalunaarutigineqassalluni. Piginnaatitsissut piffissamut killeqanngitsumuusinnaangilaq."*

§ 6, imm. 1-imut. Takuneqarsinnaavoq qimmit qimuttut taamaallaat Kalaallit Nunaanni qimminik qimuttoqarfinniissinnaasut. Paragrafimi tassani allaaserineqarpoq qimmit qimuttut taamaallaat Kalaallit Nunaanni qimminik qimuttoqarfiit iluini akuerisaasut. Qimmit qimuttut Danmarkimiinnerisa imaluunniit nunarsuup ilaani allamiissinnaaneritut inatsisinik unioqutitsinnaaneranut paatsuuinissamut ammaassivoq.

*Akissut: Kalaallit Nunaata avataanut kalaallit qimmiinik qimuttunik annissinissaq inatsisinik unioqutitsinerunngilaq. Taamaallaat Kalaallit Nunaannut utertinneqaqqusaanngillat.*

Paragrafimi qimminik qimuttunik akuerisaasumik/akuerineqanngitsumik eqqussineq annissinerlu pineqarpoq, tamannali sunaanersoq allaaserinagu. Taamaalilluni inassutigineqarpoq paragraf taanna qimminik qimuttunik akuerisaasumik annissineq pillugu aalajangersakkamik aamma annissineq akuerisaasooq qanoq kinguneqarsinnaanera allaaseralugu.

*Akissut: § 7, imm. 5-imit takuneqarsinnaavoq assersuutigalugu qimussimik sukkanuuinnermut atatillugu akuerisaasumik nuussisoqarsinnaasooq, piginnittoq Uumasut nakorsaqaarnikkut oqartussani tassunga immikkut akuerineqarsimappat.*

§ 7, imm. 4-mut. Imm. 1 aamma 2 naapertornagit qimminik qimuttunik nuussisoqarsimappat kommunalbestyrelsi peqqusisinnaavoq qimmit qimuttut illoqarfimmit nunaqarfimmilluunniit nuunneqassasut imaluunniit kommunalbestyrelsip innersuussaanut immikkoortinneqarallarlutik inissinneqassasut qimmit qimuttut nuuttut akiuussuserneqarsimaneri, ID-mi ilisarnaateqarneri kialluunniit piginerai pillugit nalornisoqarpat. Qimminik qimuttunik nuussinermi aningaasartuutit qimminik qimuttuutillip akilissavai. Qimmiutillip qimmiminik nuussinissamut qanoq sivisutigisumik piffissaqarnera amigaataavoq. Aamma apeqqutaavoq qimmiutilik qimmiminik nuussisimangippat taava kommunalbestyrelsi pinngitsaaliinikkut nuussinerup pinngitsaaliissutaanissaanut pisinnaatitaaffeqarpa ajornerpaaffianilu qimminik toqutsisinnaatitaava?

*Akissut: Piffissamut apeqqutaapput piginnittumi pissutsit, kommunalbestyrelsili missiliuippat peqqussutit piginnittumit malinneqalersaanngitsut qimmit qimuttut piginnittumut nutaamut tulluartumut nalunaarsugaaneri allannqortissinnaavai imaluunniit piginnittup akiligaanut taakku toqutsillugit, tak. § 49.*

Tunillaassuinnermut il.il. qulakkeerinninnissamut kommunalbestyrelse qanoq iliorsinnaanersoq itisileqqinneqassaaq. Inassutigineqarpoq Uumasut nakorsaqaarnikkut oqartussat

kommunalbestyrelsimut piginnaatitsilerpata kinaassutsimik uppernarsaaneq pillugu aalajangersakkamik ikkussisoqassasoq.

§ 8, imm. 1-imut. Takuneqarsinnaavoq qimmip qimuttup pilerfia nalornissutigineqalerpat qimmimi qimuttumi DNA-mi misiligutissanik tigusisoqarnissaa kommunalbestyrelsip piumasaqarsinnaanera pillugu erseqqissaasoqartariaqarpoq. DNA-mik misiligummut taartaasumik pisoqarsinnaanersoq pillugu immikkoortup ilanngunneqarnissaa inassutigineqarpoq, aamma qimmip qimuttup pileqqaarfia pillugu sulianut atatillugu pisinnaasunut pissutissaqanngitsumik toqutsinerit.

*Akissut: Qimminik qimuttunik DNA-mik misiligummik tigusisoqarnissaata piumasarinissaanut tunngavissiisoqanngilaq, Naalakkersuisulli imm. 3 malillugu uppernarsaaneq pillugu malittarisassanik erseqqinnerusunik aalajangersaasinnaallutik. Piginnittoq uppernarsaasussaavoq, kiisalu uppernarsaanermut atatillugu aningaasartuuteqassalluni.*

§ 10, imm. 1-imut. Qimmeqarnissamut appasinnerpaamik ukioqarnissaq manna tikillugu tassaasimavoq 16-inik ukioqarneq. Taanna sooq ukiunut 18-inut qaffanneqarpa? Aamma taamatut aalajangiinermut suut tunngavigineqarpat?

*Akissut: Piginnittumi ilaatigut inersimasuunissamik piumasaqarneq eqqarsaatigalugu qimmit qimuttut uumasutut atugarissaarnissaat pissutigalugu ukiut qaffanneqarput. Meeqqat 18 inorlugit ukiullit taamaallaat qimuttunik qimmeqarsinnaapput angajoqqaatik paarsisutilluunniit nakkutilliisoralugit akisussaasoralugillu.*

§ 11, imm. 2-mut. Litra 3-p peerneqarnissaa inassutigineqarpoq, pissuseq taanna immikkoortumi atuuttumi naammareermat. (Litra pineqarpa sooq naqinnerit pinnagit kisitsisit atorineqarpat?).

*Akissut: Uumasut illersugaanerat pillugu inatsit naapertorlugu qimmiminik peqqissaartumik piginnittup paarsinissamut akisussaanera erseqqissarniarlugu ullut tamaasa nerukkaanissaq pillugu piumasaqaateqarpoq.*

Imm. 4-mut. Qimmit toqunneqarnerinut akisussaaffiup piginnittumiinnissaata ilanngunneqarnissaa inassutigineqarpoq.

*Akissut: Qimmip piaqqisup toqunerani qimmiaqqanik sapaatit akunnerinik arfinilinnik inortunik piginnittup toqutsinissaanut akornutissaqanngilaq.*

§ 12, imm. 4 aamma 5-imut. Imm. 4-p aamma 5-ip imarisai assigiipput, immikkoortumilu ataatsimi allanneqartariaqarlutik. Inassutigineqarpoq paragrafi itisilerneqassasoq, qimmeqarfimmi qimmit pitussimannginnerini pisinnaasunut uumasunut allanut inunnullu ajoqusiisinnaannginnerat qulakkeerniarlugit.

*Akissut: Naalakkersuisoqarfik isumaqataanngilaq, allanillu nassuiaatissaqarnani.*

§ 13, imm. 1 aamma 2-mut. Aalaffiusinnaasup allaaserineqarnera ersernerluppoq. Aalaffiusinnaasup annerpaaffissaanut piumasqaateqarpoq, kisianni annikinnerpaaffissaanuunngitsoq. Tamanna annikippallaartunik imaluunniit qimmeqatigiinnut mikivallaartumik qimminut nunaminertanut akuerineqarsinnaasunut ammaassivoq. Inassutigineqarpoq aalaffiusinnaasumut piumasqaat aalaffiusinnaasup minnerpaamik 6 meteriunissaanut allangortinneqassasoq, qimmip naammattumik aalaffigisinnaasaa nunaminertaq naammattumik angissuseqarnissaa qulakkeerniarlugu. Imm. 3-mut aamma 4-mut. Taakku pisariaqanngillat, allaaserisami "risariaqartut" atorneqarmata. Imm. 3-4 taamaattumik peerneqassasut inassutigineqarpoq.

*Akissut: Imm. 1-imi aamma 2-mi malittarisassat ilusilernerqarput taamaalillutik uumasunik illersorneqarsinnaasumik isumaginninnissaq uumasut illersorneqarnerisigut piumasqaatit naammassineqarlutik peqatigisaanillu pissutsit naleqquttut atorneqarsinnaasut sillimaffigineqarlutik. Imm. 3-4 pillugit oqaaseqaatinut naalackersuisoqarfik isumaqataanngilaq.*

§ 15, imm. 2-mut. Qimmit inuttassarsiuunneqarnerat taamaallaat pissaaq qimminut tiguneqartunut piginnittuuneq ilisimaneqanngippat. Taamaalilluni inassutigineqarpoq imm. taanna imatut allangortinneqassasoq piginnittoq ilisimaneqanngippat aatsaat inuttassarsiuunneqassasoq.

*Akissut: Imaattoqarsinnaavoq piginnittoq aallaqqasoq tamanullu ammasumik kalerriinissaq pisariaqarluni taamaalilluni allat piginnittumut atassuteqarsinnaallutik, tassa kingunissaa annertuumik akuliunnerummat.*

§§ 15-imut aamma 19-imut. Inassutigineqarpoq §§ 15 aamma 19 paragrafimut ataasermut katersorneqassasut.

*Akissut: Aalajangersakkat taakku marluk ataatsimuulersinneqarpata paasinarluarpoq, Naalackersuisoqarfillu taamaattumik § 19 § 15-ip ataanut nikisillugu, taamaalillutik maannakut § 16-iulerlutik.*

§ 17, imm. 5-imut. Piumasqaat taanna inuk pillugu paasissutissat pillugit inatsimmut akerliuvoq allatigullu aqunneqartariaqarluni, tassa qimmilivimmi ataatsimi atip oqarasuaatillu normuanik tamanut saqqummiussinissamut piumasqaateqanngimmat. Inassutigineqarpoq taamaalilluni taanna allangortinneqassasoq qimmilivinnut normu ilisarnaataasoq allanneqarluni, qimmiliviit kimit pigineqarneranik sumiinneranillu taanna kommunalbestyrelsimit atorneqarsinnaalluni. Qimmiutillip qimmiliviillu ataasiakkaat pillugit paasissutissat tamatuma kingorna kommunalbestyrelsimi nalunaarsugaalissapput. Tamatuma qimmilivimmi ataatsimi inummut paasissutissat tamanut ilisimatitsissutiginnissaannik piumasqaarnek pinngitsoortissavaa. Inassutigineqarpoq qimmiutillit ataasiakkaat inuk pillugu paasissutissanik ilisimatitsisinnaanerat allanneqassasoq

kommunalbestyrelsilu minnerpaamik takuneqarsinnaasumik kommunimiit inuk attavigineqartussa q ilisimatitsilluni kiisalu qimmilivinni tamani qimmit ilisarnaataannik normulerneqarlutik.

*Akissut: Aalajangersakkami taamaallaat piumasarineqarpoq piginnittup aqqa oqarasuaataatalu normua takuneqarsinnaassasoq, taamaalilluni inatsit malillugu tamanna pisariaqalerpat pineqartoq attavigineqarsinnaalluni, Naalackersuisoqarfillu isumaqarnani tamanna inuk pillugu paasissutissat pillugit inatsimmit akerliusoq.*

Imm. 6-imut. Pissuseq taanna itisilerneqartariaqarpoq, tassa qimmilivimmi susoqartariaqarneranik paatsuuinissamut ammaassimmat, aamma suna "eqqiluisaartinnissaa" aamma "torersuunissaa" immikkoortiterneqarluni. Pissuseq taanna nalunaarummiittariaqarpoq, eqqiluisaarnissaq pillugu kommunimi ileqqoreqqusamut tunngavissiilluni imaluunniit kommunimi eqqagassalerinermi ileqqoreqqusat aqutugalugit pissuseq taanna kommunimit malittarisassaqaartinneqassasoq inassutigineqarluni. Aammattaq inassutigineqarpoq qimminut ajoqusiisinnaasunik (assersuutigalugu saviit, ulimaatit, igalaamernit il.il.) qimmilivimmiittoqannginnissaa ilanngunneqassasoq.

*Akissut: Naalackersuisoqarfik allanik oqaaseqaatissaqanngilaq.*

§ 18, imm. 1-imut. Qeqertat qimmiliviit atornerarnerinik akuerineqartoq piffissaq allanneqarsimavoq. Piffissaq taanna qimminik qimuttoqarfiusumut tamarmiusumut nalinginnaasumik atugassaavallaarpoq. Tassani nunami sumi inissisimaneq apeqqutaasariaqarpoq, tassa qeqertanut qimmiliviusunut pissutsit assigiinngitsorujussuummata, qanoq avannarpasissumiinneq apeqqutaalluni. Paragrafi taanna inassutigineqarpoq sumiiffinni pissutsinut naleqqussagassanngorlugu allangortinneqarluni, aamma qeqertat qimmiliviit nunami sumiinnerat malillugu aalajangersarneqarluni.

*Akissut: Kommunalbestyrelsip kommunimi ileqqoreqqusami malittarisassat tulluarsarsinnaavai, taamaalillutik sumiiffinni pissutsit annertunerusumik sillimaffigineqarlutik.*

Imm. 5-imut. Aalajangersakkami tassani § 17, imm. 5-imi pissutsit assigi pineqarput, aammattaarlu inuk pillugu paasissutissat pillugit inatsimmut akerliulluni. § 17 imm. 5 pillugu siusinnerusukkat siunnersuummut innersuussusoqarpoq.

*Akissut: Naalackersuisoqarfik § 17, imm. 5-imi akissumminut innersuussivoq.*

§ 19. Inassutigineqarpoq paragraf taanna § 15-imi katersorneqassasoq, tassa taakkunani immikkoortut assigiit pineqarmata.

*Akissut: Uuma ataani takukkit.*

§ 21. Tupigineqarpoq aalajangersakkat taakku sukumiisut inatsisissatut siunnersuummi ilaammata aamma nalunaarutissamut siunnersuummiinnatik, taakku kommunimi ileqqoreqqusanut nalinginnaasumik aallaaviusarmata. Inatsisit Inatsisartunit akuerineqartut siunertamik allaaserisamik aamma suliassaqaarfiup iluani aalajangersakkanik pingaarutilinnik imaqartarput. Nalunaarut inatsisip malittarisassaanik naammassinnippoq imaluunniit immiisuulluni. Nalunaarut inatsimmik tunngaveqarpoq inatsimmullu tassunga innersuussilluni. Nalunaarut innuttaasunut, suliffeqarfinnut oqartussanullu pituttuisuuvoq. Nalunaarummi kommunimi ileqqoreqqusat pillugit aalajangersakkat ilaasinnaapput, tassa nalunaarutip kommunimi ileqqoreqqusanut tunngavissiimmat.

*Akissut: Naalackersuisoqaarfiup piumasagaatit taakku nalunaarummi inissinnagit inatsisip oqaasertaanut katersorpai qimminik qimuttoqarfinni malittarisassat assigiissaarnissaasa qulakkeerniarlugu.*

§ 22, imm. 1 aamma 2-mut. Aalajangersakkat taakku naalakkiutigaa qimminut qimuttunut nakorsaanikkut passussisussaq taamaallaat tassaasoq uumasut nakorsaat imaluunniit peqqinnissakkut ilinniagaqarsimasutut sulisut akuerineqarsimasut. Paragrafimi tassani aamma katsorsaanerit annikinnerusut soorlu quartaarsaatit, pencilinit il.il. allaaserineqarput uumasut nakorsaannit imaluunniit peqqinnissakkut ilinniagaqarsimasunit sulisunit akuerineqarsimasunit taamaallaat suliarineqarsinnaasut. Tamanna imatut allanneqartariaqarpoq taamatut ittuni katsorsaanerit annikinnerusut aamma qimmiutilinnit isumagineqarsinnaasut. Nakorsaatinut pitsaanagerusumik aaqqiissutinik nassaartoqarnissaa inassutigineqarpoq, tassa uumasut nakorsaarnikkut oqartussat piffissami maannakkut nakorsaatitigut isumaginnissinnaangimmata, tassa qimminik qimuttoqarfinni uumasut nakorsaarnikkut oqartussaqaangimmat, pissutsimilu tassani qimmiutillit nakorsaatini pissarsinissaat ajornarmat. Tassani ajornartorsiut qaqinneqarpoq Namminersorlutik oqartussat Uumasut nakorsaarnikkut oqartussanik akissarsisitsisarmat nakorsaatinillu pisineq tuniniaanerlu inuinnarnit isumagineqarluni. Namminersorlutik Oqartussat taamaattumik namminersorlutik oqartussanit atorfinitsinneqarsimasumut uumasut nakorsaannut peqqusivoq Namminersorlutik Oqartussat nakorsaatit pillugit sullissisinnaasumik uumasut nakorsamik namminersortumik pilersitsissasut.

*Akissut: Aalajangersakkap qimminik qimuttunik uumasut illersorneqarneranni illersorneqarsinnaasumik passunneqarnissaat qulakkiissavaa siusinnerusukkat assersuutigalugu tulatoriaajaasarneq atorunnaarsinneqassasoq, Naalackersuisoqaarfiulli ilisimavaa uumasut nakorsaannik piffissat ilaanni amigaateqartarnerup malitsigisaanik ilungersunartoqartoq.*

§ 26 imm 1-imut. Imm. 1-imit takuneqarsinnaavoq: "Piginnittup aamma qimmimi allannguuteqarnerat kommunimut nalunaarutigissavaa kiisalu attaveqarnissamut paasissutissanik allannguisoqarmat aamma taanna ilanngullugu." Oqaaseqatigiit taakku § 25, imm. 1-imut



nuunneqartariaqarput, tassani pineqarluni qimminik nalunaarsuisarneq. § 26-imi pineqarpoq akiuussutissanik kapuuisarneq, tamannalu oqaaseqatigiinni siuliani taaneqartuni eqqaaneqarnani. Aamma inassutigineqarpoq siuliani taaneqartoq oqaaseqatigiit allanngortinneqassasut, taamaalilluni qimmit qimmiaqqallu sapaatit akunnerinik arfineq pingasunit utoqqaanerusut kisimik nalunaarsugaalerlutik.

*Akissut: Nuna tamakkerlugu uumasut pillugit paasissutissaasiviup qimmit qimuttut amerlassusiinut taakku akiuussutissanik kapineqartarnerannut naleqqiullugu nutarterneqarsinnaaneri qulakkeerniarlugu oqaaseqatigiit aalajangersakkap taassuma ataani inissinneqarput.*

§ 28, imm. 2-mut. Imm. 2-mut oqaaseqaatit naaneri assut ataqatigiinngitsutut inissisimapput paatsiveerutsitsillutillu, taamaattumik allatut allanneqartariaqarlutik.

*Akissut: Aalajangersagaq torersumik allanneqarsimannqilaq matumuunulu iluarsineqarluni.*

§ 37. Paragrafi taanna allatut allanneqassasoq inassutigineqarpoq, tassa qimmit qimuttut ajoqusersinnaanerat tamatigut pisinnaammat, apeqqutaanani qimussit sukkaniuussimanersut imaluunniit nalinginnaasumik qimussertoqarsimanersaq. Taanna taamaalilluni imatut allanngortinneqartariaqarpoq ajoqusersinnaanerup minnerpaaffimmiitinnissaa qulakkeerneqarluni.

*Akissut: naalackersuisoqarfik isumaqarpoq aalajangersakkap oqaasertaanut taanna ilaasoq.*

§ 38, imm. 1-imut. Inerteqqussut allaaserineqarpoq, kisianni inerteqqussummut sorlermut imaluunniit paragrafimut sorlermut innersuussisoqarnani. Taanna ilanngunneqassaaq paatsiveeruttoqannginnissaa qulakkeerniarlugu.

*Akissut: Paragrafip siulianiittumut, pingaarnertut malittarisassamut innersuussisoqarpoq.*

Imm. 4-mut. Aalajangersagaq taanna inassutigineqarpoq oqaasertalernera allanngortinneqassasoq, tassa taanna § 7-imi uteqqiinerummat, qimminik nuussinermut tunngasoq. Qimussimik sukkaniuutsitsisumit kommunimiit akuersisummut tunniussisumut taanna taamaalilluni allatut oqaasertalerneqartariaqarpoq.

*Akissut: Naalackersuisoqarfik isumaqarpoq taassuma erseqqissarneqarnissaa tulluartuusoq.*

§ 40. Tupigineqarpoq qimussimik sukkaniuunneq pillugu malittarisassanut aalajangersakkat inatsimmut matumunnga ilaatinneqarmata. Tamanna nalunaarummi erseqqissarneqartariaqarpoq qimussimik sukkaniuunnermut ileqqoreqqusanut tunngavissiisumi, Kalaallit Nunaanni qimminik

qimuttunik qimmiuteqarneq illersuinerlu pillugu Inatsisartut inatsisaaniunngitsoq. Aamma takuuk kommunip § 21-mut oqaaseqaatai.

*Akissut: § 21-mi akissutaanut Naalackersuisoqarfik innersuussivoq.*

§ 43. Inassutigineqarpoq sumiiffinniit aalajangersimasuniit qimussimik sukkaniuuffiusumut illoqarfimmut qimminik nuussinissamut inerteqquteqarsinnaaneq akuerineqassasoq. Tamanna tunillaassuisinnaanermut, nappaalasoqalernissaanut, qimmit assigiinngitsut akuleriinnissaanut il.il. qulakkeerinnissaaq. Siuliani eqqaaneqartumut ilassummut atatillugu tamanna kapitalimi nutaami immikkut qulequtaqartumi ilaatinneqarsinnaavoq.

*Akissut: Periarfissaq taanna § 7-imiippoq.*

§ 44. Qimminik qimuttunik pituussaarsimasunik tigusinissamut nalunaaquttap akunneri sisamat piffissaq allassimasoq qimussimik sukkaniuunnerup taamaatinneraniit aatsaat aallartittariaqarpoq, tassa qimussimik sukkaniuunnerit amerlanertigut piffissaliussaq taanna qaangerlugu sivilissuseqartarmata.

*Naalackersuisoqarfik isumaqataannqilaq.*

§ 48. Paragrafi taanna peqqussutinik inerteqqussutinillu allaaserinnippoq, kisianni peqqussutit inerteqqussutillu suut pineqarnersut allaaserineqarnani. Taanna ilanngunneqassaaq, tassa peqqussutit inerteqqussutillu ilai 72 timmit iluini atorunnaarsinneqarsinnaanngimmata.

*Akissut: Peqqussutit § 4-mi ereqqinnerusumik malittarisassaqartinneqarput.*

§ 49. Paragrafi taanna taamaallaat peqqussutinut inerteqqussutinullu atuuppoq. tak. § 4, imaluunniit aamma peqqussutinut inerteqqussutinullu, tak. § 48?, § 48 tassunga ilaatinneqanngippat, § 48 pisariaarutissaaq. Paragrafimi uku allaaserineqarput: "Tamanna pisinnaanngippat kommunalbestyrelsip Uumasut nakorsaqaarnikkut oqartussaasut qimmeq qimuttoq piginnittumut akiligassanngorlugu toqutsissinnaavaat." Allaaserinninneq taanna oqartussanut assigiinngitsunut marlunnut allaffissornikkut pisinnaatitaaffiliivoq. Aalajangiinerit akerleriinnissaat pitsaaliorniarlugu oqartussat akisussaasut tamatigut ataasiinnaasariaqarput.

*Akissut: § 4 kommunalbestyrelsip aamma Uumasut nakorsaqaarnikkut oqartussat akornani oqartussat agguarneqarnerinik malittarisassaqartitsivoq, kiisalu taakku peqqussutinik inerteqqussutinillu atulersitsinissaanut piginnaatitaanerit, aamma § 48 peqqussummut/inerteqqussummut atatillugu aamma § 49-mi pineqaatissiinissamut ilisimasaarilluni.*